

ሶቀማኖ ሆጉት ኣጉሰ

ሶቀማኖ ሆኅ መጻፉ ሉቃስ እንጂሊች ኤተሪን ዮእሃን፤ መጻፍስ ቡዕላ እኮ ጠዉ ዋዕኔ ኢስ ኣሳበት መገን ኣያኒን ኣዎንት እስተኔሃ ጠወኣኖ ተሸት ላገተ «ዬሩሳሌማን፤ ይሁድ ባዶን ጉዕማን፤ ሰማርያን ለክ ኡላ ገበላ ኢላ» (1፥8) እንጂሊ ህት ኣት እልሶጎሬ ኩሊሃት፤ መጻፉስ ኣመዕነቱ ኣይሁድ በላን ጀመር ጉዕመ ኣዱንያ እል ኡመት ኣመዕናኖ ህይመኖተ እሆተ ኢላ ህት እክ ኣልባዕሊጌ ጠወኣኣተ ሄሱ። ከተሶሲሁ ኣመዕናኑት ሮሞ ዋመ ግብ ኣዘን ሂላ ጠወ ኣታ መነ እሁ ሆጉሰለክ ኣመዕናኖ ህይመኖቱ ኣይሁድ ህይማኖተ ዊመ ኣኣኖሃ እሁስ ኩሎታት።

ሶቀማኖ ሆጉት ኢስተኔሃ ጠወኣ ተሸት ላገት ኢልታ ቤቹ ወክቲን ወክቲን ኣልባዕሊን መሩሰለክ ኣመዕናኑት በተእን መሩሰ ለሊሳኢሁ ሰሱ ቡዕላ እኮ ጠዋኒት፡-

1. ኣመዕናኖ ኣመዕነቱ ኢስ ሰማሃ ኦርዕዮች ኤተሪን ዬሩሳሌማን ጀመሩሰ።
2. ኣመዕናኖ ኣመዕነቱ እስራኤል ባዱ ጉዕመንከ ኢሉሰ።
3. ኣመዕናኖ ኣመዕነቱ ሮሞ ባዱ በርግ ሜድቴራን ባር ኣዝጋጌን ዮ ባዶን ኣልባዕሊ።

ሶቀማኖ ሆኅ መጻፍ ኣዜን ብዝ ይ ለለኖሁ ጠሊላ ኣያን ሆጉት እህን ጳንጤቆስጤ በር ዬሩሳሌማን ሄኦ ኣመዕናኖ ኣሊን ወልቃን ድሩሰለክ ህትን መጻፍስ ኣዜን ጠወኣሞ ጠዉ ጉዕሙንኩ ለሊ ጠሊላ ኣያንገ ኣመዕናኑተለክ ኣዎንሳኑት ኣዎንሱሰለክ ጠረኝሱሰ በርገኖ። ዋዕኔ ዘማን ሆንጠህኖ እቅ ኣመዕናኖ ኣመዕነት ሶህኑት ኣደደ ዱዱብስ ኣዜን ደግለለኖ ሃለን ሆንጠኮኡ፤ ሶቀማኖ ሆኅ መጻፍ ኣዜን እኮ ጠው ሶህኑት ኣመዕናኖ ሄኦንለክ ሜጡ እሆን ሄኦ ወልቀት ሄንከ ሎረ እሁስ ኩለኖ።

መጻፉስ ኣፎሃ

ሞስክርነትስ ተቃጠቡ (1፥1-26)

ኢስ መጨረሻን ኣሴ ትዛዝለክ ተብሳሃ (1፥1-14)

ይሁድ ቤቾን ኣኅ መንቹ (1፥15-26)

ዬሩሳሌማን ኢስተኔሃ ዱዱብሴመገ (2፥1—8፥3)

ይሁዳን ለክ ሰማርያን ዱዱብሴመገ (8፥4—12፥25)

ጳውሎሴ እንጂል ሶቀሞ ክድመተ (13፥1—28፥31)

ጳውሎስ ወዕኔ ወክት እንጂላ ዱዱብሶተ ሃሙስ (13፡1 — 14፡28)

ዬሩሳሌም ኦገት (15፡1-35)

ጳውሎስ ለምቅ ወክት እንጂላ ዱዱብሶተ ሃሙስ (15፡36 — 18፡22)

ጳውሎስ ሰቅ ወክት እንጂላ ዱዱብሶተ ሃሙስ (18፡23 — 21፡16)

ጳውሎስ ዬሩሳሌማን፥ ቂሳርያንለክ ሮም ባዶን ኡሱረሙስ (21፡17—28፡31)

1 ቲዎፍሎስ!

ዎኔኤ መጻፋን ኢስ አዕዮሀለከ ተማርሴሂ ጉዕመንከ ከተሶም። ከተሶሚንኩ ኢስ ሆጉስ ጀመሮ ወክቲኝ ኬሽ

2 ሰማሃ ኦሮዕዮ በር ኢላ አዕዮሃት፤ ሰማሃ ኦሮዕዮሁ መጠር አሳባተ ትዛዝሰ ጠሊላ አያኒን አሴሳኝ ኤተሮኒት፤

3 ልግብ ኦርሸተ ቶግ ሬዮኝ ኤተሮን ልግቤ ለልዮ ምስክርን ፎሊን እክ አሳባተ ገዉስ ለሊሾስ፤ ሸይሉ በር ዊመ ለለንስ መገን ዋምነትተኔሃ ጠወዕዮስ።

4 መቼ ወክት እሳን ሜጡብ እተንለከ አገን ሄዕዮ ወክት ኢስ «እን ኩሎንክዕኔ አኑኤ ኣሴ ላገተ አገሬ ቤሉ ዬሩሳሌሚኝ ፋልቶኖቹ፤

5 መስንትስ ያህይ ዊን ጠመቆ፤ እኩጎሬ አዕኑ ቀወ በሬኝ ኤተሮን ጠሊላ አያኒን ጠመቀንቴነንተ» ይ አዘዣስ።

ኢስ ሰማ ኦሮኡስ

(ማር. 16፡19-20፤ ሉቃ. 24፡50-53)

6 እስን ሜጡብ ጭምይቶሀኔን «ቀርኝ! ዋምነቱክ እስራኤሊሃ ፈንቀሽት ኣታንት ወክቱ ቴሶትንዶ?» ይት ጠዕምቶስ።

7 ኢስን ፈንቀሽ «እኑ መገኑ ገይሰ ዋልቃን ዬ ወክትለከ በር አዕኑ ደጎኖተ ኣታልቴነንተበኣ።

8 ጠዉ እኩጎሬ ጠሊሉ አያኑ ክዕኔ አሌን ድሬ ወክት ዋልቀተ ደእቴነንተ፤ ህክ ወክት ዬሩሳሌማን፥ ይሁድ ኡላን ጉዕማን፥ ሰማርያንለክ ኡላ ዳንገ ኢላ ምስክር እኬነንተ» ዬእ።

9 ህካን ጠወዕዮኝ ኤተሮን እስን ለአንስ አሌ ዋል ሰማሃ ኦሮዕዮ፤ ጎመንት እሌትስ ቴልቶቤቺሃ ለኦስበኣ።

1:1 ሉቃ. 1፡1-4። 1:4 ሉቃ. 24፡29። 1:5 ማቶ. 3፡11፤ ማር. 1፡8፤ ሉቃ. 3፡16፤ ያህ. 1፡33። 1:8 ማቶ. 28፡19፤ ማር. 16፡15፤ ሉቃ. 24፡47-48። 1:9 ማር. 16፡19፤ ሉቃ. 24፡50-51።

10 እስን አሌ ዋል ኦርአን እስ ሰማሃ ቱክ ይት ለአንን ዋጁተ ኦድኑተ ኦደኑ ለም መናከት መደስ ኡርት፡

11 «አዕኑ ገሊለ መኑ ሚሃት ሰማ ዋሽቴን ለኤነን ኡርቴንታኦ? ኩ ሰማ ኦርአን ለኤነተስ ኢስ ሰማ ኦርአን ለኤነንስን ፈንቀል አሜተኖ» ይቶሰ።

ይሁድ ቤቸን ማትያስ መጠረሙስ
(መዝ. 109፡8)

12 ህከኒቶ ኤተሮን እስ ደብረ ዘይተ ዬኖ ቆታች ዬሩሳሌም ከተመ ፈንቀልቶኡ፤ ሁኩንን ዬሩሳሌሚች አበ በሬን ሃሞኖተ አታሌኖ ዋቄሃ ጌሰ።

13 ዬሩሳሌመ አሜት ሄኦ ፋቅ ምኒ አሌ ክፍል ፋልቶኡ፤ እስን «ዴጥሮሴት፡ ያህዪት፡ ያቁባት፡ እንድራሴት፡ ፍልጾሴት፡ ቶማሴት፡ በርቴሌሜዎሴት፡ ማቶሴት፡ እልፍዮሴሃ ቤቱ ያቁባት፡ ባዱስ ኢተኖ * ሰሞኔተለከ ያቁብሃ ቤቱ ይሁዳት።»

14 ሁኩ ጉዕሙንኩ ኢስ አማን መርየማን፡ ለቤ አመስ ኦሪንለከ ዋሎ ሜንቲን ሜጡበ መቶሃ ቀልቢን ኡርሱዕናን ዱኦ አታኢት እቅ።

15 ህከ ወክት ዴጥሮስ መት ጥብተ ለሞድም ጌሰ እሀኖ አመዕናኖ ጭምት በላን ኡር

16 «አመኤ ኦሶ! ኢስ አፎ መኒሃ አዎንሳንቹ እኮ ይሁድተኔሃ ጠሊሉ አያኑ ሄጫን ደዉዴ አፎን ጠወአንቶ ጠሊለ መጻፍ ላገት ዊሙ ሀስሰኖሴ።

17 ይሁድ ከን ሆኅ ቤቀማንቹ እሆተ ኒንን ሜጡበ ዋለአሞኤ እቅ።

18 ጠዉ እኮጎሬ ሁኩ መንቹ ሂለ ሆኅስ ብሪን ኡለተ ህዕሬእ፤ እስን ብርተ ዋል ጎምብስም ኡባን ጎደቡስ ፍልተዕያን ህሌስ ፋልቶኡ።

19 ሁኩ ጠዉንኩ ዬሩሳሌማን ሄኦ መንቤቸን ጉዕማንን ለሊእ፤ ህከን እኮቤቹሃ ሁኩ ቤቹ እስ አፎን «አኬልዳመ» ዬን ገኤመ፤ ፍሳረንትስ «ቄግ ኡለተ» ዩሃን።

20 ሁኩን እኮንኩ «ደውድ መጻፋን

«እስ ሄኦ ቤቹ ኦነ እሀን፤

ህከን ቤቸን አዪሁ ሄኡንከ»

ህትን «እስ ሹምነትስ ሆጉተ ዋሉ መኑ ኣኡን»

የመም ከተበሞኡ።

* **1:13** ባዱስ ኢተኖ፡ ማር. ፎሎጭ 3 ዋሊሽ 18 ዮኢሃ ለዕዬ። **1:13** ማቶ. 10፡2-4፤ ማር. 3፡16-19፤ ሉቃ. 6፡14-16። **1:18** ማቶ. 27፡3-8። **1:20** መዝ. 69፡25፤ 109፡8።

21 «ህካን እኮቤቺሃ ቀርቼ ኢሰ ኒ በላን ፈንቀላመን ሄዕዮ ዘማን ጉዕመንከ ኒን ሜጡብ ሄኦህኩኡች

22 ህትን ያህይ ጥምቀቲች ኬሽ ቀርቼ ኢሰ ሰማሃ ኦርዕዮ በር ኢለ ኒን ሜጡብ ህከን መኒች መቱሰ ኒን ሜጡብ ኬእሀሰ ምስክር እሆተ ሀሰሰኖ» ዬእ።

23 «ኢዮሰጦሴ» ህከረንገ «በርሳባሴ» ዬኖ «ዩሱፈለከ» «ማትያሴ» ዬኖ ለሙ መንቹ ቅጥአቶኡ።

24-25 እሰን ዱኦ አተን «መን ቀልብ ጉዕመንከ ደጋንት ቀርቻ! ከን ለምችሰ አዬሰ መጠርቶንት ጎር ይሁድ አጉር ሬዮ ክድመተለከ ሶቀም ሆጉተ ቶግ ቤችሰ እሀኖሃ ለሊሶኔታት» ይቶኡ።

26 እጠ ኡጄናን እጡ ማትያሴሃ እሌእ፤ ህካን እኮቤቺሃ እሰን ቶና መቶንከ አሳባን ሜጡብ ዋለአሞ።

2

ጠሊሉ አያኑ አሳባሰሰ አሌን ድሩሰ

1 ጳንጤቆስጤ ከበጃት ዬን ከበጃኖ ከበጀ ወክቱ እሌ ወክት አሳባሰሰ ጉዕመንኩሰ መቶ ቤችን ጭምይቶ እቅ።

2 ድንገቴን ጠረኘ ሶብርገ ዮ ላገት ሰሜች አሜት እሰ አፋዕልቶ ምኒ ዊሞ።

3 ህከንቤችንን ገረ ለበነተ አጉደኖ መት-መት አረብት ለልቶሰ፤ እሰን ቤቀንት መት-መትሰ አሌን አፋዕልቶኡ።

4 ጉዕመንኩሰ ጠሊሉ አያኒን ዊንቶኡ፤ እሰን ጠሊሉ አያኑ አዕዮሰገን ዋሎ አፎን ጠወኡ ጀመርቶኡ።

5 ኣዱንያ አሌን ዮ ኡመቲች ጉዕሚችን አሜቶ መገኑ ዋጅታ አይሁዱ ዬሩሳሌማን ሄኦኢት እቅ።

6 ህከ ላገተ ሞጮጭቶ ልግቡ መኑ ጭምይት አሜቶኡ፤ እሰን መት-መቱሰ ገይሰ አፎን ጠወኡን ሞጮጭት አጀብሲጭቶኡ።

7 ሁኩ መኑንኩ አበ አጀብሲጭት «ኩሩ ህት ጠወኦእሩ ጉዕመንኩ ገሊላ መነበእንደ?

8 ነኡ ገዉኔ ከለቀሞም ባድ አፊን ጠወኡን ሞጮጭናሚሁ ኩን መርቹሃን?

9 ነኡ ጳርቴ ባድ መኑሁ፥ ሜድ ባድ መኑሁ፥ ኤላሜ ባድ መኑሁ፥ መስጴጦም ባድ መኑሁ፥ ይሁድ ባድ መኑሁ፥ ቄጳዶቅ ባድ መኑሁ፥ ጳንጦስ ባድ መኑሁ፥ እሰይ ባድ መኑሁ።

10 ፍርግ ባድ መኑሁ፥ ጽንፍል ባድ መኑሁ፥ ግብጽ ባድ መኑሁ፥ ሊብይ ባድን ቁሬን ከተሞ መዴን ሄዕኖሞሩ፥ ርሞ ባዲች አሜንቶሞ አይሁዱለከ አይሁድ አዳ ዶረሞሞሩ ዮሞ።

11 ህትን ቀርጤሰለከ አረብ ባድ መኑሁ መገን ሎረ ሆጉተ ገይኔ አፎን ጠወአን ሞጮጭናሚት» ይቶኡ።

12 ህካን እኮቤቺሃ ጉዕሙንኩ እጀብሲጭትለከ ይታኢሃ ሆግ መት-መቱሰ «ኩ ጠዉ መርቹሃን?» የቀንታኢት እቅ።

13 ጠዉ እኮጎሬ ዋሉሰ መኑ ቀለደን «ሰከርሰኖ አጌኖሃ አግ ሰከርቶኡ» ይቶኡ።

ጴጥሮስ ጠወዕዮገ

14 ህከ ወክት ጴጥሮስ ቶን መቶንከ አሳባን ሜጡብ ኡር ላገሰ ጎት አዕይ «አዕኑ አይሁድ መኑለከ ዬሩሳሌማን ሄኤነንተሩ ጉዕሙንኩ ከ እኮ ጠወ ደጎኖተ ጠወአሚሃ ሞጮጭዬ።

15 ክዕኔሃ አመሰሎህዕኔ ቤሉ ኩ መኑ ሰከርበአ፤ መሰንትሰ ቴሱ ገሰሜ ሰሶሃ ሰኣት።

16 ጠዉ እኮጎሬ ኩን ነብዬቾ ኢዮኤላን ህት ይ ጠወአሞ ጠዉ ዊሞታት።

17 « እሰን መገኑ

መጨረሽ ዘመኔን ህት አሀኖ፤

መናን ጉዕማንን፤

ጠሊለ አያኒችኤ አሌሰ ዱናሞ፤

ጎኑለከ ሜኣ ኦሱክዕኔ ራገ ጠወኣአ፤

ዋደለት መናመተ ለኣአ፤

ባልቀንት ሀቂተ ሀቃቅታአ።

18 ህትን ህከ ዘመን ለቤለከ ሜንት ካዲመኤ አሌን

ጠሊለ አያኒችኤ አሌሰ ዱናሞ፤

እሰን ራገ ጠወኣአ።

19 አን እጀብሲሰኖርቹ ሰሜ አሌን

መላተ ኡለ አሌን ለሊሳሞ፤

ቄጉ፥ ጊረትለከ ዉሊሌ ጎመት እካአ።

20 ሎሩለከ እጀብሲሰኖ ቀርቾ በሩ አሜቱዕናን ሄጭ

አሩ ቱንሰቹ አሀኖ፤

አገንቹንኩ ቄጉ አጉደኖ።

21 ቀርቾ ሱዕመ ገአኖሁ አዪሁ ጡመኖ፤

22 «እስራኤል መነ! ተ ላገተ ሞጮጭዬ፤ አዕኑ ገዉንኩክዕኔ ደጌነንተገን ናዝሬት ኢሰ መገኑ በላንከክዕኔ እሰ አዲን አዕዮ

ሎርሎረ ሆጎን፥ አጀብሲሰኖ ጠዊንለከ መላን መገን አዲን ክዕኔሃ ለልዮአሃ መንቺ እቅ።

23 እሱንከ መገኑ ሰውይ ቅጥአዕዮ ሰውቲንለከ ዋዕናንከ ዮሰ ኤንኬዕኒን ክዕኔሃ ህግሴን ኣሴመ፤ አዕኑን ሕጉ ዮበእ መን አንጋን ሰቀለመኖገለከ ሪሆኖገ አቲንተሰ።

24 ጠዉ እኮጎሬ መገኑ ሪሆ ኦርሸተ ቤሽ ሪሆኝ ኬሾሰ፤ መሰንትሰ ሪሁት እሱ እፍ ፌሶተ አታልቶበእ።

25 ደዉድ እሰተኔሃ
« ቀርቼኤ ጉዕመ ወክት ብሬንከኤ ለኣሞ፤
መሰንትሰ ጨነቀሞበገ እሰ መኬንተኤ እኮቤቺሃ
አን ሌንቄቃሞበእ።

26 ህካን እኮቤቺሃ ቀልቡኤ ሙንደዕዮ፤
አረብንትኤ ሙንደእ ጠወኣእ፤

ህትን ሪሆኖ ጅሰሙኤ ተብሴን ፎሎጨኖ።

27 መሰንትሰ ፎልኤ ሬዮ መን በላን ሎድ ኣዜን አጉርታንትበእ፤

ህትን ጠሊሊ እኮሃ ሎዳን ሸሞ ፈቆተ አታንትበእ።

28 ቲሱ ሄእ ወቃሃ ለልሶንቲኤ፤
ኢን ሜጡ እሆንከክ ሙንዲኑኤ አበ እካእ፤

29 «አመኤ ኦሶ! ወዕኔ ኢን እኮ ደዉድ ሬዮገ፥ ሞገሞገለከ ሎዲንኩሰ ከበሬ ኢለሬተ ኒቤቺን ሄኡሰ ለሊሽ ኩላንክዕኔ።

30 ጠው እኮጎሬ ዳዉድ ካን ጠወዕዮንኩ ነብዬቺ እኮቤቺሃ መገኑ ሐገፍክ መቲሰ ኬዕሞኝክ ቦርጭመ አሌን አፋሻሞ፥ ይ ጤሌዕል ኣሴ ተብሴ ላገተ ደገኖሃ እኮቤቺሃት እቅ።

31 ህከን መሳን መሲሁ ሬዮ መን በላን ፈቀኖበእገለከ ማሉሰ ሎዳን ሸሞ በእበገ ሄጭ ለዕይ መሲሁ ሪሆኝ ኬእተኔሃ ጠወዕዮ።

32 ህከ ኢሰንከ መገኑ ሪሆኝ ኬሾሰ፤ ህከን ጠዊሃ ነኡ ጉዕሙንኩኔ ሞሰክረታን።

33 መገን መኬን አፋዕሎተ አሌ ዋል ጠሊሊ አያን ተብሳሃ መገኒቶ ቶገ ከ ለኤነንተለከ ሞጮጭቲነንተ ጠሊሊ አያን ዲቺ።

34-35 ደዉድ ሰማሃ ኦርዕዮበእ፤ ጠዉ እኮጎሬ እሰ

« ቀርቼ ቀርቼሃኤ
ባለጋረክ ሎካቶክ ዋሮን አኦተ ኢሊ
መኬንከኤ አፋዕል » ይ ጠወዕዮኡ።

36 «ቲሱ መገኑ ከ አዕኑ ሰቀልቲንተ ኢሰ ቀርቼለከ ቡረሞኢሃ አዕዮሰገ እሰራኤል አድ ኡመቲ ጉዕሙንኩ ጠረኝሽ ደጉን» ይእ።

2:23 ማቶ. 27፥35፤ ማር. 15፥24፤ ሉቃ. 23፥33፤ ያህ. 19፥18። 2:24 ማቶ. 28፥5-6፤ ማር. 16፥6፤ ሉቃ. 24፥5። 2:30 መዝ. 132፥11፤ 2 ሳሙ. 7፥12-13።
2:34-35 መዝ. 110፥1።

37 እሰን ህካን ሞጮጭቶ ወክት ቀልቡስ ሻዞን ዊማን ጴጥሮሴለክ ዎሉ ሶቀማኑተ «ኒ አመኦሶ! መ አዕኑ?» ይት ጠዕምቶኡ።

38 ጴጥሮሴሰን «ጩቡክዕኔ አጉረሞተ ጩብክዕኔ ቶበቴን መት-መቱክዕኔ መሲህ ኢስ ሱዕሚን ጠመቀሚ፤ መገን አስቱተ እኮ ጠሊሊ እያነ ቶጌነንተ።

39 ተብሴስ ላገት ክዕኔሃትለክ እላተክዕኔት፤ ህትን መገኑ ቁዕራሺች ገኤሀኑታት» ይሰ።

40 ጴጥሮሴሰን ዎሉ ልግብ ጠወ መስከረን «ከን ሾከ ክልቀቲች ገዉክዕኔ ጡምሼ» የን ሸዦሰ።

41 ህካን እኮቤቺሃ ላገስ ቶጎእሩ ጠመቀንቶኡ፤ ህከ በር ሰሱ ኩምተ እካ መኑ እሳን ሜጡበ እኮ።

42 እሰን ሶቀማኑት ተማርሰታኢሃ ሞጮጭተን ሜጡበ ሄእን እቸተ ሜጡበ እተንለክ ዱእ አተን ጠረኝታኢት እቅ።

አመዕናኑት ሜጡበ ሄኡስ

43 ህከ ወክት አሳበ አንጋን ልግቡ አጀበተለክ መላት እካቤቺሃ መኑ ጉዕሙንኩ ዋጃእ።

44 አመዕናኑት ጉዕሙንኩ ዮሰርቹ ጉዕመንከ ሜጡበ አት ሄኣኢት እቅ።

45 ህትን ኡለሰለክ ዮሳሃ ጉዕመንከ ህርተን ብረስ መት-መትንከ ሀሰስኖስ ጌስ ቤካኢት እቅ።

46 ጉዕመንከ በር መቶ ቀልቢን መገን ሞኔን ጭም ይተን መት-መትስ ሞኖን እቴኖሃ መንዲኖንለክ ጡመ ቀልቢን ሜጡበ እታኢት እቅ።

47 እሰን መገኑ ገለትጭታኢት እቅ፤ ህትን ጉዕሙንኩ ከበጀኖሳት እቅ፤ ቀርቹንኩ በሬን በሬን አመዕንት ጡምታ መነሃ በርገኖሳት እቅ።

3

ናፋ መንቹ ፈዩስ

1 መቱ በር ጴጥሮሰለክ ያህይ ዱእ አኤኖ ወክቴን ዱእ ሞኒ መርታኢት እቅ፤ ሁኩንን ሆንሶሃ ሰኣት እቅ።

2 ህከኔ «ምልካምተ» ይኖ ዱእ ሞኒ ኡሮን መኑ እጅ ጉዕመንከ በር ኤበኖ መቱ መንቹ ሄዕዮ እቅ፤ እሰን አመስ ጎደቢች ኬሽ ናፈ እኮቤቺሃ አፋሺኖሲሁ ዱእ ሞኒ ኣገኖ መኒች ሰደቀተ ኡጮታት እቅ።

3 እሰን ጴጥሮስለከ ያህይ ዱእ ምኒ አጎተ አሜቱስ ደጎ ወክት ሰደቀተ አቶስተ ኡጩሰ።

4 ጴጥሮስ ያህይንን ሜጡበ ህከ መንቹ ቱክ ይ ለዕይ «ኒ አደ ለእ» ይእ።

5 እሰን ሰደቀተ አታሲሃ አጉጃንሰ እሰበ ለዕዮ።

6 ጠዉ እኮጎሬ ጴጥሮስ «ብሩለከ ዋርቁ ዮኤበእ፤ እኮጎሬ ኤሳሃ ዮኤሃ አሳንኬ፤ ሁኩንን ናዝሬት መሲህ ኢስ ሱዕሚን ኬእ ሃም!» ይሰ።

7 እሰን መኬስ አንገተ አፍ ኬሾስ፤ ህከ ወክት ሎከሰለከ ሴዝ ምቁስ ጠረጌእ።

8 ሾት ይ ኡሬእ፤ ህትን ሃሙንከ ጀመር፤ ህትን ሃመን፤ ቱጵ-ቱጵ የንለከ መገን ገለትጨን እሳን ሜጡበ ዱእ ምኒ አጎ።

9 እሰን መገኒሃ ገለት አሰንለከ ሃመን መኑ ጉዕሙንኩ ለዕዮስ።

10 ህትን «ምልካምተ ኡሩተ» ይኖ ዱእ ምኒ ኡርን አፋዕል ሰደቀተ ኡጩኖሃ እሁስ ደጎቤቹሃ እሲን እኮ ጠዊቶ ኬዕይ መኑ አበ አጀብሲጩእ።

ጴጥሮስ መገን ምኒን ጠወዕዮገ

11 ሁኩ ፈይ መንቹንኩ ጴጥሮሴቶለከ ያህይቶ መለዕለሙ ግብ አንገሰ አፍ ሂዕዮገን መኑ ጉዕሙንኩ ሜጡበ እክ አጀብሲጩን እሰቤቹ ደጉደን «ሱለይማን ሃመኖ ዋቃሃ» ይኖቤቹ አሜቶኡ።

12 ጴጥሮስ ህካን ለዕይ መኒሃ «እሰራኤል መነ! ከኒን ሚሃ አጀብሲጩቱነንታት? ነኡ ህትን ገይኔ ዋልቃን ህከረንገ መገኑ ዋጅንከኔ ኩ መንቹ ሃመኖገ አዕኖምሀንገ አቲን ሚሃት ቱክ ይቲን ለኤነንታት?

13 እብራሂም፥ ኢሳቅለከ ያቁብ አናከኔ ሰገዳ መገኑ አዕኑ ህግሴን አቲንተለከ ጵላጦስ ሂሮስተ ሀሾ ወክት ጵላጦሴ ብሬን ለገኤንተ ቤቱስ ኢስ ከበጄስ።

14 ጠዉ እኮጎሬ አዕኑ ጠሊለለከ ፈየ እኮሃ ግቤን መነ ሼ መንቹ ሂረሞሀዕኔተ ኡጩቱንተ።

15 ሄኡ አሰኖሃ ሽቲንተ፤ እኮጎሬ እሱ መገኑ ሬሆቶ ኬሾስ፤ ህከን ጠዊተኔሃ ነኡ ምስክርሃን።

16 ኩ ለኤነንተለከ ደገነንተ መንቹ ፈይ ጠረጌኢሁ ኢስ ሱዕሚን ደገሞ አመዕነቲኒት፤ ኢስ ሱዕሚን አመዕኒከስ ጉዕሚክዕኔ ብሬንን ዊመ ፈይመተ ደኤእ።

3:13 ፋል. 3፡15። 3:14 ማቶ. 27፡15-23፤ ማር. 15፡6-14፤ ሉቃ. 23፡13-23፤ ያህ. 19፡12-15።

17 «ቴሁ አመኤ ኦሶ! አዕኑ ኢሰ አሌን አቴንተ ጠዉ ሹመክዕኔገን ደጉ ሆጊን አቴንተገ ደጋም።

18 ጠዉ እኮጎሬ መገኑ ሄጭ ነብያኖ አፎን ለመሲሁ ኦርሸተ ቶገኖ ዬ ላገት ከን ሃለን ዊንታገ አዕዮ።

19-20 ቴሱ ቀርቺች ሃዕሮ ወገሬት ዘማኑ አሜቶተ ዋዕናንከ መጠሮ መሲሁ ሶሆተለከ ጨብክዕኔ መገኑ አጉሮተ ቶበቴን ፈንቀሌ።

21 መገኑ ወዕኔችን ኬሽ ጠሊላኖ ነብያኖስ አፎን ጠወዕዮገን ኣዲንያ አሉ ጉዕሙንኩ መኮተ ኢለ ኢሰ ሰማን ዲንኩ ሀሰሰኖ።

22 ሙሰ ቀርቺ መገኑ ኤሳሃ ኬሾሀንገን አመክዕኔ ኦሶች ነብዬቹ ኬሰኖሀዕኔ፤ እሰ ኩለኖሀዕኔሃ ጉዕሙንከ ሞጮጭዬ።

23 ሁኩ ነብዬቹ የኖሃ ሞጮጭ ግበኖሁ ጉዕሙንኩ መኒች አደ እክ በአኖ ዬእ።

24 ህትን ሳሜሊች ኬሽ እሲች ኤተሮን አሜቶ ነብያኑት ጉዕሙንኩ ከን ወክትተኔሃ ጠወኦኡ።

25 አዕኑ ነብያኖተ ረገኣኑታን፤ ህትን መገኑ አብራሂሚሃ ላዲንያ አለ መኑ ጉዕሙንኩ ኪ ዘሬን ማሰአመኖ ይ ወዕኔ አናካተክዕኔ ሜጡብ ኣጎ ወኣድ ላገተ ረገኤንተረ።

26 ህካን እኮቤቺሃ መገኑ ቤቱሰ ኬሽ ሶኮሁ ሄጭ ክዕኔሃት እቅ፤ ህካን አዕዮሁ መት-መቱክዕኔ ሂለ ዋቄች ፈንቀልቴናን ማሰኦሀዕኔታት» ዬእ።

4

ጴጥሮሰለከ ያህይ አይሁድ ኦገት ባሊቀበ ሆንጠሁሰ

1 ጴጥሮሰለከ ያህይ ኡመቲሃ ጠወኣንን ቂስትለከ ዱእ ሞኒ ዘበኛኖ ሀለቅቹ ህትን ሰዱቃውት እሰቤቹ አሜት *

2 ለሙንኩ አሳበት ኢሰ ሬሆች ኬኡሰ ኡመቲሃ ተማርሲንከሰለከ ሀከኒንገን ሬሆች ኬኡ ኩልቶቤቺሃ ኡሙዕርቶኡ።

3 ህካን እኮቤቺሃ አፍሰ ኡለት ሀዋርቶቤቺሃ ሶዞተ ኢለ ኡሱር ሞኔን አገርታገ አቶሰ።

4 ጠዉ እኮጎሬ ላገሰ ሞጮጭቶ መኒች ልግቡሰ አመዕንቶኡ፤ አመዕንቶ ጎን ዋሊንሹ ኦንቶ ኩሜ ጌሰ በተዕዮ።

5 ለንክሰ በር ይሁድ ዳኛኑት፥ ባልቀትለከ ሕግ አሰተማረት ዬሩሳሌም ከተማን ጭምይቶኡ።

3:22 ዘዱ. 18፡15፤ 18። 3:23 ዘዱ. 18፡19። 3:25 ክል. 22፡18። * 4:1 ቂስ፡- የኖሁ መት-መቱ ሉህ ክታበት «ቂስ አዋንሳኑተ» ይታእ።

6 ህከን ጭምዶቶ መን በላን ሎሩ ቂሰቹ ሃነ፥ ቀያፍ፥ ያህይ፥ እስክንድሮስለከ ሎረ ቂሰቹ አበሮሱ ጉዕሙንኩስ ሄኑኤ።

7 እስን ጴጥሮሴለከ ያህይ በላንከስ ኡርስ «አዕኑ ከ ጠወ መ ወልቃን ህከረንገ ክዬ ሱዕሚን አቴነንታት?» ይት ጠዕምቶኤ።

8 ህከ ወክት ጴጥሮስ ጠሊሊ አያኒን ዊም «አዕኑ ኡመት ገሻኑትለከ ባልቀት ሞጮጭዬ።

9 ኔሳሃ ከበር ጠዕሚኖኔሁ መቶ ናፎ መንቺሃ እኤመስ ጡመ ሆጎተኔሃለከ ኩ መንቹ ሀት እክ ፈዩሲት።

10 ኩ መንቹ ፈይ ብሬንከክዕኔ ኡሬኢሁ አዕኑ ሰቀልቴንተለከ መገኑንገ ሬሆች ኬሾ ናዝሬት መሲህ ኢስ ሱዕሚን እሁስ ክዕኔሃ ጉዕሚንከክዕኔለከ እስራኤል ኡመቲሃ ጉዕሚንከ ደገሞሃ እሁን።

11 አዕኑ ግምብ እጃርቴንተሩ ህንቄን ኡጅቴንተ ክኑ ግምብስ ሙረበ ቡዕል ክኑ እኮ።

12 ህካን እኮቤቺሃ ጡሙ ዋሎን አዩኒ ዮበክ፤ ጡምኖተ መን በላን ኡለ አሌን ጉዕማንን ዋሎ ኣሰሞ ሱዕሙ ዮበክ» ይቶሰ።

13 ጴጥሮስለከ ያህይ መለልት ጠወኣገ ኦገት መኑ ለኦ ወክት ተማርቶበእ ገወ መነ እሁስ ደግ አጀብሲጭቶኤ፤ እስ ኢሲን ሜጡብ ሄኦእረ እሁስ ደጎኤ።

14 ሁኩ ፈዬ መንቹ እሳን ሜጡብ ኡሬኢሃ ለእ እስ አሌን ይታኢሃ ሆጎኤ።

15 ጠወ እኮጎሬ ህከን ኦገት በሊች ፋልታገ አት ገገዉንኩስን

16 «ከ መነ መ አዕኑ? ሎረ መላት እስ አንጋን እስንታኢሃ ዩሩሳሌም መኑ ሄኦ ጉዕመ ቤቾንን ደገሞቤቺሃ ካንዶተ አታልናምበኦ።

17 ጠወ እኮጎሬ ኡመት በላን አልባዕሊን መረኖበኣገ ከኒች ኤተሮን ከን ሱዕሚን አዩሃ ጠወኣበኣገ ጠረኝንስ ዋጅሲንሶ» ይት አማዕለንቶኤ።

18 ህከኒች ኤተሮን እስተ ገኦት ኢስ ሱዕሚን ሆሮን ጠወኣበኣገለከ ተማርስታበኣገ አዘዞኤ።

19 ጠወ እኮጎሬ ጴጥሮስለከ ያህይ ፈንቀሸት «መገን ትዛዝ ቶጉ ህከረንገ ክዕኔ ትዛዝ ቶጉ መገን እኔን ቆሆኖ እኮጎሬ ህንዴ አዕኑ ፈረጄ።

20 ነኤ ሞጮጭኖሚሃለከ ለዕኖሚሃ ጠወኤ አጉሩ አታልናምበኦ» ይቶሰ።

21 እሰን ጴጥሮሰለክ ያህይ ቀጠእሲሰኖ ጠወ አሌሰ ሆንቤቺሃ መነ ዋጅት ለንኪሃ ዋጅሲሰ ገፈርቶሰ፤ መሰንትሰ መኑ ጉዕመንኩኩ እኮ ጠውተኔሃ መገኑ ገለትጭታኢት እቅ።

22 ከን እጅብሲሰኖ ዋቄን ፈዬ መንቹ እለሞች ሸይሎ ዘማኒኝ በተዕዮሰ እቅ።

እሳበትለክ አመዕናኑት ሸረንቶ ወክት አቶ ዱአ

23 ጴጥሮሰለክ ያህይ ሂረንቶች ኤተሮን ጃለሰቤቹ መርት ቂሰ አዋንሳኑትለክ ባልቁ ይቶሰ ጠወ ጉዕመንክ ኩልቶሰ።

24 እሰን ህክ ጠወ ሞጮጭቶ ወክት ቀልብሰ ሜጡ አት ላገሰ መገን ቤቹ ኬሰ «ሰማሃ፡ ኡለተ፡ ባረለክ ኣዜንከሰ ዮኣረ ጉዕመንክ ከለቆንት ቀርቻ መገኖ!

25 ጠሊሊ አያሊን ካዲንቸንተክ አናኔ ደዉዴ አፎን
« መገኑ ደግቡ መኑ ሚሃ ኡመዕሬእ?
መኑ ሚሃ ደግለልበ ጠወ አቶተ ሰውይቶኡ?

26 ኡለ አል ዋመት ኬእ
ህትን ገሻኑት ሜጡበ ጭምይት
ቀርቻለክ መሲህ አሌን ኬኦኡ ይት ጠወኦንት መገኑ አቴት።

27 «ህንቅንክ ዋሙ ሄሮዲሰለክ ጳንጦሰ ባድ ጳላጦስ፡ አይሁደ እህበ መኒንለክ እሰራኤል መኒን ሜጡበ ከን ከተማን ጭምይት መሲሁ ኣቶንት ጠሊሊ ካዲንቸንተክ ኢሰ አሌን ኬኦኡ።

28 ህት እኮሁ አት ሄጭት ገይክ ዋልቃንለክ ሃሸኣቶን ሰውይቶንቲሃ አቶታት፤

29 ህትን ቀርቻ! ፎከሩሰ ለእ፤ ካዲመክ ላገክ ዋጅቱዕናን መለልት ጠወኣገ እእሰ፤

30 ጠሊሊ ቤትክ ኢሰ ሱዕሚን ጥዘናመት ፈይቶተ፡ አጅበተለክ እጅብሲሰኖ ጠወ አሰሞተ አንገክ ሂር» ይተን ዱአ አቶኡ።

31 እሰን ዱአ አቶች ኤተሮን ጭምይቶ ቤቹ ሌንቄቄእ፤ ጉዕመንኩሰ መገን አያሊን ዊንቶኡ፤ መገን ላገተ ዋጅቱዕናን መለልት ጠወኦኡ።

ዋዕኔ አመዕናኖ ሄእተኔሃ

32 መገን መኑ ጉዕሙንኩ መቶ ቀልብንለከ ሰውቴን ሄኑኡ፤ እኩስ መንቹሁ «ኩን ኢሃን» የኖርቹ የበእ እቅ፤ በላንከሰ ጉዕሙርቹንኩ ቅጤሳሃ እቅ፤

33 አሳበት ቀርቹ ኢስ ሬሆች ኬኡስ ሎረ ወልቃን መስከርታኢት እቅ፤ ጉዕሞስ አሌኒን ሎረ መገን አያኑ ሄዕዮ እቅ።

34 እስ በላን ኦርጨቀሞሁ መቼሁ የበእ፤ መሰንትስ ኡለት የሲሁ ህከረንገ ሞኑ የሲሁ ጉዕሙንኩ ህረን ብረ ኤበኖት እቅ።

35 ህከ ብረ ኤበን ሶቀማኖ ብሬን አፋሽተን አዬሁ ሀሰሰኖስ ጌስ ቤሄንን ኣሴኖሲት እቅ።

36 «ቆጵሮስ» ዬኖ ባድ መቼ መንቹ ሌዌ አዲሁ «ዩሱፈ» ዬኖሁ ሄዕዮ እቅ፤ እሱንከ ሶቀማኑት «በርናባሴ» ይት ገእታስ እቅ። ህት ዩሁ «ቦረሸተ ከመኖሃ» ዩሃን።

37 ሁኩ መንቹንኩ ኡለስ ህር ብረሰ ሶቀማኖተ ቶግሰሾስ።

5

ሀናንየለከ ሰጺረተኔሃ

1 መቼ «ሀናንየ» ዬኖ መንቹ «ሰጺረ» ዬኖ መንቹንከሰን ሜጡበ ኡለተ ህር።

2 ጠዉ እኮጎሬ ሞንሰ መንቹሰ ደገን ኡለስ ህር ብሬች መቼ ጌስ ፊሽ ፈቆስ ጌስ ኤብ አሳባተ ቶግሰሾስ።

3 ጴጥሮሰን «ሀናንየ! ጠሊሊ አያን አሌን ክዘቦተለክ ኡለተ ህርቶንት ብሬች መቼ ጌስ ፊሶተ ሼይጣኑ ቀልቤንከክ ሚሃ ኣጎ?

4 ህርቱዕነ ዎዕናሃ ኪሃበእንዶ? ህርቶንቲች ኤተሮኒሁ ብሩስ ኪሃበእንዶ? ከ ጠወ ሚሃ ቀልቤንከክ ሰውይት? ኣት ክዘቦንቲሁ መነ እሁዕነ መገኑሃት» ዬሰ።

5-6 ሀናንየን ህከ ላገተ ሞጮጮ ወክት ኡብ ሬዮ፤ ዎደለት ኬእ ከፈንት እጅት ፋሽት ሞጎሰ፤ ህከ ጠወ ሞጮጭቶእሩ ጉዕሙንኩ አበ ዋጅቶኡ።

7 ሰሱ ሰኣት እህኖ ወክቲች ኤተሮን እኮ ጠወ ደጉዕነ መንቹሰ አሜት ኣጎኡ።

8 ጴጥሮሰን እሴተ «ህንዴ ኩሌኤ! ኡለክዕኔ ህርቱንታሁ ከን ጌስ ብርሃትንዶ?» ዬሴ፤ እሴን «ኤ! ከን ጌሲሃንት ህርኖሚሁ» ይቶኡ።

9 ጠዉ እኮጎሬ ጴጥሮሰ «ቀርቹ ጠሊሊ አያኒን ፊተንቶኖተ ሚሃ አማዕለንቱን? ሞንክ መንቹ ሞጎ መኑ ኡሮን ዮኡ፤ ኬሳሁ ፋሽት ሞጋሄ» ዬሴ።

10 ወክትንከሰ ሎከሰ መዳን ኡብ ሬቶኡ፤ ዋደለት ኣጋ ወክት ሬቶኢሃ ለእ መሰት ሞንሴ መንቶ ሎድ መዳን ሞንሴ።

11 ህካን እኮቤቺሃ አመዕናኑት ጉዕሙንኩለከ ህከ ጠወ ሞጮጮ መኑ ጉዕሙንኩ አበ ዋጃእ።

አሳበት አቶ አጀብሲሰኖ ጠወለከ አጅበተ

12 አሳበት ልግብ አጅበተለከ አጀብሲሰኖ ጠወ መን በላን አታኢት እቅ፤ ጉዕሙንኩ መቶ ቀልቢን እክ «ሱላይማን ሃመኖ ዋቃሃ» ዩኖቤቸን ጭምዶቶኡ።

13 ዋሉ አዪሁ እሳን በርገሞተ መለሎበክ፤ እኮጎሬ መኑ ከበጀኖሳት እቅ።

14 እሁን ቤሉ ቀርቾን አመዕንቶ ጎንለከ ሜንት ዋሊንቹ ብሬቶ አበ በተእን መረኖ እቅ።

15 አሳበት አቶሀኒቶ ኬዕዮሀኒን ጴጥሮስ ህገን ዋሉ ፈቅ ሀሎስ መት-መቶ መን አሌን ኢሎተ መኑ ጥዘናመተ ዋቃ ፋሽን መዕነ አሌንለከ ዴስ አሌን ኦሲሳኢት እቅ።

16 ህትን ዩሩሳሌም አዝጋጌን ሄኦ ከተሚቶ ጥዘናመተለከ ዶሮረኖ ዱሩ አፋንሰ ኦርጨቀንታኦረ ኤቤናን ልግቡ መኑ ጭምየኖት እቅ፤ እሰ ጉዕሙንኩሰ ፈይታኢት እቅ።

አሳበተ ሸሬመሰገ

17 ጠወ እኮጎሬ ሎሩ ቂሰቹለከ እሲን ሜጡብ ሄኦ ሰዱቃዊ አድ መኑ ሞቀኝት አሌስ ኬኦኡ።

18 አሳበተ አፍ ኡመት ኡሱር ሞኒ አግሶኡ።

19-20 ጠወ እኮጎሬ ቀርቶ መላይኬቹ ኡሱር ሞኒ ኡሩተ ሀዋሮን ፈኝ እሰተ አብል ፋሽ «መሬ፤ መገን ሞኔን ኡርቴን ኡመቲሃ ከ ሄኦ ላገተ ሆርንተ ኩሌ» ዩሰ።

21 ህከ ላገተ ሞጮጭቶ ወክት ሶዘ ሱጽተ መገን ሞኔን አግ ተማርሰታኢት እቅ፤ ጠው እኮጎሬ ሎሩ ቂሰቹለከ እሲን ሜጡብ ሄኦእሩ አሜት ኦገት መገለከ አይሁድ ባሊቅ ጉዕመንከ ሜጡብ ጭምኦት ኡሱረንቶኦረ ኤቦተ ኡሱር ሞኒ ሶኮኡ።

22 ሶሃመ ዘበኙ አሜት አሳበተ ኡሱር ሞኔን ደጎሰበክ፤ እሰን ፈንቀልት አሜት

23 «ኡሱር ሞኑ ጠረኝ ቆለፈሞቤቺሃ አገርታኦሩ ኡሮ ብሬን ኡርቶኢሃ ደንጎሞ፤ ኡሱር ሞኒ ኡሩተ ፈኖም ወክት ኣዜንከሰ አዩሁ ደንጎሞበክ» ይቶኡ።

24 ዱእ ሞኒ ዘብ ሀለቅቹለከ ቂሰ አዋንሳኑት ህካን ሞጮጭቶ ወክት «ኩን መርቾሃን?» ይት ጉረተ አጎሰ።

25 ህከ ወክት መቼ መንቹ አሜች «ሁኩዕኑን! እዕኑ ኡሱር ምኒ አግሴንተ መኑ መገን ምኒን ኡርት ኡመት ተማርሰታኢት» ይ ኩሎሰ።

26 ህከ ወክት ዱእ ምኒ ዘበኝ ሀለቁለከ ካዲመሰ መርት ኤቦኡ፤ ኤቦሳንኩ ዋልቃንበእ፤ ህካን አቶኢንኩ ኡመቼ ክኒን ቀሰኖሰበእገ ዋጅቲት።

27 ኤቦሳች ኤተሮን ኦገት ብሬን ኡርሶሰ፤ ሎሩ ቂሰቹንኩ

28 «ኢሰ ሱዕሚን ተማርሰቲን ተበእገ ጠረኚንሰ እዘንዝበእንደ? ሁኩዕኑን ዬሩሳሌም ከተመ ጉዕመንከ ትምርቲንከክዕኔ ዊንሸቲንታእ፤ ህትን ከን መንቹ ቁግ ኒ እሌን ኤቦኖተ ሀሴነንታት» ይሰ።

29 ጠዉ እኮጎሬ ጴጥሮሰለከ ዋሉ አሳበት ፈንቀሽት «መን ትዛዝ ቶጊች መገን ትዛዝ ቶጉ ሀሰሰኖ።

30 እዕኔ መሰቀል አሌን ሰቀልቲን ሸቲንተ ኢሰ አናከኔ መገኑ ሬሆች ኬሾሰ።

31 እሱንከ መገኑ እሰራኤል መኑ ቶበታን ጨቡሰ አጉረሞተ ቡዕለለከ ጡምሳንቹ መኬሰ አዲን ኬዕምኚን አፋዕለኖገ አዕዮሰ።

32 ነኡ ከን ጠዊሃ ምሰክርሃን፤ መገኒሃ እዘዘንታህኡተ ጉዕሚንከ እሴሰ ጠሊሉ አያኑ ምሰክርሃን» ይቶኡ።

33 እሰን ህካን ሞጮጮቶ ወክት አበ ኡሙዕረንት ሸቶሰተ ሀሶኡ።

34 ጠዉ እኮጎሬ መኑ ጉዕሙንኩ ከበጀሞለከ መገን ሕገ ተማርሰኖ «ገማልያሌ» ዬኖ ፈርሳውቹ ኦገት በላን ኡር አሳበተ ቀዋ ወክቲሃ አብል ፋሽታሰገ እዘኩ።

35 እሰን «እሰራኤል መነ! ከን መን አሌን መ አቲነንተጎሬ ገዉክዕኔ አገዕርዬ።

36 መሰንትሰ ከኒች ዋዕናሃ ሩቱዋዳሴ ዬኖ መንቹ አን ሎረሃን? የን ኬዕዮ እቅ፤ ሾሌ ጥቤ ጌሱ መኑ እሰን ሚጡ እኮኡ፤ ጠዉ እኮጎሬ እሱሃ ሼመሰ፤ ህትን እሱ አዋንቶእሩ ጉዕሙንኩ ብንት ተሰ እክ በኦኡ።

37 ህከኒች ኤተሮን መነ ዋለኤመ ዘማን ገሊሊ ዬኖ ቤቺች ሩይሁደ ዬኖ መንቹ ኬዕዮ፤ ልግብ መነ ሸፍጠ አዕይ አዋንታሰገ አዕዮ፤ እሲሁ ሬዮ፤ አዋንታሰሩንኩ ብንይቶኡ።

38 ህካን እኮቤቺሃ ቲሁ እን ያንክዕኔሁ ከ መነ ኡልቶኖቹ፤ ኩ ሰውቱ ህከረንገ ኩ ሆጉት መኒች እኮጎሬ በኣእ።

39 ጠዉ እኮጎሬ ኩ ጠዉ መገኒች እኮጎሬ ቤሶኖተ አታልቴነትበአ፤ ህከኒችን በትሽ ኩ ጠዉ መገኒን ብተሙ እህኖህዕኔበእገ» ዬሰ፤ ህከን መንች ሸዘነተ ሞጮጭቶኡ።

40 አሳበንተ እሰበ ገእት ገረፎሳች ኤተሮን ኢሰ ሱዕሚን ለንኪሃ ጠወኣበእገ እዘዝ ሂርቶሰ።

41 እሰን እሰ ሱዕሚን ህንቀሙ ሀሰሰኖሃ እኮቤቺሃ ኦገቲች ሙንደኣን ፋልቶኡ።

42 ህካን እኮቤቺሃ በሬን በሬን መገን ሞኔንለከ ሞኔንከሰ ኢሰ መሲሁ እሁሰ ተማርሱለከ ተሸት ላገተ ተማርሱ ሆሮ አጉርቶበአ እቅ።

6

ለመሉ ሆጉተ አታ መኑ መጠረሙስ

1 ህከ ወክት አመዕኖኖ ዋሊንሹ በተኣን መረን ግሪክ አፎሃ ጠወኣ አይሁዱ እሰ አድ ሞንሰ አናከት ሬቶ ሜንቲሃ በሬን በሬን ኣሴኖሰ እቸተ ብዘ እኤን ኣሴማሰበአ ይት እብራይስጥ አፎ ጠወኣ አይሁድ እሌን ቈንቈቶኡ።

2 ህካን እኮቤቺሃ ቶነ ለሙንኩ አሳበት ጉዕመንከ አመዕኖኑተ ጭምአት «እቴናርቹ ቤንኮተ ይን መገን ላገተ ተማርሱ አጉሩ ሀሰሰኖበአ።

3 ህካን እኮቤቺሃ አመኤ ኦሶ! መኑ ሩጡማኖተ የኖሰ ለመለ መነ ጠሊሉ እያኑ ዊሞሰረ በሊቶክዕኔ ሀይቹ መነ መጠሬ፤ ተን ሆጎንተ ሹምነቱ ኣሰናንሰ።

4 ጠዉ እኮጎሬ ነኡ ዱአ አኦንለከ ላገሰ ተማርሱን ጠረኝናም» ይቶኡ።

5 ሁኩ ጠወንኩ ጉዕመንከሰ ሙንዲሲሾ፤ ህከኒች ኤተሮን አመዕነቲንለከ ጠሊሊ እያኒን ዊሞ እሰጥፋኖሴ መጠርቶኡ፤ ህትን ፍልጾሴ፥ ጽሮኮሮሴ፥ ንቃሮነ፥ ጢሞነ፥ ጸርሜንለከ አይሁድ አመዕነት ቶጎ አንጾክ ባድ መንቹ ኒቆላዎሴ መጠርቶኡ።

6 እሰንተ አሳበ ብሬን ኡርሶሰ፤ አሳበንት ዱአ አቶች ኤተሮን አንገሰ እሌሰ ኡጅቶኡ።

7 ከን ሃሌን መገን ላገት አልባዕልተን መርቶኡ፤ ህትን ዬሩሳሌማን አመዕኖኖ ዋሊንሹ በተኣን መሮ፤ አይሁድ ቂሳች መት-መቱሰ ኢሳን አመዕንት ትምርቲንከሰ ቶጎኡ።

እሰጥፋኖሴ አፌመሰገ

8 እሰጥፋኖሴን ኣሰቶንለከ ጠሊሊ እያንሰ ዋልቃን ዊሞ መን በላን አጀብሲሰኖ ጠወለከ አጅበተ አኣኖት እቅ።

9 ህከ ወክት «ሰዎልድማን ፋሎ መን ጭምት ምኒ» ዩኖ አይሁድ ጭምት ምኒ መኑ፥ ቂሬንለክ አለክሰንድር ከተም መኑ፥ ክልቅይለክ እስይ ባድ መኑ እስጥፋኖሴን ኦዳኢት እቅ።

10 ጠዉ እኮጎሬ እስጥፋኖሴ ጠወእን ሄዕዮ ሀይመተለክ ጠሊሊ አያነ ኦዶተ አታልቶበእ።

11 ህከ ወክት «ኩ መንቹ ሙሲንለክ መገን አሌን ቦርር ላገተ ጠወእን ሞጮጭኖም» ይታ መነ ማጥ ኬሶኡ።

12 ከን ሃሊን ኡመት፥ ባልቅለክ ሕግ አስተማረተ ኬሶኡ፤ እስጥፋኖሴቤቹ መርት አእት ኦገትቤቹ ሆንጠህሶሰ።

13 እስ አሌን ክዝብ መሰከርታ መት-መት መናከተ ኤቦኡ፤ ሁኩ መናከንት «ኩ መንቹ ከን መገኒሃ እደ እኮ ቤቸንለክ መገን ሕግ አሌን ቦርር ላገተ ጠወኡ ሆሮ አጉርባእ።

14 ሕኩ ናዝሬት ኢሰ ከዱእ ምኒ ድጀኖ፤ ሙሰን አሴኔ ሴረ ዶረኖ ዮን ሞጮጭኖም» ይታ ክዝብ ምሰክር ኬሶኡ።

15 ህከ ወክት ኦገቴን አፋዕልቶእሩ ጉዕሙንኩ እስጥፋኖሴ ቱክ ይት ለእን ሚኔስ ኦዱ መላይክ ሚንተ አጉጅ ለሌሰ።

7

እስጥፋኖሴ ጠወዕዮገ

1 ሎሩ ቂሰቹ እስጥፋኖሴ «ኩ የመሞ ጠዉ ሀንቅሃንዶ?» ይ ጠዕሜሰ።

2 እስጥፋኖሴን «አመኤ ኦሱትለክ አናከኤ! እን ያሚሃ ሞጮጭዬ!፤ አኑኔ እብራሂም ካራን ባዶን ሄኑተ መሩዕነ ብርተ መሰጴጦምያን ሄእን ኬዕምኝ መገኑ እሲሃ ለልኬዕይ

3 ባዲችክለክ እሊችክ እደ እክ ፋልት እን ለሊሳንኬ ባዱ ኦሮኡ ዬሰ።

4 ህከ ወክት ከላድ ባዲች ፋል ካራኑ ዬኖቤቸን አፋዕሌእ፤ አኑስ ሬዮች ኤተሮን ህከንቤቹች ከበር አዕኑ ሄኤንንተ ከ ባዱ መገኑ ኤሶሰ።

5 ከን ባዶን መት ብኩታ እሆኖ ጌሰ ኡለት ርሰተ አዕይ ኣሰዮሰበእ፤ እብራሂምሃ እለት ሄእበሰጎሬ እሲሃለክ እሲች ኤተሮን ዘሬተሰ ርሰተ አዕይ ኣሰተ ላገተ ኣጎ።

6 መገኑ እብራሂም ዘርት መን ባዶን ቶቸንት ሄእን ርሰ አኤን ሾሌ ጥቤ ዘማኒሃ እብዲዴኖሰገ ኩሎሰ።

7 ህትን መገኑ ሕክ ዘርክ ርስ አት ጠቅታ ኡመት አሌን እን ፈረዳም፤ ህከኒቶ ኤተሮን ህከን ባዲቶ ሰዎልድማን ፋሼሃን ከንቤቶን ኤሳሃ ሰገዳኤ ይእ።

8 ጡርከም ወኣድ ሴረ መላተ እሆተ ኣሴሰ፤ እብራሂም ኢሳቀ እሎ ህዜትቅ ቦር ጡርከምሰ፤ ህትን ኢሳቅን ጨልሰ ያቁበ ጡርከም፤ ያቁብን ደቦተ ወዕኔ አናከተ እኮ ቶነ ለሙንከ እለሰ ጡርከም።

9 «ያቁብ ኦሱት አመሰ ቤቱ ዩሱፈ ምቀኝት ግብጽ ባድን ርስ እሆተ ህርቶሰ፤ ጠዉ እኮጎሬ መገኑ እሲን ሜጡብ ሄዕዮ እቅ።

10 ህካን እኮቤቹሃ ኦሪሻቶሰ ጉዕሚቶን ፋሽ ግብጽ ባድ ዎም ፍራኦን ብሬን ኬዕምኝለከ ሀይመተ ኣሴሰ፤ ዎሙንኩ ግብጽ ባድንለከ ምንከሰ ሹምነቱ ኣሴሰ።

11 ህክ ወክት ግብጽንለከ ከነኣን ባድን አቡ ጎሩለከ ኦሪሸት እኮኤ፤ ወዕኔ አናከኔን እቸተ ደእቶተ አታልቶበኤ።

12 ጠዉ እኮጎሬ ያቁብ ግብጽ ባድን ወጠት ሄኡሰ ሞጮጮ ወክት ወዕኔ ወክት አናከኔ ህከቤቹ ሶኮ።

13 ለንኪሃ ፈንቀልት ግብጽ ባዱ መርቶ ወክት ዩሱፍ ገወሰ አመሰ ኦሶተ ለልሾ፤ እሉሰን ግብጽ ዎምቤቶን ኤንኬዕነንቶኤ።

14 ህከኒቶ ኤተሮን ዩሱፍ አነሰ ያቁበለከ እሉሰ ጉዕመንከ እሰቤቹ ሶክ ኤብሲሾ፤ እሉሰ ጉዕሙንኩ ለመላይኔ ኦንቶ መነ እቅ።

15 ህካን እኮቤቹሃ ያቁብ ግብጽ ባዱ ኦሮዕዮ፤ እሰለከ ወዕኔ አናከኔ ህከን ቤቶን ሬቶኤ።

16 ምቀሰ ሴኬመ ዩኖቤቹ ፈንቀሸት መሰት እብራሂም ሴኬም ከተማን ኤምሬ ኦሶቶ ብሪንከሰ ህዕሬ ሎዳን ሞጎኤ።

17 «ጠዉ እኮጎሬ መገኑ እብራሂሚሃ ኣሴ ተብሳሃ ዊንሸኖ ወክቱ ሆንጠካን ግብጽ ባድን ኡመትኔ ዎለንሹ በተአን ኦሮዕዮ።

18 ህካን እኮንኩ ዩሱፈ ደግቡ ዎሉ ዎሙ ግብጽ ባድን ኬኦተ አላት።

19 ሃዕሮ ዎሙንኩ ኡመቲኔ አሌን ተንኮን ኬዕይ ወዕኔ አናከኔ አብዳዱ ጀመር፤ ሰብያኑተ አብል ፋሼን ቶቹናን ሬታገ ወዕኔ አናከኔ ግዳጅሾሰ።

7:7 ፋል. 3፥12። 7:8 ክል. 17፥10-14፤ 21፥2-4፤ 25፥26፤ 29፥31—35፥18።

7:9 ክል. 37፥11፤ 28፤ 39፥2፤ 21። 7:10 ክል. 41፥39-41። 7:13 ክል.

45፥1፤ 16። 7:14 ክል. 45፥9-10፤ 17፥18፤ 46፥27። 7:15 ክል. 46፥1-7፤

49፥33። 7:16 ክል. 23፥3-16፤ 33፥19፤ 50፥7-13፤ ኢያ. 24፥32። 7:18 ፋል.

1፥7-8። 7:19 ፋል. 1፥10-11፤ 22።

20 ህከ ወክት ሙስ እለሞ፤ እሰን መገን ብሬን ሞልካሙሃ ጩል እቅ፤ እንሰ ምኔን ሰሱ አገነ ነጹእ።

21 ምኒች ፋሽት አብሌን ቶችቶስ ወክት ፍራኦኔ ቤቱት ኬስ ቤትሴገ እት ነሰቶስ።

22 ሙስ ግብጽ ባድ ሀይመተ ጉዕመንከ ተማሮ፤ እሰን ጠወአኖ ላጋንለክ ሆጎንተስ ጠረኘ እኮ።

23 «ጠዉ እኮጎሬ ሙስ ሸይሉ ዘማን እኮስ ወክት አመስ ኦሱተ እስራኤል መነ ለኦተ ቀልቤንከስ ሰውዬእ።

24 እስ እሊች መቱስ ግብጽ ባድ መንቹ ሚዕረንስ ለዕይ ሀዕሌስ፤ ህከን ሚርተዕዮ መንቹሃ ሀዕል ግብጽ ባድ መንቹ ዋቀር ሽ ገዱተ ፋሎ።

25 ሙስን አመስ ኦሱንት መገኑ እስ አዲን ዋዥ ፋሸኖሰገ አጥራመታኢሃ አኮጃስ እቅ፤ ጠዉ እኮጎሬ እስ ህካን አጥራመቶበእ።

26 ለንክ በር እስራኤል ኦሶች ለሙ ብተንተን ለዕዮ፤ ሀራርሶተ ሄዕላች ሐ መነ! አዕኑ አመተ ኦሱ፤ ሚሃ መት-መቲንከክዕኔ ብተንቲንታት? ዬስ።

27 ሁኩ ጃለስ ዋቀረን ሄዕዮ መንቹንኩ ሙስ ካጸ ሀንበል ሂ እሌን ኬሳሃ ገሻንቹለክ ፈረዳንቹ እኮተ ዳኘ አዕዮሄሁ አዬት?

28 ቤሬተ ግብጽ ባድ መንቹ ሸቶንትገን ኤሳሁ ሸቶኤተ ሄዕላቶንትንዶ? ዬስ።

29 ሙስን ህካን ሞጮጮ ወክት ግብጽ ባዲች ሁኝ ሚድያም ባዶን ሄዕዮ፤ ህከኔን ለም ለቤ እለተ እሎ።

30 «ህከኔን ሙስ ሸይሉ ዘማን ሄዕዮች ኤተሮን መገን መላይኬቹ ሲና ዬኖ ቆተ ኡድማን ሀቅ ሸፎ በላን ጊረ ለበነ ኦዜን እሲሃ ለሌስ።

31 ሙስን ህካን ለዕዮ ወክት ለዕዮርቾን አጀብሲጮእ፤ እሰን ለኦተ መድ ሆንጠኮ ወክት ቀርቾሃ መገን ላገት

32 ሕን ወዕኔ አናከከሃ መገኑ፤ እን እብራሂሚሃ፤ ኢሳቅለከ ያቁብሃ መገኑ፤ ይተን ሞጮጮእ፤ ሙስን አበ ዋጄእ፤ ለኦንተ መለሎበእ።

33 ህትን ሕት ኡርቶንት ቤቹ ጠሊሊ እኮቤቹሃ ሎካቻክ ጫዕመተ ፋሽ።

34 ሀንቅንከ ግብጽ ባዶን ሄኦ ኡመትኤ ኦርሸተ ለዕይ ያርታኢንከ ሞጮጮ ነጠ ፋሾሀዕኔተ አሚቾም፤ ቲሁ አት ከቤቹ አም፤ እን ኬሳሃ ግብጽ ባዱ ሶሃንኬ፤ ይታ መገን ላገት እስቤቹ አሚቶኤ።

35 «እስራኤል ኡመቱ ሙሰ ገሻንቹለከ ፈረዳንቹሃ እኮተ ዳኘ አዕዮሄሁ አዬት?» ይት ለገኑሰ ህከ ሙሰ ህከን ሸፎ ኣዜን ለሌሰ መላይኬች አዲን መገኑ ገሻንቹለከ ፊሳንቹ አዕይ ሶኮሰ።

36 ሁኩ ሙሰ ግብጽ ባደንለከ ቢሸ ባራን ሸይሉ ዘማን ኡለ ኡድማን አጅበተለከ አጀብሲሰኖ ጠወ አእን ግብጽ ባዲች አዎንሰ ፋሼሰ።

37 «ቀርቹ መገኑክዕኔ ኤሳሃ ኬሾገን ህትን አመክዕኔ ኦሶ በሊች ነብዬቹ ኬሰኖህዕኔ» ይ እስራኤል ኦሶተ ጠወዕዮሁ ህከን ሙሳንት።

38 ኡለ ኡድማን ጭምዬ ኡመቲን ሜጡብ ሲና ቆተ አሌን ጠወዕዮ መላይኬቹንለከ ህትን አናካንተክዕኔ ሜጡብ ሄዕዮሁ እሶት፤ መገን ሄእ ላገንተ ኔሳሃ ኣሴኔሁ ህከን ሙሳት።

39 «ወዕኔ አናከኔ ግቦሰ ቤሉ ትዛዝሰ ቶጎበእ፤ ቀልቤንከሰን ግብጽ ባዲ ፈንቀልቶተ ሰወይቶኡ።

40 ሀሩንን «ኩ ኔሳሃ ግብጽ ባዲች አዎንሰ ፋሼኔ ሙሲሃ ም እሌሰጎሬ ደንጋምበእቤቹሃ ብሬን ሃንተን አዎንሰታኔ ሸርክተ መክሰኔ» ይቶሰ።

41 ህከ ወክት ወዕዮ አጉደኖ ሸርክተ መክሰ ክትም ሆንጠህሶኡ፤ አንገሰ ሆጎንን ሙንደኦኡ።

42 ጠወ እኮጎሬ መገኑ እሳች አደ እኮ፤ ሰሜ ቤዜተ መገኑ አት ዱኦ አታገ ህግሽ ኣሴሰ፤ ሁኩንን ነብያካን

« አዕኑ እስረኤል መነ!

ሸይሉ ዘማን ኡለ ኡድማን

ጎረጤመ ግዘለከ ክትም ሆንጠህሴነንተኤትንደ?

43 ሰገደኖሰተ መክሴንተ ምሰልለከ

እሰን ሞሎከ ዬኖ መገንክዕኔ ዱካነለከ

ሬፋነ ዬኖ ቤዜ ክዘብ ሸርኬ ምሰለ

እጅቲን ሃንቲንተ፤

አን ባብሎነ ዬኖ ባዲች

ካጵ አደ ቄርሳንክዕኔ» የመም ከተበሞቤቹሃት።

44 «ወዕኔ አናከኔ ኡለ ኡድማን መገኑ ገወሰ ለሊሰኖ ዱካኑ ሄዕዮሰ እቅ፤ ሁኩ ዱካኑንኩ መገኑ ሙሲሃ ኩሎሰለከ ለሊሾሰ ሃሊን መክዮእሃ እቅ።

7:36 ፋል. 7፡5፤ 14፡21፤ ዘኹ. 14፡33። 7:37 ዘዱ. 8፡15፤ 18። 7:38

ፋል. 19፡1-20፤ 17፤ ዘዱ. 5፡1-33። 7:40 ፋል. 32፡1። 7:41 ፋል. 32፡2-6።

7:43 እዋ. 5፡25-27። 7:44 ፋል. 25፡9፤ 40።

45 መገኑ ብሬቸሰ ሸር ፋሺ አይሁደ እክቡ መን ኡለተ ኦለንት ረገኑ ወክት እናከኔን ተ ቶሳ ዱካንቸተ ኢያሱንን ሜጡበ ህከ ባዱ ኣግሶኡ፤ ደወዳ ዘማን ኢለ ህከኔ ሄኦኡ።

46 ደወድን መገን ብሬን ኬዕምኝ ደእ ያቁብ ዘሬ በላን መገኑ ገለኖ ምኒ እጃርተ ዱኦ አዕዮ።

47 ጠዉ እኮጎሬ ዱኦ ምኒ እጃርሁ ሱላይማናት።

48 «ጠዉ እኮጎሬ ሎሩ መገኑ መን አንገት እጃርቶ ምኔን ሄኦበእ፤ ሁኩንን ነብዬቹ ጠወኦን

49 « ሰሞሁ ዎምነትኤተ ቦርጭመ፤

ኡለት ሎከእ ፎሎሲሳምሃ ቤቹ፤

ኤሳሃ ሀትኔ ምኒ እጃርቲን?

ህከረ አን ፎሎጫም ቤቹ ሀትናሙሃን? የኖ ቀርቹ።

50 ህካን ጉዕመንከ አንገእ አቶሃበእንዶ? የኖ መገኑ።

51 አዕኑ «ጢቃመት ቀልቡክዕኔ ዱጆእሩ! መጨክዕኔ ሞጮጭትቡሩ! እናከክዕኔ ጠሊለ እያን ቶጉ ግቦገን አዕኑሁ ቶጉ ግቤነንታት።

52 ነብያካች ወዕኔ እናከኔ ያይትቡ ነብዬቹ አዬት? እሰን ፈዩ አሜቱሰ ሄጭት ኩልቶእረ ሸቶኡ፤ ሀትን ህከ ፈዩ ኢሰን ህግሴን አሰቱን ሸቱንታሰ።

53 ሀትን መላይከ አዲን መገን ሕገ ቶጌንታ እቅ፤ እኮጎሬ አገርቲንታበእ» ዬሰ።

እስጥፋኖሴ ክኒን ቀሶን ሺመገ

54 ኦገት መኑ ህካን ሞጮጭቶ ወክት አበ ኡሙዕርት እስጥፋኖሴ አሌን እንኩተ እጦኡ።

55 ጠዉ እኮጎሬ እስጥፋኖሰ ጠሊለ አያኒን ዊም ሰማሃ ዋሽ ቱክ ይ ለአን መገን ኬዕምኝለከ መገን መኬ አዲን ኡሬ ኢሰ ለዕዮ፤

56 «ሁኩዕኑን ሰሞሁ ፈንተዕያን መንቻ ቤቱ መገን መኬ አንገ አዲን ኡሬኢሃ ለኣሚት» ዬእ።

57 ጠዉ እኮጎሬ እሰ ሎረ ላጋን ያርተን መጨሰ እፍሰ ሜጡበ እክ እሰቤቹ ደጉደኡ።

58 ከተሚች አብል ፋሸት ክኒን ቀሶሰ፤ ምሰክር እኮእሩ ኦድኑሰ «ሳኦሌ» ዬኖ መቼ ወደልቹ አገርተ ሎከሰቤቸን አፋሸቶኡ።

59 እሰን ክኒን ቀሶንን እስጥፋኖሰ «ቀርቾ ኢሳ! ሩህኤ ቶግ» ይ ላገሰ ጎት አዕይ ዱኦ አዕዮ።

60 እስን ጉሉጽ «ቀርቸ! ጨብሰ አጉር» የን ሎረ ላጋን ያሮ፤ ህካን ይ ሬዮ።

8

ሳኦል አመዕናኑት ያዩሲ

1 ሳኦል እስጥፋኖሴ ሺመ ወክት አማዕለሞ እቅ፤ ህከ በር ዩሩሳሌማን ሄኑ አመዕናኖ አሌን አቡ ያየሙ እኮ፤ ህከ ወክት አሳባ ቤሉ አመዕናኑት ጉዕሙንኩ ይሁድ ባዱለክ ሰማር ባዱ ብንይቶኡ።

2 አመዕናኑን ጠረኝቶ መት-መቱ መኑ እስጥፋኖሴ ሞግ ላገሰ ጎት አት ቡብ ኦኦኡ።

3 ጠዉ እኮጎሬ ሳኦል አመዕናኑት ቤሶተ አጸመኖት እቅ፤ ህትን ምኒች ምኒ ኣገን አመዕናኑት ሜንቱለክ ጎን ጎሾሽ ፋሽን ኡሱር ምኒ ኣግሰኖሳት እቅ።

ተሸት ላገት ሰማር ባዶን ተማርሴመገ

4 ሁኩ ብንይቶ አመዕናኑት ተሸት ላገተ ዘህተን ተማርሰቶኡ።

5 ፍልጾሰን ሰማር ከተመ ኦሮዕይ መሲህተኔሃ ተማርሰኖት እቅ።

6 መኑንኩ ፍልጾሴ ላገተ ሞጮጭትለክ አዕዮ አጅብተ ለኦ ወክት መቶ ሰውቲን ሞጮጭታኢት እቅ።

7 ዶርረኖ ዱሩ አበ መኒች ሎረ ላጋን ያረን ፋለኖት እቅ፤ ህትን ልግቡ ናፎሩለክ ድናኑት ፈይቶኡ።

8 ህካን እኮቤቺሃ ህከን ከተማን አቡ ሙንዲኑት እኮኡ።

9 ጠዉ እኮጎሬ ህከን ከተማን ሄኦኖ መቱ «ሰሞኔ» ዬኖ መንቹ ሄዕዮ እቅ፤ እስን «እን ሎረሃን» የን ሲረ አእን ሰማር ባድ ኡመት አጅብሲሰኖት እቅ።

10 ከተምሰ መኑ ሎሪች ቀዉ ኢለ ህከ መንቹ «ኩ መንቹ ሎረ ዬን ገኤኖሲህ መገንተ ዎልቀ» ይተን ጉዕሙንኩ ሞጮጭታሲት እቅ።

11 ልግቤ ዘማኒች ኬሽ ሲርንከሰ አጅብሲሾሰቤቺሃ የኖርቹ ሞጮጭታሲት እቅ።

12 ጠዉ እኮጎሬ ፍልጾሰ መገን ዎምንተኔሃለክ መሲህ ኢሰ ሱዕምተኔሃ ዱዱብሴሰ ተሸት ላጋን አመዕናኑትህኒች ኤተሮን ጎኑለክ ሜንቱ ጠመቀንቶኡ።

13 ሰሞን ገዉንኩሰ አመዕን ጠመቀሞ፤ እስን ፍልጾሴን መለዕለሙ ግብ ሜጡብ እኮ፤ ህትን ፍልጾሰ አኦኖ መላተለክ አጅብሲሰኖ ጠወ ለአን አጅብሲጨኖት እቅ።

14 ህከ ወክት ዩሩሳሌማን ሄኑ ሶቀማኑት ሰማር ባድ መኑ መገን ላገተ ቶገገ ሞጮጭት ጴጥሮሴለክ ያህይ እስቤቹ ሶኮኡ።

15 ጴጥሮሴለክ ያህይ ህከ ቤቹ ኢልቶ ወክት ሁኩ መኑ ጠሊሊ አያነ ቶገተ ዱእ አቶሰ።

16 መሰንትሰ ሰማር መኑ ጉዕሙንኩ ቀርቾ ኢሰ ሱዕሚን ጠላዕል ጠመቀንቶ ቤሉ እሳቾ መትሰ አሌኒ ጠሊሉ እያኑ ሜጦረ ሜጥሰ አሌን ድርዮሰበ እቅ።

17 ህካን እኮቤቹሃ ጴጥሮሴለክ ያህይ እሰ አሌን አንገሰ አቶ ወክት ሁኩ መኑ ጠሊሊ አያነ ቶገኡ።

18 አሳበት አንገሰ መን አሌን አተን ጠሊሉ አያነ ኣሰመኖሰገ ሰሞን ለዕዮ ወክት ብረ እሳሃ ኤብ

19 «አኒሁ አንገኤ አሌሰ አኣሚሁ ጉዕሙንኩ ጠሊሊ አያነ ቶገተ ኤሳሃ ከ ወልቀተ ኣሰዬ» ዬሰ።

20 ጠወ እኮገሬ ጴጥሮሰ «መገን ኣሰቱተ ብሪን ደዕቶተ ሰውይቶንትቤቹሃ ብሩክ ኪን ሜጡበ በኡን።

21 ቀልቡክ መገን ብሬን ጌጥ ዬእሃ እህበቤቹሃ ከን ጠዋን ኬሳሃ ቤቀንሹ ህከረንገ ወጡ ዮሄበኡ።

22 ቲሁ ከን ሂላ ሆገተክ ሻዝ ቶበት፤ አይደጎ ቀልብክ ሂላ ሰዉትክ አጉረኖሃገሬ ቀርቾቤቹ ዱኣ አእ።

23 መሰንትሰ አት አበ ሂላ ሞቀኝማንለክ ጨብ ኡሱሮን ሄኡክ ለለኖኤት» ዬሰ።

24 ሰሞን «ቲሁ ጠወኤንተሀኒቾ መቱርቹሁ አሌንከኤ ኢለኖበእገ አዕኑ ቀርቾቤቹ ዱኣ አዕዬ» ይ ፈንቀሼኡ።

25 ጴጥሮሴለክ ያህይ ቀርቾ ላገተ መሰከርትለክ ጠወኡኢቾ ኤተሮን ሰማር ባዶን ዮ ልግቤ ኦሎን እንጂላ ተማርሰተን ዩሩሳሌመ ፈንቀልቶኡ።

ፊልጶስ መቱ እቶጵያውቹ ጠመቁሰ

26 መገን መላይኬቹ ፊልጶሴ «ኬእ ዩሩሳሌሚቾ ጋዛ መሰኖ ዋቄን ካእጶ ዋልት ኦሮእ» ዬሰ፤ ሁኩ ዋቆንኩ ኡለ ኡድማን ዮእሃ እቅ።

27 እሰን ህከንቤቹቾ ኬዕይ ኦሮዕዮ፤ «ሕንዳኬ» ዬኖ እቶጵዮ ባድ ዋማን ዮሴ ዱንዮ አሌን ጉዕማንን ሹመለክ ገሸኖሃ እኮ መቱ ቃሬመሰ እቶጵያውቹ መንቹ መገኒሃ ሰገዶተ ዩሩሳሌመ ኦሮዕዮ።

28 እሰን ፈንቀል ኦሮእን ኬዕምኝ ጋሬን * አፋዕል ነብዬቾ እሰያሴ መጻፈ እነበበኖት እቅ።

* 8:28 ኬዕምኝ ጋርተ፡- ዩ ፋርሶ ጋርተ እኩደኖሃ እክ ጠረገለክ እሰራኤላውያኑት በገዚሃ ደግለሸቀንታእሃን።

29 ህከ ወክት ጠሊሉ አያኑ ፍልጾሴ «መርት ህከ ኬዕምኝ ጋሪቤቹ ሆንጠክ ደቀም» ይሰ።

30 ህካን እኮቤቹሃ ፍልጾሰ ህከ ቤቹ ደጉጅ መርክና ኢቶጵያውቹ ነብዬቹ ኢሰያሴ መጻፈ አነበበኖሃ ሞጮጮ «አነበባንት ፍሳረሰ አጋሄትንደ?» ይሰ።

31 ኢትዮጵያውቹንኩ «ሮሰሰኤ መንቹ ዮበኢሃ ሀት እክ ኣጎኤተ አታለኖ» ይክነ ፍልጾሴ «ኬዕምኝ ጋሪ አል ቆጵ ኢን ሚጡብ አፋዕል» ይሰ።

32 እሰን አነበበን ሄዕዮ ጠሊሊ መጻፍ ቤቹ

«እሰን ጎረጢሃ መሴኖ ሆልችገ፤

ኦርዘሰ ኣኢሃ ሆንጠኩ መን ብሬን ሰዕም የኖ ቆርባብገ

እሰ ጠወኦተ አፎሰ ፈቐበአ።

33 እሰን ገዉሰ ሆፍሾ፤

ሀንቅ ፍርዱ አሰሞሰበአ፤

ሄኡሰ ኡለ አሊች ኬዕዮቤቹሃ

ደቦሰተኔሃ አይ ጠወኦተ አታለኖ?»

34 ሁኩ ቃሪመሲንኩ ፊልጾሴ «ነብዬቹ ካን ጠወዕዮሁ አይተኔሃት? ገይሰተኔሃትንደ ዎሎ መንተኔሃት? ሀዕይ ኩሌኤ» ይእ።

35 ፊልጾሰን ህከን ጠሊሊ መጻፊች ኬሽ ኢሰተኔሃ ተሽት ላገተ ኩሎሰ።

36 ሀንተንን ዉሁ ዮ ቤቹ ኢልቶ ወክት ሁኩ ቃሪመሲሁ «ዉሁ ኩዕኑን፤ ኤሳሃ ጠመቀሙ ከመኖኤሁ መርቹሃን?» ይእ።

37 [ፊልጾሰ «ዊመ ቀልብንከክ አመዕንቶንትጎር ጠመቀንቶተ አታልታንት» ይእ፤ ሁኩ ቃሪመሲንኩ «መሲህ ኢሰ መገን ቤቱ እሁሰ አመዕናም» ይእ።]†

38 ሁኩ ቃሪመሲንኩ ኬዕምኝ ጋርተ ኡርሳገ አዘዢ፤ ለሙንኩሰ ዊቤቹ መርታን ፊልጾሰ ህከ ቃሪመሲንከ ጠመቆሰ።

39 ዊ ኣዚች ፋልቶች ኤተሮን ቀርች አያኑ ፊልጾሴ መሴሰ፤ ሁኩ ቃሪመሲንኩ ለንኪሃ ፊልጾሴ ለዕዮሰበአ፤ እኮጎሬ ሙንደእን ዎቃሰ ኦሮዕዮ።

40 ጠዉ እኮጎሬ ፊልጾሰ «አሽዶደ» ይኖ ከተማን ደገሞ፤ እሰን ቂሳር ከተመ ኢሎተ ኢሊ ከተማን ጉዕማንን ሃመን ተሽት ላገተ ዱዱብሰኖት እቅ። ‡

8:33 ኢሳ. 53፡7-8። † 8:37 መት-መቱ ሉህ ክታበት ወልጎሽ 37 ዮኢሃ በርግታበአ፤

‡ 8:40 አሽዶደ የመመኖሁ፡- አዘግሰ ይኖቤቹን ሚጡሃን።

9

ሳኦል መሲሂን አመዕነገ

(ሶቀ. 22፡6-16፤ 26፡12-18)

¹ ህኪ ወክት ሳኦል ቀርቾን አመዕንቶአረ ሾተ ፎከሮ፤ ሎረ ቂሰችቤቹ ኦሮዕይ

² ቀርቾ ዎቃሃ አዎንታ ጎነለከ ሜንቱ ደገኖረ ጉዕመንከ ኡሱረን ዬሩሳሌመ ኤቦተ አታልሲሰኖ ደብዳቤተ ደማሰቆን ሄኣ ጭምት ምናተ ከተብ አሶተ ጠዕሜእ።

³ ኦሮአንን ደማሰቆ ኢሎተ ሆንጠኮ ወክቱን ድንገቱን እስ ዮቤቾን ሰሜች ኑሩ በለቆ።

⁴ ህኪ ወክት ኡላን ኡቦ፤ «ሳኦሌ! ሳኦሌ! ሚ ሸርታንቴኤት?» ይታ ላገተ ሞጮጪኦ።

⁵ ሳኦልን «ቀርቾ! አት አዩት?» ዬ ወክት «እን አት ሸርታንቴኤ ኢሳት፤ ቀሰኖ ብረት ሃንቶንት ጎሬ ሂለኖሄ ዬሰ።^{*}

⁶ ቴሱ ኬእ ከተመ ኣግ፤ ህከኔ መ አታንት ጎሬ ህከጼ ኩሌኖሄ» ዬሰ።

⁷ እሲን ሜጡብ ሃንተን ሄኦ መኑ ጠወአኖሲሁ አዩት ጎሬ ለኡዕነ ጠለዕል ላገተ ሞጮጭተን ይታርቹ ሆግ ኡርቶ እቅ።

⁸ ሳኦል ኡቦቤቹኝ ኬዕይ ለአኖ ወክት እልሰ መቱርቹሃ ለኦተ አታልቶበኢ፤ እሲን ሜጡብ ሄኦ መኑ አንገሰ አፍ መሰገን ደማሰቆ ከተመ መሰቶሰ።

⁹ ህከኔን እልሰ ለኡዕነ፣ እቱዕነለከ አጉዕነ ሰሱ በር ዱንኬእ።

¹⁰ ደማሰቆን «ሀናንዩ» ዬኖ መቱ ቀርቾ አሳቤቹ ሂዕዮ እቅ፤ ቀርቹንኩ እሱ መናማን «ሀናንዩ» ዬሰ፤ እሲን «ቀርቾ! አን ከቤቹ ዮም» ዬእ።

¹¹ ቀርቹንኩ እሱ «ኬእ ጌጥዬ» ዬኖ ዎቃሃ ኦሮአ፤ ህከኔን ይሁድ ምኔን ዮ «ሳኦሌ» ዬኖ ጠርሴሰ ባድ መንቺን ደቀም፤ መሰንትሰ ሁኩዕኑን! እስ ህከጼ ዱኦ አአኖት።

¹² እሲን ለኡ አታሎተ «ሀናንዩ» ዬኖ መንቹ ኣግ አሌሰ አንገተ አአን መናማን ለዕዮ» ዬሰ።

¹³ ጠዉ እኩጎሬ ሀናንይ ፈንቀሽ «ቀርቾ! ኩ መንቹ ዬሩሳሌመን ሄኣ አመዕናኖ አሌን ሄከ ሂለ ሆጉተ አአኖት ጎሬ ልግብያ መኒቶ ሞጮጭዮም።

^{*} 9:5 መት መቶ ፈሰረንቶ ክታባን «እጳሽ ሲፍ አሌን ኡርቶንት ጎሬ ገዉክ ምርታንት» ይታእ፤- 9፡6 ሳኦል ሁጠን ዋጅ ገረምሲጨን «ቀርቾ! መ እኦተ ኢትተን?» ዬሰ ይታኢሃ በርግታኦ፤ ሁኩንን ፎሎጭ 22፡10—26፡14 ኢለ ከተበሞኡ።

14 ከንቤቸን ሱዕመክ ገእታእረ ጉዕመንከ ኡሱሮተ ቂሰ አዎንሳኖች ዳቻመት አሰንቶሰ» ዬሰ።

15 ጠዉ እኮጎሬ ቀርቼ ሀናንየ «እሰ ሱዕመኤ መገኑ አመዕንበ መኒሃ፥ ዎማተለከ እሰራኤል ኦሶተ ደግሲሰኖ እን መጠሮንሰ ኦዳተ እኮቤቹሃ እሰቤቹ ኦሮእ።

16 መሰንትሰ ሱዕምኤተኔሃ ሄንከ ኦርሸተ ቶጉ ሀሰሰኖሰገ እን እሲሃ ለሊሳንሰ» ዬእ።

17 ሀካን እኮቤቹሃ ሀናንየ ኦሮዕይ እሰ ሄዕዮ ምኒ ኣጎ፤ አንገሰ ሳኦሌ አሌን አዕይ «አመኤ ቤቶ ሳኦሌ! ሁኩ አሜተን ዎቃን ለሌሄ ቀርቼ ኢሰ ለንኪሃ ፈንቀሸት ለኡ አታልቶተለከ ጠሊሉ አያኑ ዊሞሄተ ሶኮኤ» ዬእ።

18 ህከ ወክት እሊሰ አሊች ኦሞለ አጉደኖርቹ ኡባን ወዕኔገን ለኦተ አታሎ፤ ኬዕይን ጠመቀሞ።

19 እቸተ እች ጠረጌእ፤ ደማሰቆን ሄኣ አሳባን ሜጡብ ቀዉ በር ዱንኬእ።

ሳኦል ደማሰቆ ከተማን ተማርሱሰ

20 ወክትንከሰ ሳኦል ደማሰቆን «ኢሰ መገንየ ቤቱ» የን አደደ አይሁድ ጭምት ምናን ተማርሱ ጀመሮ።

21 ሞጮጭቶሩ ጉዕሙንኩ «ኩ መንቹ ዬሩሳሌማን ከ ሱዕመ ገእታእረ ጉዕመንከ ቤሰን ሄዕዮሃበዕንዶ? ከ ቤቹንከ አሜቸሁ እሰተ ኡሱረን ቂሰ አዎንሳኖቤቹ መሶታበእንዶ?» ይተን አጀብሲጭቶኡ።

22 ጠው እኮጎሬ ሳኦል ወዕኔች በትሽ ጠረኘን ኦሮዕዮ፤ ኢሰ መሲሁ እሁሰ ደማሰቆን ሄኣ አይሁዲሃ መሰለ ከመኖሳት እቅ።

23 ልግብያ በሬች ኤተሮን አይሁዱ ሳኦሌ ሸቶተ አማዕለንቶኡ።

24 ጠዉ እኮጎሬ ሳኦል ተንኮ አማልሰ ደጎ፤ እሰን ሳኦሌ ሸቶተ ከተሚች ሀንከዕርተለከ በራሃ ፋለኖ ኡሩተ ጉዕመንከ አገሩ ጀመርቶኡ።

25 ጠዉ እኮጎሬ አሳበት እሱ ቀርጫታን ዎርት ሀንከዕሬን መሰት ግንብ ኦተ መሰኮቲን ኤተሩ ዋሸት ፋሽቶሰ።

ሳኦል ዬሩሳሌመ ኦሮዕዮገ

26 ሳኦል ዬሩሳሌመ ኢሌ ወክት ህከኔ ሄኦ አሳባን ሜጡብ ሄኦተ ሀሾ፤ ጠዉ እኮጎሬ እሰ ጉዕሙንኩሰ እሰ አሳቤቹ እሁሰ አመዕንትበቤቹሃ ዋጅቶሰ።

27 ጠዉ እኮጎሬ በርናባሰ ሳኦሌ አሳበቤቹ እኦ መር ዎቃን ቀርቹ ህት እክ ለሌሰገለክ ጠወዕዮሰገ ህትን ደማሰቆን ኢሰ ሱዕሚን ህት መለል ተማርሴገ ኩሎሰ።

28 ህካን እኮቤቹሃ ሳኦል እሳን ሜጡበ እክ ዬሩሳሌማን ሃመኖት እቅ፤ ቀርቹ ሱዕሚን መለል ተማርሰኖት እቅ።

29 ግርክ አፎ ጠወኣ አይሁዲን ጠወኣን ኦደኖት እቅ፤ እኮጎሬ እሰ ሸቶሰተ ሀሶኡ።

30 ህካን አመዕናኑት ደጎ ወክት ቂሳር ከተመ መሰቶሰ፤ ህከንቤቹቹ ተርሴሰ ከተመ ኦሮኦኖገ አቶሰ።

31 ይሁድ ባዶን፤ ገሊሊ ባዶንለክ ሰማር ባዶን ጉዕማንን አመዕናኑት ጠረኝት ወገሬቲን ሄኦኡ፤ ህትን መገኑ ዋጅተን ጠሊሉ አያኑ ጠረኝሰንሰ ዋሊንሺን በተኣን መርቶኡ።

ጴጥሮስ ልዳለክ እዮጴ ከተመ ኦሮዕዮገ

32 ጴጥሮስ ቤቹቹ ቤቹ ፈንቀላመን ልዳን ሄኣ አመዕናኖቤቹ ኦሮዕዮ።

33 ህከኔን ህዜቱ ዘመን ዊመ መዕናን ኦሰዕዮ ኤኒያ ዬኖ ናፈ መንቹ ደጎ።

34 ጴጥሮስን «ኤኒያ! መሲህ ኢሰ ፈይሰኖሄ፤ ኬዕ መዕነክ ዌሰ!» ዬሰ፤ እሰን ወክቲንከሰ ኬዕዮ።

35 ልዳለክ ሳርን ከተማን ሄዕዮ መኑ ጉዕመንኩ እሱ ለእ ቀርቹ አደ ፈንቀልቶኡ።

36 እዮጴ ከተማን «ጠቢተ» ዬኖ መትት ኢሰ አዎንታኦት ሄኦ እቅ፤ እሴን ግርክ መን አፎን «ዶርቃ» ዬኖ እቅ፤ ፍሳረሰ «ጉሜተ» ዩሃን፤ እሴ ጡመተ ሆጉተ አታኢተለክ ቡጥቻኖተ ደግለልታኦት መንቹ እቅ።

37 ህከ ወክት እሴ ጥዝ ሬቶኡ፤ እሰን ጀናዘሴ አንሸት ፋቅ ሞኔን አፋሽቶኡ።

38 ልዳ ከተሙ እዮጴ ከተሚሃ ግደኑ እኮቤቹሃ እዮጴ ከተማን ዮ ኢሰ አሳበት ጴጥሮስ ልድ ከተማን ሄኡሰ ሞጮጮት እሰቤቹ ለሙ መን «ኒቤቹ ደዕልት አሞ» ይት ሶኮኡ።

39 ጴጥሮስን ህከን ሶቀንቶሀኡንን ሜጡበ አሜቾ፤ እሰን ኢሌ ወክት ፋቅ ሞኒ ፋሽቶሰ፤ ህከኔን ሞንሰ አኑ ሬዮ ሜንቱ ጉዕመንኩ ብሬሰ ኡርት ዶርቃ እሳን ሜጡበ ሄኦ ወክት ደዶ ቀምብሰተለክ ኦድኑተ ቶገን ኦኦኡ።

40 ጠዉ እኮጎሬ ጴጥሮስ እሰተ ጉዕመንከ አብል ፋሽ ጉሉጵ ዱኣ አዕዮ፤ እሰን ጀናዘት ዮ አደ ፈንቀል «ጠብተ! ኬኦ» ዬኦ፤ እሴን እልሴ ፈንት ጴጥሮሴ ለእ ኬኦ አፋዕልቶኡ።

41 እሰን አንገሰ ሂር አፍሴ ኬሾ፤ ምንሰ አኑ ሬዮ ሜንቱለከ ዋሉ አመዕናኑተ ገእ ሩሁሴ ፈንቀላን ኣሴሰ።

42 ሁኩ ጠዉ እዮጴ ከተማን ጉዕማንን ሞጮጨሞ፤ ልግቡ መኑንኩ ቀርቶን አመዕኔእ።

43 ጴጥሮሰን እዮጴ ከተማን ጎገ ዙገኖ «ሰሞኔ» ዬኖ መንቺን ሜጡበ ልግብ በር አፋዕሌእ።

10

ጴጥሮሌለክ ቆርኔሎዎስ

1 ቁሳር ከተማን ሄአኖ «ቆርኔሎሴ» ዬኖ መቼ መንቺ ሄዕዮ እቅ፤ እሰን ሮም በገዝ ጎጎት ኣዜን «ጣልያን ብርጌደ» ዬኖሀኒሃ ጥቤ ሀለቀ እቅ።

2 እሰን ምንሰ አበሮሲን ሜጡበ መገኒሃ ሰገደን መገኑ ዋጀኖ እቅ፤ ህትን ቡጥቻኖተ ሰደቀተ ኣሰኖ እቅ፤ መገን አደንከ ጉዕመ ወክት ዱአ አአኖ እቅ።

3 መቼ በር ሆንሶ ሰአት ጌሳን መገን መላይኬቹ «ቆርኔሎሴ» ዮን እሱ ገእን መናማን ለሌሰ።

4 እሰን መላይኬቹ ቱክ ይ ለእን ዋጅ «ቀርቶ መርቹሃን?» ዬእ፤ መላይኬቹንኩ «ዱኡክለክ ቡጢቻኖተ ሰደቀ ሀዕልታንቲሁ መገንሀኔን ቃገንታንትገ አዕዮሄ።

5 ቲሁ እዮጴ ከተማን ሄዕዮ ጴጥሮሴ ዬኖ ሰሞኔቤቹ መነ ሶክ ገእሲሰ።

6 እሰ ቱሱ ሞኑሰ ባር መዴን ሄዕዮ ጎገ ዙገኖ ሰሞኔ ሞኔን ኮህነቱ አፋዕልዮኡ» ዬሰ።

7 እሲን ሜጡበ ጠወአን ሄዕዮ መላይኬቹ እሲች አደ እክ ኦርዕዮች ኤተሮን ቆርኔሎሰ እሰ ካዲማች ለሙሰለክ ጉዕመ ወክት እሱ አገርታሁኡች መገኑ ዋጀኖ መቼ ወታደርቹ ገእ

8 ጉዕመንከ ጠወ ኩሎሳች ኤተሮን እዮጴ ከተመ ሶኮሰ።

9 ለንክ በር ገሰመ እሰ መርት ከተመሰ ሆንጠኮ ወክት ሌሆ ሰአት ጌሰ ጴጥሮሰ ዱአ አኦተ ሀንሸርገ ዮ ቤቹ ፋሎ።

10 እሰን ጎሩ አፋንሰ እቸተ እቸተ ሀሾ እቅ፤ እቸተ ቅጥ አኤነኒን መናመተ ለዕዮ።

11 ህከ ወክት ሰሞሁ ፈንተዕዮን ሾሉ ሙረበሰ ኡሱረሞ መጋረጀ አጉደኖርቹ ሰሜች ኡለተ ድረን ለዕዮ።

12 ህከን ኣዜንን አደዱ ሾል ሎከት ዮሰ ቡሳዉ፤ ወዘንከሰ ሹርይታ ክልቀቱለክ ሰማን ብርይታ ጨኡት ሄኑ እቅ።

13 ህከ ወክት «ጴጥሮስ! ኬእ ካን ጎረጥ እት» ይታ ላገተ ሞጮጮኦ።

14 ጠዉ እኮጎሬ ጴጥሮስ «ቀርቸ! እህኖበእ፤ አን ህትኔ ንጃሾ ህከረንገ ነጠ እህባሃ እቸም በሩ ዮበእ» ዬእ።

15 ህትን ለንኪሃ «መገኑ ሙጮሩ አዕዮሃ አት ንጃሰሶት» ይታ ላገት አሜቶኡ።

16 ሁኩን ሰሱ ወክት እኮች ኤተሮን ሁኩ መጋረጀ አጉደኖርቹ ሰማ ዋል ኦሮዕዮ።

17 ጴጥሮስ መናመገ ለዕዮ ጠወ «ኩን እኮሁ ሚሃት?» ዮን ቀልቤንከስ ጨነቀመን ቆርኔሌዎስ ሶኮ መኑ ሰሞኔ ምኒ መነ ጠዕምት ደጎኢች ኤተሮን ኡሮን ኡርቶ እቅ።

18 እሰን ላገስ ጎት እት «ሰሞኔ» ዬን ገኤኖ ጴጥሮስ ከበ ዮእንደ?» ይት ጠዕምቶኡ።

19 ጴጥሮስን ህከን መናማን ለዕዮ ጠውተኔሃ ሰውዮን ሄዕዮገን ጠሊሉ እያኑ «ሁኩዕን ሰሰ መናከት ሀሳሂት።

20 እሰን አን ሶካንስ አሜቶረ እኮቤቺሃ ኬእ ለሞሱዕናን እሳን ሚጡበ ኦርእ» ዬእ።

21 ጴጥሮስን ህከን መንቤቹ ድር «እዕኑ ሀሴነንተ መንቹ አኔት፤ አሚቲንታሁ መ መሳኒት?» ዬሰ።

22 እሰን «አይሁድ መኑ ሎርሰኖ መገኑ ዋጀኖ ሀንቅ መንቹ «ቆርኔሌዎስ» ዬኖ ጥቤ ሀለቁ ሶካኔት፤ ኬሳሃ ምንስ ገእሲሽ እት ይታንቲሃ ሞጮጮተ ጠሊሉ መላይኬቹ ኩሎስ» ይቶኡ።

23 ጴጥሮስን እሰተ ምኒ ኣገሽ ካደሞስ፤ ለንክ በር ገሰመንከ እሳን ሚጡበ ኦርኦተ ፋሎ፤ እዮጴ ከተማን ዮ አመዕናኖች መት-መቱ እሲን ሚጡበ መርቶኡ።

24 ለንክ በር ገሰማን ቄሳር ከተመ ኢልታ ወክት ቆርኔሎሴ እሉስለከ ሆንጠካስ ጃለስ ገእ እሳን ሚጡበ አገረኖት እቅ።

25 ጴጥሮስን ህከ ቤቹ ኢል ምኒ ኣጎ ወክት ቆርኔሎስ ጴጥሮሴን ደቀም ሎከስ ኡብ ሰገጃሰ።

26 እኮጎሬ ጴጥሮስ «ኬእ! አን ኪገን መንቹሃን» ይ ኬሾሰ።

27 ጴጥሮስ እሲን ጠወአንን ምኒ አገኖ ወክት ልግቡ መኑ ጭምዬኢሃ ለዕይ

28 «አይሁድ መንቹ አይሁድ እህባ ዎሎ ዘሬን ጭምዩ ህከረንገ ምኒ ኣጉ ሕጋን ፈቀደምባሃ እሁስ እዕኑ ገዉክዕኔን ደገነንተ፤ እኮጎሬ ኬሳሃ አዬሁ ሳጠ እኮበእሃ ህከረንገ ንጃሾእሃ» ዩ ሀሰሰኖኤበእገ መገኑ ለሊሾኤ።

29 ህካን እኮቤቺሃት እቤቹ ሶኬንተ ወክት ግቡዕነ አሜቸሚሁ፤ ሉቲሉ ገእቲንተኤሁ ሚሃት?» ይ ጠዕማንክዕኔ» ዬሰ።

30 ቆርኔሌዎስ «ሾሎ በሬች ብርተ ህትኔ ወክቲን ሆንሶ ሳቲን ምኔንከኤ ዱኣ አኣን አበ በለቀ ኦድኑተ ኦደዕዮ መቼ መንቹ ብሬንከእ ኡር

31 ቆርኔሌዎስ! ዱኣክ መገኑ ሞጮጭዮኡ፤ ህትን ቡጢቻኖተ ኣቶንት ሰደቀተ መገኑ ቃጎኡ።

32 እዮጴ ከተመ መነ ሶክ «ጴጥሮሴ» ዬን ገኤኖ ሰሞኔ ገእሲሰ፤ እሰን ጎገ ዙገኖ ሰሞኔ ምኔን ኮህነቱ አፋዕልዮ፤ ሰሞኔ ምኑ ባር መዴን ዮአሃን» ዬእ።

33 ህካን እኮቤቺሃ ህከ ወክትንከ ኪቤቹ ሶኮም፤ አት አሜቲንከክ ጡመ አቶንት፤ ቲሱ መገኑ አዘዦሄርቹ ጉዕመንከ ሞጮጭኖተ ጉዕመንኩኔ ከንቤቸን መገን ብሬን ጭምዶኖም» ዬእ።

ጴጥሮስ ጠወዕዮገ

34 ጴጥሮስን «መገኑ መነ መኒቹ በትሽ ጎልባሃ እሁሰ ሀንቅንከ ቲሱ ደጎም ዬእ።

35 ጠወ እኮጎሬ ሀከን ደቦ ዘርተ እሁን መገኑ ከበጀኖ እኮቹ መገኑ ቶገኖሰ።

36 መገኑ እስራኤል ኡመቲሃ ሳገሰ ሶኮ፤ ጉዕም ቀርቹ መሲህ ኢሰ እሰ አዲን አሜተኖ ወገሬት አዋጄሰ።

37 ያህይ ጥምቀትተኔሃ ተማርሴኢቹ ኤተርን ገሊለ ባዲቹ ጀመር ይሁድ ባዶን ጉዕማንን እኮ ጠወ አዕኑ ደገነንተ።

38 «ህትን መገኑ ናዘሬት ኢሰ ጠሊለ አያኒን ቡር ወልቀተ ኣሴሰገ ደገነንተ፤ መገኑንኩ እሲን ሜጡበ ሄዕዮቤቺሃ እሰ ጡመ ጠወ አኣንለክ እልቢሱ አፎሃ ጉዕመንከ ፈይሰን ፈንቀላሞ።

39 «እሰን ይሁድ መን ባዶንለክ ዬሩሳሌም ከተማን አዕዮ ጠዊሃ ነኡ ምስክርሃን፤ እሱ መስቀል አሌን ሰቀልት ሽቶሰ።

40 ጠወ እኮጎሬ መገኑ ሰቅ በር ሬሆች ኬሽ ለለኖገ አዕዮሰ።

41 ሁኩ እሲን ለሌኢሁ ሄጭ መገኑ መጠር ምስክር እንኮም ኔሳዬት ቤሉ መኒሃ ጉዕሚሃበኣ፤ እሰ ሬሆች ኬዕዮች ኤተርን እሰን ሜጡበ እንቶሚሁለክ እንጎሚሁ ነኑት።

42 ኢሰን ሬቶሆኩንለክ ፎሊን ሄኣሆኩ አሌን ፈረዶተ መገኑ አዕዮሁ እሱ እሁሰ መስከርኖተለክ መኒሃ ጉዕሚንከ ተማርሰኖተ አዘዦኔ።

43 እሲን አመዕነኖሁ ጉዕመንኩ እሰ ሱዕሚን ጨቡሰ ፈቁን የመሞተ ነብያከት ጉዕመንኩ መስከርቶሰ» ዬእ።

መገኑ አመዕንትቡ መኑ ጠሊለ አያን ቶጉሰ

44 ጴጥሮስ ህከ ጠወ ጠወኣንን ላገሰ ሞጮጭቶ መን አሌን ጉዕማንን ጠሊሉ ኣያኑ ድሬኣ።

45 ጴጥሮሴን ሜጡበ ኣሜቶ ጡርከመንቶ ኣይሁድ ኣመዕናኑት ኣይሁደ እክበ መን አሌን ጠሊሊ ኣያነ ኣሴሰገ ለኑ ወክት ኣጀብሲጭቶኡ።

46-47 ኣጀብሲጭቶኢሁ እሰ ዎሎ ላጋን ጠወኣንለክ መገኑ ሎርሰተን ሞጮጭቶቤቺሃት። ጴጥሮሰን «ቴ ኒገን ጠሊሊ ኣያነ ቶጎ መኑ ዊን ጠመቀንታበእገ ከመኖሳሁ ኣይት?» ዬእ።

48 እሰን መሲህ ኢሰ ሱዕሚን ጠመቀንታገ ጴጥሮስ ኣዘዦሰ፤ ህከኒቶ ኤተሮን ቀዉ ጌሰ እሳን ሜጡበ ኣገሮተ ኡጭቶሰ።

11

ጴጥሮስ ኣይሁደ እኮበእ መን ምኒ ኣጉሰ

1 ኣሳበትለክ ይሁድ ባዶን ዮ መገኑ ኣመዕንቶ መኑሁ ኣይሁደ እህቡ መኑሁ መገን ላገተ ቶጎገ ሞጮጭቶኡ።

2 ህካን እኮቤቺሃ ጴጥሮስ ዬሩሳሌመ ፈንቀል መሮ ወክት ጡርከመንቶ ኣይሁድ ኣመዕናኑት

3 «ጡርከመንቶበእ መን ምኒ ኣግ እሳን ሜጡበ እቶንቲሁ ሚሃት?» ይት ዎቀሶኡ።

4 ጠዉ እኮጎሬ ጴጥሮስ ወዕኔቶን ጀመር እኮ ጠወ ጉዕመንከ ርሰሾ።

5 እሰን «ኣን እዮጴ ከተማን ዱኣ ኣኣን ገዉእ ዛጃምገ ኣኣኖ ሰዉት ኣዜን ሄዕዮምገ መናማን ለሌኤ፤ ሁኩንን መጋረጀ ኣጉደኖሁ ሾሉ መረበሰስ ኡሱሬማሁ ሰሜቶ ኢቤቹ ኣሚቶ።

6 ህካን ሆንጠክ ቱክ ይ ለኣም ወክት መጋረጀ ኣሌን ሾል ሎከት ዮሰ ግዘ፥ ቆጥ ቡሳወ፥ ኡለ ኣሌን ወዘኒንከሰ ሹርይተን ሃንታ ክልቀቱለክ ሰማን ብርይታ ጨኡት ዮኢሃ ለዕዮም።

7 ህትን «ጴጥሮሴ! ኬእ ካን ጎረጥ እት» ይታ ላገተ ሞጮጭ።

8 ጠዉ እኮጎሬ እን «ቀርቶ! እህኖበኣ፤ ነጠህ እኮበኣሃ ህከረንገ ንጃሰ እኮሃ ከበሬ ኢሎተ ኢለ ኣፎንከኤ ኣፎምበኡ» ዬም።

9 ለንኪሃ «መገኑ ነጠ ኣዕዮሃ ኣት ንጃሰሶት» ይታ ላገት ሰሜቶ ኣሚቶኡ።

10 ኩ ጠዉ ሰሱ ወክት ህት እኮቶ ኤተሮን ሁኩ መጋረጀ ኣጉደኖርቹ ሰማ ዋል ጣጠሞ።

11 ህከ ወክት ቄሳር ከተሚቶ ኢቤቹ ሶሀንቶ ሰሰ መናከት ኣን ሄዕዮም ምኒ ኢልቶኡ።

12 ጠሊሊ አያነ ሸኩዕናን እሳን ሜጡብ ኦሮኣምገ ኩሎኤ፤ ኩሊሁ መኑንኩ ኢን ሄኦኤ እቅ፤ እሳኒን ሜጡብ ቆርኔሌዎሴ ዬኖ መንቶ ምኒ ኢንጎም።

13 ቆርኔሎሰን መላይኬቹ ምኔሰ ኡር ለዕዮገለከ ለዮጶ ከተመ መነ ሶክ ጴጥሮሴ ዬኖ ሰሞኔ ገእሲሰ፤

14 እትለከ ምንክ አበሮሱ ጉዕሙንኩ ጡምቴነንተ ጠወ ኩለኖሄ ዩሰ ኩሎኤ።

15 ህከኔን ኢን ጠወኡ ጀመሮም ወክት ጠሊሉ አያኑ ወዕና ኒ አሌን ድሬገን እሰ አሌን ድሬእ።

16 ህከ ወክት ያህይ ዊን ጠመቆ፤ እኮጎሬ አዕኑ ጠሊሊ አያኒን ጠመቀንቴነንተ ዬ ቀርቶ ላገት ቃገንቶኤ።

17 ነኡ ቀርቶ መሲህ ኢሳን አመዕንኖም ወክት ኔሳሃ ኣሴ ህከ ኣሰቱተ እሳሃ ኣሴሳቶ መገኒን ሀንበዕለሞተ ኣን አዬት?» ዬእ።

18 እሰን ህካን ሞጮጭቶ ወክት መሰለ ሆግ ጨለ ይቶኡ፤ ህትን «መገኑ አይሁደ እህበ መኒህ ነብሴህሰ ቶበት ፈንቀልታገ አዕዮሰ» ይተን መገኑ ገለትጭቶኡ።

አመዕናኑተ አንጾካን «መሲሂን አመዕንቶ መነ» ዬማገ

19 እሰጥፋኖሴ ሼመቶ ኤተሮን ኬዕዮ ያህይ መሳን ብንይቶ አመዕናኑት ዎሎ መኒሃ እሁዕነ ጠለዕል አይሁድ መኒሃ መገን ላገተ ኩልተን ፍንቄ ባዱ፤ ዊን ረበንቶ «ቆጵሮሰ» ዬኖ ባዱለከ አንጾክ ከተመ ኢሊ ዘህተን ኩልታኢት እቅ።

20 ጠወ እኮጎሬ እሳቶ መት-መቱ ዊን ረበንቶ «ቆጵሮሰ» ዬኖ ባዱለከ ቀሬን ከተም መኑ አንጾክ መርቶ ወክት ቀርቶ ኢሰ ተሸት ላገተ ግርክ ባድ መኒሃ በርግት ኩልተን ተማርሰታኢት እቅ።

21 ቀርቹንኩ እሳንከ ደግለለን ሄዕዮቤቺሃ ልግቡ መኑ አመዕንት ቀርቶ አደ ፈንቀልቶኡ።

22 ህከን ጠው ዱዱቡንኩ ዬሩሳሌማን ሄኦ አመዕናኖተ ሞጮጮም፤ እሰን በርናባሴ አንጾክ ከተመ ሶኮኡ።

23 እሰን መር መገን ኣሰቱተ ለዕዮ ወክት አበ ሙንደዕዮ፤ ዊመ ቀልብንከሰ ቀርቶን ጠረኝት አመዕንንቶረ እክ ሄኣገ ሰኩሰ።

24 መሰንትሰ እሰ ጠሊሉ አያኑለከ አመዕንቱህ ዊሞሰቤቺሃ ጡመ መንቹ እቅ፤ ልግቡ መኑንኩ አመዕንት ቀርቶ አደ ፈንቀልቶኡ።

25 ህከኒቶ ኤተሮን በርናባሰ ሳኦሌ ሀሶተ ተርሴሰ ከተመ ኦሮዕዮ።

26 እሰን ደጎሰ ወክት አንጾክ ከተመ ኣእ ኦርዕዮ፤ ለሙንኩ ዊመ ዘማን ህከኔ ሄኔ አመዕናኖን ሜጡበ ልግብ መነ ተማርሰቶኡ፤ እሳበንት ዋኔሳንከ አንጾካን «ክርሰታን» ዩን ገኤመሰ፡፡

27 ህከ ወክት መት-መቱ ነብያኑት ዩሩሳሌሚች አንጾክ ከተመ መርቶኡ፡፡

28 እሳችን መቱ «አጋቦሴ» ዩኖ መንቹ ኬዕይ ኡር ዱንዩ አሌን ጉዕማንን ጎሩ እሀኖገ ጠሊሉ እያኑ ለሊሻንሰ ኩሎ፤ ሁኩ ጎሩንኩ ሮሞ ባድ ዋሞ ዋማ ቀላዉዶሴ ዘማኔን እኮእሃ እቅ፡፡

29 ህካን እኮቤቹሃ አንጾካን ሄኣ አመዕናኑት ገገዉንኩሰ ወልቀሰ ጌሰ ፋሽት ይሁድ ባደን ዮ አመዕናኖተ ሶኮተ ሙርሰጭቶኡ፡፡

30 እሰን ብረ ጭምአት በርናባሴለከ ሳኦሌ አንጋን ዱእ ምነ ባልቀቤቹ ሶኮኡ፡፡

12

አመዕናኖ አሌን እኮ አቡ ያየሙ

1 ህከ ዘማን ዋሙ ሄርድሰ መት-መቱ አመዕናኑተ ያዩ ጀመሮ፡፡

2 እሰን ያህይ አመቤቱ ያቁበ ሲፊን ሸሲሾሰ፡፡

3 ሁኩ ጠዉ አይሁደ ሙንደእሲሾገ ለዕዮ ወክት ጴጥሮሴ በርግ ኡሱርሲሾ፤ ሁኩን እኮሁ ጦርሹ እቲንን ከበጃኖ ከበጃን ዊመ ሳምንት ኣዜን ዮ በሬኒት እቅ፡፡

4 ሄርድሰ ጴጥሮሴ አፍ ኡሱር ምኒ ኣግሾሰ፤ እሰን ሻሽግ ከበጃቲች ኤተሮን መን ብርተ ፋሾተ ሰውይ ሾሉ-ሾሉ እክ ተሪን-ተሪን አገርታገ ቶነ ሌሆ ወታደሪሃ ህግሰ ኣቶኡ፡፡

5 ህካን እኮቤቹሃ ጴጥሮሴ ኡሱር ምኔን ጠረኙን አገሬኖት እቅ፤ ጠዉ እኮጎሬ አመዕናኑት ሜጡበ እክ እሰተኔሃ ጠረኝት ዱእ አታኢት፡፡

መላይኬቹ ጴጥሮሴ ኡሱር ምኒች ፋሼገ

6 ሄርድሰ ጴጥሮሴ ኡመት ብርተ ገሰመ ሆንጠህሶተ ሰውዬ በሬን ህንከዕርተ ጴጥሮሴ ለሞ ሰንሰለቲን ኡሱሬናን ለሞ ዋታደር በላን ኦሰዕዮ እቅ፤ ዋሉ ዋታደሩ ኡሱር ምኒ ኡሮን ኡርት አገርታኢት እቅ፡፡

7 ድንገቲን ቀርች መላይኬቹ ለሌእ፤ ምንሰ ኣዙ አበ ዋቅ ዬእ፤ ጴጥሮሴ ምዛሹሰ ኡል ኬሽ «ደዕልት ኬእ» ዬሰ፤ ጴጥሮሴ አንገተ ኡሱሬመ ሰንሰለቲ አንጋችሰ ኡቦ፡፡

8 መላይኬቹንኩ «ቀበቱክ ቆዕር! ጫዕመክ ዋዕር!» ዬሰ፤ እሰን መላይኬቹ ዬሰገ አዕዮ፤ መላይኬቹንኩ ቴሁ «ጋብክ ኦደእ አዋኔኤ» ዬሰ፡፡

9 ጴጥሮሰን አብል ፋል አዋኞሰ፤ ጠዉ እኮጎሬ ጴጥሮሰ መናመተ ለአኖ አጉደኖሲት ቤሉ መላይኬቹ አአኖ ጠዉ ሀንቅ አጉጃሰበኤ፡፡

10 ዋኔ አገሬኖቤቹለክ ለንክ አገሬኖቤቹ ሀግ ከተመ ፋሽኖ ብረት ሳንቁ ዮ ቤቹ ኢልቶኤ፤ ሁኩ ብረት ሳንቁ ገዉንኩሰ ፈንተዕዮ፤ እሰን ፋልት መቶ ሩካሽ ዋቄን ህጎኤ፤ ወክትንከሰ መላይኬቹ እሲች አደ እክ ኦርዕዮ፡፡

11 ጴጥሮሰን ቀልቡሰ ፈንቀላን «ቀርቼ መላይኬቹሰ ሶክ ሄርድሴ አንጋችለክ አይሁድ ኤመቱ አገርታ ጠዊች ጉዕሚችን ፌሽኤሃ እሁሰ ቱ ደጎም» ዬእ፡፡

12 እሰን ህከ ጠወ አጥራመችች ኤተርን ልግቡ መኑ ሜጡበ ጭምይ ዱኦ አአኖ መርዮማ ምን ኦርዕዮ፤ እሴን «ማርቆሴ» ዬኖ ያህዪሃ አመተ እቅ፡፡

13 ጴጥሮሰ አብል ሳንቀ ቆጩ ወክት «ርደ» ዬኖ ህከን ምን ገረዳቹት ለኦተ ብትም ኤሩተ አሜቶኤ፡፡

14 እሴን ጴጥሮሴ ሳገተ እሁሰ ደጎ ወክት አበ ሙንደኦቤቹሃ ሳንቀ ፈንቱዕናን ምን ደጉደን ኣግ ጴጥሮሰ አብሌ ኡሩሰ ኩልቶኤ፡፡

15 እሰን እሴተ «በርገጎንት» ይቶሴ፤ ጠዉ እኮጎሬ እሴ «ሀንቅንከ እሶት» ይተን ጠረኝሰ ኩልቶሰ፤ እሰን «ጴጥሮሴ አገረኖሃ መላይኬቹ» ይቶኤ፡፡

16 ጠዉ እኮጎር ጴጥሮሰ ሳንቀ ሰዕምይ ቆጩእ፤ እሰን ፈንት ለኦሰ ወክት አበ ገረምሲጭቶኤ፡፡

17 ጴጥሮሰ እሰንተ አንጋን ቀቀሽ ጨለ ይታገ አዕይ መገኑ ኡሱር ምኒች ሀት አይ ፋሼሰ ጎር ኩሎሰ፤ እሰን «ከ ጠወ ያቁብለክ ፈቆ አመዕናናተ ኩሌ» ይኬዕይ እሳች አደ እክ ዋሉቤቹ ኦርዕዮ፡፡

18 ኡለት ሶዞ ወክት ዋታደሩ «ጴጥሮሰ መ እኮ?» ይተን አበ ጨነቀንቶኤ፡፡

19 ሄርድሰን ጴጥሮሴ ሀሴኖገ አዕይ ሆጎች ኤተርን ህከ ወክት አገርታ ዋታደረ መረመር ሹል ሾኖተ አዘዢ፤ ህከኒች ኤተርን ሄርድሰ ይሁድ ባዲች ቁሳር ከተመ ኦርዕይ ህከኔ አፋዕሌእ፡፡

ሄርድሰ ሬዮገ

20 ሄርድሰ ጢርሰለክ ሲደን ባድ መኒን ኤሙዕርዮ እቅ፤ ሁኩ መኑንኩ ሜጡበ አሜት ዋም ምን ሀላፊቹ ብላሰጦሴ ዋሚን እተቀንሶተ ኤጭቶኤ፤ መሰንትሰ ባዱሰ እቶተ ደአኖ ህከን ዋም ባዲች እኮቤቹሃት፡፡

21 ዝኼ በር ሄሮድስ ዋም ኦድኑተ ኦደዕይ ኬዕምኝ ቦርጭማን አፋዕል ኡመቲሃስ ጠወአኖሳት እቅ።

22 ኡመቲንኩ «ቲን መገንተ ላገ ቤሉ መንተ ላገበአ!» ይተን ጨንጭቶኡ።

23 ሄሮድስ መገኒሃ ኬዕምኝ አሱ ሆጎቤቺሃ ወክትንከስ ቀርቶ መላይኬቺ ዳፋን አሉስ ዘቡዕለዕይ ሬዮ።

24 ጠዉ እኮጎሬ መገን ላገት ጉዕመ ወክት ነጽተንለከ አልባዕልተን መርታኢት እቅ።

25 ህከ ወክት በርናባሰለከ ሳኦሊ ሆጉስ ሹልት ዬሩሳሌሚች አንጾከ ዬኖቤቺ ፈንቀልቶኡ፤ እስ ፈንቀልት አሜተን «ማርቆሴ» ዬኖ ያህዪ እሳንን ሜጡበ ኣእት አሜቶኡ።

13

በርናባሰለከ ሳኦሊ ተማርቶተ ሶሄመገ

1 «አንጾከ» ዬኖ ከተማን አመዕኖ ኦገት በላን ነብያኑትለከ አስተማረት ሄኦ እቅ፤ እስን በርናባሰ፡ «ገንበለ» ዬኖ ሰሞን፣ ቀሬን ባድ ሉክዮስ፣ ባድስ ሾልቅ አፎ ገሸኖ ሄሮድሴን ሜጡበ ነጹ ሞናሔትለከ ሳኦሊት እቅ።

2 እስን ቀርቶ ካደንተንለከ ሶመንተን ዮሀኒን ጠሊሉ አያኑ «በርናባሰለከ ሳኦሊ አን መጠርሞ ሆጎተ አደ አዕዬ» ዬሰ።

3 ህከኒች ኤተሮን ሶመንትለከ ዱአ አት አንገስ አሌስ አቶች ኤተሮን ሶኮሰ።

በርናባሰለከ ሳኦል ዊን ረበንቶ «ቆጵሮስ» ኢልቶገ

4 በርናባሰለከ ሳኦል ጠሊሊ አያኒን ሶሀንት «ሴሌውቅያ» ዬኖ ከተመ ኢልቶኡ፤ ህከንቤቺቶ መርከባን ኣግ «ቆጵሮስ» ዬኖ ባዱ ኢልቶኡ።

5 እስን «ስላሚስ» ዬኖ ከተመ ኢልቶ ወክት አይሁድ ጭምት ምናን መገን ላገተ ተማርሰታኢት እቅ፤ ያህይን እሳን ሜጡበ እክ ሀዕለኖሳት እቅ።

6 ህከ ዊን ረበንቶ ኡለተ ጉዕመንከስ ዘህተን «ጳፉ» ዬኖ ከተመ ኢልቶ ወክት «ባርዮሱስ» ዬኖ መቼ አይሁድቺ ኪላንቺ ደጎኡ፤ ሁኩ መንቺንኩ ክዘብየ ነብዬቺ እቅ።

7 እስን «ስርግዮስ ጳዉሎሴ» ዬኖ ገሻንቺን ሜጡበ ሄኦ እቅ፤ ሁኩ ገሻንቺንኩ መገን ላገተ ሞጮጮተ ሀሽ በርናባሰለከ ሳኦሊ እስቤቺ ገእሲሾ።

8 ጠዉ እኮጎሬ ግሪክ መን አፎን «ኤሊማሴ» ዩን ገኤኖ ኪላንቹ ባርዮሱስ ሁኩ ገሻንቹ አመዕንበገ ሀሽ በርናበሴንለክ ሰኦሌን ሀንበሰለሙ ጀመሮ።

9 እኮጎሬ «ጳውሎሴ» የመሞ ሳኦል ጠሊላ አያኒን ዊሞ ህከ መንቹ ቱክ ይ ለአን

10 «አት ተንኩትለክ ሂሉ ጠዉ ጉዕሙንኩ ዊሞሄ እልቢስ ቤቱ፤ ጡመርቹሃ ጉዕሚንከ ዲኑ፤ ቀርቶኔ ጌጥዬ ዋቀሃ ሾክሱ አጉርታንትበእንደ?

11 ቴሱ ሁኩዕኑን ቀርቶ አንገት ዋቀርታሄ፤ ህካን እኮቤቹሃ ቆቀ እክ ቀዋ ወክተሃ አር ኑር ለአንትበእ» ዬስ።

ወክትንከስ ጉንጃገለክ ቱንሰቶገ ዮርቹ እልስ እፍሾ፤ እስን አንገስ አፍ መሰገኖስ መነ መዲስ ሀሱ ጀመሮ።

12 ሁኩ ገሻንቹንኩ ቀርቶተኔሃ ተማርሰቶ ትምርቲን እጅብሲጩቤቹሃ ህከ ጠወ ለዕዮ ወክት መገኖን አመዕኔእ።

በርናባሰለክ ጳውሎስ ጲስድያን ሄኣ «አንጾከ» ኦሮኡስ

13 ህከኒቶ ኤተሮን ጳውሎስለክ ጃለስ መርከባን ኣግ «ጳፎስ» ዬኖ ከተሟቶ «ጵንፍልዩ» ዬኖ ባዶን ሄኣ «ጴርጌ» ከተመ መርቶኡ፤ ያህይ እሳቶ አደ እክ ዬሩሳሌመ ፈንቀል ኦሮዕዮ።

14 እኮጎሬ እስ ህከን ጴርጌ ከተሟቶ «ጵስድያ» ዬኖ ባዶን ሄዕዮ ዋሉ «አንጾከ» ዬኖ ከተመ ኢልቶኡ፤ ሰምበት በሬን መቶ አይሁድ ጭምት ምኒ ኣግ አፋዕልቶኡ። *

15 ሕግለክ ነብያኖ መጻፈ አነበቦቶ ኤተሮን ጭምት ምኒ ገሽታእሩ «አመኤ ኦሶ! መነ ሸዜነንተ ጠዉ ዮሀዕኔ ጎር ኩሌ» ይት እስቤቹ ሶኮኡ።

16 ህካን እኮቤቹሃ ጳውሎስ ኬዕይ ኡር ኡመት አንጋንተስ ቀቀሽ ጨለዮኖገ አዕይ «አዕኑ እስራኤል መኑለክ መገኑ ዋጅቲነንተ ኡመቱ! ከበ ሞጮጭዬ!

17 ከን እስራኤል ኡመት መገኑ ዋኔ አናኑኔ መጠር ግብጽ ባዶን ኮሀ እክ አፋዕልቶ ወክት ልግብ ኡመት አዕይ ሎረ ዋልቃንከስ ህከንቤቹቶ ፋሼእ።

18 ሸይሉ ዘማን ኢለ ኡለ ኡድማን አታዕሌስ። †

19 ህከኒቶ ኤተሮን ከነአን ባዶን ለመለ ደቦ ኡመት ቤሽ ኡለስ አሳሃ ረገእሲሾ።

* 13:14 ሰንበት በር፡- ዩ አይሁዳን ሆፍቹተ ዩሃን። 13:17 ፋል. 1፡7፤ 12፡51።

† 13:18 አታዕሌስ የኖሁ፡- መት-መቱ ሉህ ክታበት «አገርስ» ይታእ። 13:18 ዘኑ. 14፡34፤ ዘዱ. 1፡31። 13:19 ዘዱ. 7፡1፤ ኢያ. 14፡1።

20 ህከኒች ኤተሮን ሾል ጥብተ ኦንታዮ ዘማን ጌስ ነብዬች ሳሙኤል ወክቱ ኢሎተ ኢላ ዳኛኑት ገሸታገ አዕዮስ።

21 «እሰን ህከኒች ኤተሮን ዎመ አሰሰተ ጠዕምቶኡ፤ መገኑ በንያሜ ደቦች ቂስ ቤቱ ሳኦሌ ሸይሉ ዘመን ዎመ አዕዮስ።

22 ሳኦሌ ዎምነቲች ድሪሾች ኤተሮን ዳዉዴ ዎመ አዕዮስ፤ መገኑ ዳዉዴተኔሃ ገይኤ ቀልብገ ዮኢሃ እን ዬም ጠወ ጉዕመንከ አኦኖ እሴዬ ቤቱ ደዉዴ ደኤም፤ ይ መሰከሮስ።

23 ህከን መንች ዘሬች መገኑ ተብሴስ ላገ ሃሊን እሰራኤል መኒሃ ጡምሳንቹ ኢስ ኤቦስ።

24 ኢስ አሜቲዕነ ብርተ ጠመቃንቹ ያህይ እሰራኤል መኒሃ ጉዕሚንከ ጨብ ቶበት ፈንቀልት ጠመቀንታገ ተማርሰዮ እቅ።

25 ያህይ ሆጉስ ሹሎች ኤተሮን ሐሳሃ አዬት ይቲን ሰውይቲንታት? እን አሜተኖ ይቲን አገርቲንታሃበኦ፤ ጠወ እኮጎሬ እን ጫመስ ወደሩ ሂሮተ በቀአባሃ ኢች ኤተሮን አሜተኖ ዬእ።

26 «አዕኑ አብረሂም ዘሬች ከለቀንቲንታ አመኔ ኦሱትለከ መገኑ ዋጅቲንተ ኡመቱ! ጡም ሶህኑት ሶሃንቶኢሁ ኔሳህት።

27 ጠወ እኮጎሬ ዬሩሳሌማን ሄኦኦረለከ ሀለቃስ ኢስ ጡምሳንቹ እሁስ ደጎበኦ፤ ሰምበት በሬን እነበቤኖ ነብያከ መጻፈተ አጥራመቲዕናን እስ አሌን ፈረዶ ወክት ራጉስ ዊመኖገ አቶኡ።

28 ኢስ ሬሆተ ኢልሰኖስ መስተ ደግባጎሬሁ ገሻንቹ ጽላጦስ ሾስተ ኡጭቶኡ።

29 እስተኔሃ ከተበሞሃ ጉዕመንከ እት ሹልቶች ኤተሮን ሰቀለሞ መሰቀሊች ድሪስ ሞጎኡ፤

30 ጠወ እኮጎሬ መገኑ እሱ ሬሆች ኬሾስ።

31 ኢስ እሲን ሜጡበ ገሊላች ዬሩሳሌመ አሜቶሀኑኡተ ልግብ በር ለሌስ፤ እሰን ቲሱ ኡመት ብሬን እስተ ሞሰክረ።

32 እኦን አሜንቶም ሃዕሮ ተሸት ላገት መገኑ አናካተኔ ኦጎ ተብሴ ላገት

33 ኢስ ሬሆች ኬሲንከስ ህከ ተብሳሃ ኒን ኦሶንተስ ዊንሸዮኡ፤ ሁኩንን ደውድ መጻፋን ለንክ መዝሙራን

13:20 መሳ. 2፡16፤ 1 ሳሙ. 3፡20። 13:21 1 ሳሙ. 8፡5፤ 10፡21። 13:22 1 ሳሙ. 13፡14፤ 16፡12፤ መዝ. 89፡20። 13:24 ማር. 1፡4፤ ሉቃ. 3፡3። 13:25 ማቶ. 3፡11፤ ማር. 1፡7፤ ሉቃ. 3፡16፤ ያህ. 1፡20፤ 27። 13:28 ማቶ. 27፡22-23፤ ማር. 15፡13-14፤ ሉቃ. 23፡21-23፤ ያህ. 19፡15። 13:29 ማቶ. 27፡57-61፤ ማር. 15፡42-47፤ ሉቃ. 23፡50-56፤ ያህ. 19፡38-42። 13:31 ሶቀ. 1፡3።

እት ቤቴሃኤ፤ እን ከበር እሎንኬ!፤

የመም ከተበሞጋት።

34 ህትን ሸሙዕነ መገኑ ሬሆች ኬሽ ለልሶተ

ፈጠሊሊ አመዕነንቶ በረከተ

ደዉዴ አሴሚሃ ኣሳንክዕኔ፤ ይ ጠወዕዮኡ።

35 ህትን ደውድ መጻፋን ዎሎ ቤቸን

ፈጠሊሊ ካዲንቹክ ሎድ ኣዜን ሸሞተ ሰዕም ይታንትበኣ፤ የኖ።

36 ጠዉ እኮጎሬ ደዉድ ሄዕዮ ዘማኔን መገኑ ኢተኖገ ሆጉስ ሹሎች ኤተሮን ሬይ እናካንተሰን ሞገም ሸሞኡ።

37 እኮጎሬ መገኑ ሬሆች ኬሹሲሁ ሸሞበኣ።

38 ህካን እኮቤቹሃ አመኤ ኦሶ! ጨብ እጉረሙ ደገሞሁ ህከን ኢሲን እሁስ ተማርሴማህዕኔገ ደጌ።

39 ህትን እሲን አመዕነኖሁ ጉዕሙንኩ ሙሲን ኣሰሞ ሕጊን ነጠ ፋሎተ አታልበ ጨቢች ጉዕሚችን ነጠ ፋለኖ።

40 ህካን እኮቤቹሃ ነብያኖን ህት የመም ጠወአሞሁ ኢለኖህዕኔበእገ እገዕርዬ፤

41 እሰን

እዕኑ ቀለዴነንተሩ! ለዕዬ! ገረምሲጭዬ! በዕዬሁ!

መሰንትሰ አይ ኩሎህዕኔጎሬ

አመዕንቴንበ ሆጉተ

ዘማኔንከክዕኔ አኣም» የኖ ዬእ።

42 ጳውሎስለከ በርናባሰ ጭምት ምኒች ፋልተን ከ ጠወ አሜተኖ ሰምበት በሬተ ፈንቀሽት ኩልታገ መኑ ኡጭቶሰ።

43 ጭምት ምኒ መኑ ፋሎ ወክት ልግቡ አይሁዱሁ አይሁድ እምነቴን ፈንቀልቶእሩ ጳውሎስለከ በርናባሴ አዎንቶኡ፤ ጳውሎስለከ በርናባሰ ህከ መነ መገን ኣሰቶን ጠረኝት ሄኣገ ሸዘሰ።

44 ሳምንትሰ ሰንበት በር ከተማንከሰ ሄኣኖ መኒች ልግቡሰ ቀርች ላገተ ሞጮጮተ ጭምዬእ።

45 ጠዉ እኮጎሬ አይሁዱ ኡመትሰ በትኝ ለኦ ወክት ጢቅሰ ጳውሎስ ጠወአኖ ጠወ ግብ ጳውሎሴ ቦርሮቶኡ።

46 እኮጎሬ ጳውሎስለከ በርናባሰ መለልት «መገን ላገተ ሄጩን ክዕኔሃ ጠወኡ ሀሰሰኖ፤ ጠዉ እኮጎሬ እዕኑ ቶንጋምበኣ፤ ይቴን ዘላለሚሃ ጉዕሚንከ ሄኣኖ ሄኡ ገበእባሃ አቴን ገንንከክዕኔ ፈረዴንተቤቹሃ ነኡ ጌኝእዕን አይሁዳ እህበ መንቤቹ መርናም።

47 መሰንትሰ ቀርቼ «ኡለ ዳንገ ኢሎተ ኢለ ጡሙ ኤቦኖተ አይሁድ እህበ መኒሃ ኑሪ አዕዮንኬ» ይ አዘዢኔ ይቶኡ።

48 አይሁድ እህበ መኑ ህካን ሞጮጭቶ ወክት ሙንደኦኡ፤ ቀርቻ ላገንተ ሎርሰቶኡ፤ ዘላለሚም ሄኢሃ መጠረንቶእሩ ጉዕሙንኩ አመዕንቶኡ።

49 ቀርቻ ላገት ህከን ባዶን ጉዕማንን አልባዕልቶኡ።

50 አይሁድ አዎንሳኑት አይሁድ አመዕነቱ ቶጎ መገኑ ዋጅታ ቀባጣሙ ሜንቱለክ ሎርሎሩ መኑ አደሜኖገ አት ጳዉሎሴሃለክ በርናባሴሃ ኦርሸት ኢልታገ አት ህከን ባዲቻ ሸርት ፋሽቶኡ።

51 ጳዉሎሰለክ በርናባሰ ህከን መኒሃ ጡር እሆተ ሎከሰ ትበ ግግሽት እቆንዮም ከተመ መርቶኡ።

52 አመዕናኑት ሙንዲኖንለክ ጠሊሊ አያኒን ዊንቶኡ።

14

ጳዉሎሰለክ በርናባሰ «እቆንዮን» ከተመ መርቶገ

1 ህከኒቻ ኤተሮን ወዕና ሮሶገን ጳዉሎሰለክ በርናባሰ እቆንዮናን ዮ አይሁድ ጭምት ምኒ ኣጎኡ፤ ህከን ቤቾን ልግቡ አይሁዱለክ ግሪክ መኑ አመዕንቶተ ኢሊ ተማርሰቶኡ።

2 ጠዉ እኮጎሬ አመዕንትበ አይሁዱ አይሁድ እህበ መነ ኬሰ አመዕናኖ አሌን ብተተ ኬሶኡ።

3 ህካን እኮቤቹሃ ጳዉሎሰለክ በርናባሰ ቀርቻ ላገተ መለልት ጠወአን ልግብ ወክት ህከኔ አገርቶኡ፤ ቀርቼ አጅበተለክ አጅብሲሰኖ ጠወ አንጋንከሰ አታገ ወልቀተ ኣሰ እሰ አሰቶ ላገት ሀንቅ እሁሰ ለሊሰኖት እቅ።

4 ጠዉ እኮጎሬ ከተማንከሰ ሄዕዮ መኑ ለሙ አደ እክ መቱሰ አዱ አይሁድ አደለክ ደሩሰ አዱ አሳበ አደ እኮኡ።

5 ጠዉ እኮጎሬ አይሁዱለክ አይሁድ እህቡ ዎሉ መኑ ሀለቃንከሰ ሜጡበ እክ ጳዉሎሴለክ በርናባሴ አበ ኑሪሶተለክ ክኒን ቀሶተ ሀሶኡ።

6 ጳዉሎሰለክ በርናባሰ ህከ ጠወ ሞጮጭቶ ወክት «ልሰጥረለክ ደርቤታ» ዬኖ ልቃኑን ባድ ከተመተለክ አዘጋገኘከሰ ዮ ባዱ ሁንት መርቶኡ።

7 ህከን ቤቾን ተሸት ላገተ ዱዱብሰቶኡ።

ጳዉሎሰለክ በርናባሰ ልሰጥራንለክ ደርቤ ከተማን ተማርሰቶገ

8 ልስጥራን ሎከሰና፤ መቼ መንቹ ሄዕዮ እቅ፤ ኩ መንቹ እለሞች ኬሽና፤ ለእብሮቹ ሎካንከሰ ሃሞ ደገኖበኦ።

9 ኩ መንቹ ጳውሎስ ጠወእኖ ለፋዕል ሞጮጬኖት እቅ፤ ጳውሎስ ህከ መንቹ ቱክ ይ ለዕይ ጠጥሞተ አታልሲሰኖ አመዕነቱ ዮሰገ ለዕዮ ወክት

10 ሎረ ላጋን «ጌጥ ይት ሎካንከክ ኡር!» ዬ ወክት መንቹንኩ ኬዕይ ሃሙ ጀመር።

11 መኑ ጳውሎስ አዕዮ ጠወ ለዕዮ ወክት ልቃኦን አፎን «ሸርኬ መገናከት መነ አጉድ ኒቤቹ ድርቶኡ» ይት ሎረ ላጋን ጠወኦኡ።

12 እስን በርናባሴ «ድያ»* ይቶኡ፤ ህትን ልግብ ወክት ጠወእኖ ለእብሮቹ ሃ ጳውሎስ «ሄርሜነ» ይቶሰ።

13 ከተሟች አብሉን ሄዕዮ ድያ ሰገዳኖስ ምኒ ቂስቹ ዋርጃመተለክ ሸፍገ መክሴመ ቦብሉተ ከተመ ኣጌኖ ኡርቤቹ ኡብ ኡመቲን ሜጡብ ጳውሎስሃለክ በርናባሴሃ ክትሞ ሆንጠህሶተ ሆሾ።

14 ጠወ እኮጎሬ ጳውሎስለክ በርናባሴ ህከ ጠወ ሞጮጮቶ ወክት ህልቅ ኦድኑስ ፊልት ያርተን መንቤቹ ደጉደን መርት

15 «ኮ መነ! ከ ጠወ ሚሃ አቴነነታት? ነኡ ክዕኔገን ዮሞሃ መነ፤ ነኡ ከቤቹ አሜንቶሚሁ አዕኑ ከን ተሰ ጠዋች ገበላ ዋልቲን ሰማ፤ ኡለተ፤ ባረለክ ኣዜንከሰ ዮርቹ ጉዕመንከ ከለቆለክ ሄኣኖ ካሊቅ አደ ፈንቀልቲነተገ ተሸት ላገተ ኩልኖህዕኔታት።

16 ህጎ ዘማኔን ኡመቱ ጉዕመንኩ ገይሰ ሃሸአቶገ ሄኦተ መገኑ ጌኝ አዕይ አጉርሰ።

17 እሁን ቤሉ እስ ጎደበ ላፈ መገኑ እሁስ መስከረኖ ጡመ ሆጉተ አኡ አጉርበኦ፤ መሰንትስ ሰሜች ጤነ ኡበኖገ አዕዮህዕኔ፤ ጡመ አቶተ ኣሴህዕኔ፤ እቻንለክ ሙንዲኖን ቀልብክዕኔ ሰገብተ ዊንሼእ» ይቶኡ።

18 አሳበት ኬንከ ጠወኦጎሬሁ ኡመቱ እሳሃ ክትሞ ሆንጠህሳበኦገ ከንቶኢሁ አበ ኦርጨቀንቲት።

19 እኮጎሬ አይሁዱ አንጾክለክ እቆንዮን ከተሟች ህከ ቤቹ አሜት ኡመት ሂለ አድመተ አማልሲስ ጳውሎስ ክኒን ቀስ ሬዮ አጉጃንስ ጎሾሸት ከተሟች አብል ፋሽቶኡ።

* 14:12 ዲያ፡- «ድያ» ዬኖሁ ግሪክ መን አፎን ግሪክ ባዶን ሄኣ ልግብዮ ከላኖች ጉዕሚችሰን ሎረሃን። «ሄርሜነ» ዬኖሁ ግሪክ ባዶ መን አፎን «ድያ» ዬኖ ሎረ ከላንቺሃ ሶቀማኖ እቅ። 14:15 ፋል. 20፡11፤ መዝ. 146፡6።

20 ጠዉ እኮጎሬ አዎንታሰሩ አሜት መዴሰ ኡርቶ ወክት ኬዕይ ከተመ ኣጎ፤ ለንክ በር በርናባሴንን ሜጡበ «ደርቤ» ዬኖ ከተመ ኦርዕዮ።

ጳውሎስለክ በርናባሰ ሶርይ ባዶን ዮ አንጾክ ከተመ ፈንቀልት መርቶገ

21 ጳውሎስለክ በርናባሰ «ደርቤተ» ዬኖ ከተማን ተሸት ላገተ ተማርሰ ልግብ መነ ኢሰ አዎንታረ አቶኡ፤ ህከኒች ኤተሮን ልሰጥረለክ እቆንዮን ህግ «አንጾክ» ዬኖ ከተመ ፈንቀልት መርቶኡ።

22 ህከን ከተማን ዮ አመዕናኖ ቀልብ ጠረኝሰን፥ አመዕነቶንከሰ ጠረኝት ሄኣገ ሸዘንለክ «መገን ዎምነቱ ኣጎናተ ልግብ ኦርሸተ ቶጉ ሀሰሰኖ» ይተን ተማርሰታኢት እቅ።

23 እሰን ቤቸን ቤቸን ዮ አመዕናኖተ ባልቅ ሾንቶኡ፤ ሶመንቶችለክ ዱኣ አቶች ኤተሮን እሰ አመዕንቶ ቀርቺሃ ኤገተ ህግሰ አቶኡ።

24 እሰን «ጽሰድዮ» ዬኖ ባዲን ህግ «ጽንፍልዮ» ዬኖ ባዲ አሜቶኡ።

25 «ጴርገ» ዬኖ ከተማን መገን ላገተ ተማርሰቶች ኤተሮን «አጣልዮ» ዬኖ ከተመ መርቶኡ።

26 ህከንቤቸች መርከባን ኣግ ሶርያን ዮ አንጾክ ፈንቀልቶኡ፤ ሁኩ አንጾክ ከተሙ፤ ቴሱ አት ሹልቶ ሆጎተ ፋልቶ ወክት መገን ኣሰቶተ ህግሴን ኤገተ ኣሴመሰሃ ቤቹ እቅ።

27 ህከ ቤቹ ኢልቶ ወክት አመዕናኑተ ጉዕመንከ ሜጡበ ጭምአት መገኑ እሳን ሜጡበ አዕዮ ጠወ ጉዕመንከለክ አይሁደ እህቡ መኑ መገኑ አመዕንቶተ ሀት አዕይ ዎቃ ፈቺሰጎር ኩልቶኡ።

28 እሰን ህከኔ አመዕናኖን ሜጡበ ልግብ ወክት አፋዕልቶኡ።

15

ዬሩሳሌማን እኮ ኦገትተኔሃ

1 መት-መቱ መኑ ይሁድ ባዲች አንጾክ ከተመ መርት «ሙሰ ሕግገ ጡርከመንቴንበጎሬ ጡምቴነንተበኣ» ይት አመዕናኑተ ተማርሱ ጀመርቶኡ።

2 ጳውሎስለክ በርናባሰ ህከን ጠውተኔሃ መኒንከሰ አበ ብተንት ኦደንቶቤቺሃ እሰለክ ህከን ባድ አመዕናኖች መት-መቱ ዬሩሳሌማን ዮ ሶቀማኖቤቹለክ ባልቅቤቹ መርታገ ወሰነሞ።

3 ህኣን እኮቤቺሃ እሳንከ አመዕናኑት ዎቄሃሰ ሸንቅተ አት ሶካንሰ አይሁደ እህቡ መኑ ኢሰ አደ ፈንቀሉሰ ኩልተን ፍንቄንለክ

ሰማርያ ባዲን ህጎኑ፤ ሁኩ ጠዉ አመዕናኑተ ጉዕመንከ አበ ሙንዲሲሾ።

4 እሰን ዬሩሳሌመ ኢልቶ ወክት አመዕናኑት፤ አሳበትለከ ባልቀት «ሀበይ ወገሬቲን አሜቲን» ይት ቶሳሰ፤ ህትን መገኑ እሳን ሚጡበ አዕዮ ጠወ ጉዕመንከ ዬሩሳሌማን ዮ መኒሃ ኩልቶኡ።

5 ጠዉ እኮጎሬ ፈርሳዌ አዲች አመዕንቶ መኒች መት-መቱ ኬእ «ህከ አይሁደ እህበ መነ ጡርከመንታገለከ ሙስ ሕገ አገርታገ እኡ ሀሰሰኖ» ይቶኡ።

6 አሳበትለከ ባልቀት ህከን ጠውተኔሃ አማዕለንቶተ ጭምይቶኡ።

7 አበ ኦዶኢች ኤተሮን ጴጥሮስ ኬዕይ «አመኤ ኦሶ! አይሁደ እህቡ ኡመቱ ኢ አፌች ተሸት ላገተ ሞጮጭት አመዕንቶተ መገኑ ሄጭ ኤሳሃ ክዕኔ በሊች መጠሩስ ደጌነነት።

8 መን ቀልብ ደገኖ መገኑ ጠሊለ አያኒን ኔሳሃ ኣሴ ሃሊን እሳሃ ኣሰን መስከሮኡ።

9 ቀልብስ አመዕነቲን ነጠ አዕዮቤቺሃ እሰለከ ኒ በላን መት አደደመታ አዕዮበኦ።

10 ህገን እኮች አናከኔለከ ነኡ እጅኖተ አታልንበ እጅነተ አመዕናኖተ እጅሲሴን ሚሃት መገኑ ፊተንቲነንታት?

11 ጠዉ እኮጎሬ ነኡ ጡምናሚሁ እሰገን ቀርቻ ኢስ አያኒን እሁስ አመዕንናም» ይሰ።

12 ህከ ወክት ጭምዬ መኑ ጉዕመንኩ ጨለ ዬእ፤ ህትን በርናባሰለከ ጳውሎስ አይሁደ እኮበእ መን በላን እሰ አዲን መገኑ አዕዮ አጀበተለከ አጀብሲሰኖ ጠወ ጉዕመንከ ኩልተን ሞጮጭታኢት እቅ።

13 እሰን ጠወእ ሹልቶች ኤተሮን ያቁብ ፈንቀሽ «አመኤ ኦሶ! ህንዴ ሞጮጭዬ!

14 መገኑ አይሁደ እህበ መኒች ሱዕሚንከስ ገአመኖ ኡመት በሊችሰ መጠር ወዕና ዳንዴሰገ ሰሞን ኩሎኡ።

15 ከን ሰውቲን ነብያከ ሳገት መቱ እክ ኣገንቀንታኦ፤ እሰን ህት የመም ከተባሞሃን፡-

16-17 «ከኒች ኤተሮን ፈቆ መኑለከ ሱዕሚንከኤ ገአንቶእሩ አይሁደ እኮበእሩ ኡመቱ ጉዕመንኩ ኤሳሃ ሀሳገ ፈንቀል አሚታም፤

ድጀሞ ደዉዴ ምኒ እጃራም፤

ድጀሞሲንከ ለንኪሃ ፈንቀሽ ኡርሳም።

18 ወዕኔችን ጀመር ካን ጉዕመንከ ለሊሾም እን መገኑ ህት ያሚት።

19 «ህካን እኮቤቼሃ ኢ ሰውቱ መገን አደ ፈንቀልቶ አይሁደ እህበ መነ ኦርንሱንከ።

20 ህከን ወጥ ሸርኬተ ክትሜመ እቸተ እቶኖቹ፤ ዝነተ አኢቶ፤ ለንገቅ ሬዮ ለል ማለ እቲቶለከ ቄጉ አጊቶ አገዕርዬ» ይን ከተንባሰ።

21 መሰንትሰ ልግብያ ዘማኒች ኬሽ ሙሲ ሕጋን ሰምበት በር ጭምት ምናን አነበበመኖት እቅ፤ ከተማን ጉዕማንን ዲዲብሰመኖ» ይእ።

አይሁደ እኮበእ አመዕናኖተ ሶሄመ ደብዳቤተ

22 ህከኒች ኤተሮን አሳበትለከ ባልቀት አመዕናኖን ጉዕሚንን ሜጡብ ጭምይት በሊችሰ ቀዉ መነ መጠርት ጳዉሎሴንለከ በርናባሴን ሜጡብ አንጾክ ከተመ ሶኮተ አማዕለንቶኡ፤ ህካን እኮቤቼሃ አመዕናኖ በሊች ጡመ አዎንሳኖች «በርሳባሴ» ዬኖ ይሁደለከ ሲላሴ መጠርቶኡ።

23 ከተበንቶ ደብዳቤተ እሰ አንጋን ሶኮኡ፤ ደብዳቤሰን «ነኡ አመክዕኔ ኦሱት አሳበትለከ ባልቁ፡- አንጾክ ከተማን፤ ሶርይለከ ክልቅይ ባዶን ሄኤነንተ አይሁድ እህቡ መን አድረ እኬንተ አመኔኦሱተ ወገሬቲ ይናንክዕኔ።

24 ኒ በሊች መት-መቱ መኑ ነኡ ሶንኩዕነ ክዕኔቤቹ መርት ኩልቶህዕኔ ላጋን ኦርሶህዕኔገለከ ሻዝሶህዕኔገ ሞጮጭኖም።

25 ህካን እኮቤቼሃ ሜጡብ ጭምይኖሚች ኤተሮን መጠርን ኢተንቶ አመኔኦሶች በርናባሴለከ ጳዉሎሴ ሜጡብ ክዕኔቤቹ ሶንኮተ ኢተቀሞም።

26 በርናባሴለከ ጳዉሎሰ ቀርቼሃኔ መሲህ ኢሰ ሱዕምተኔሃ ገዉሰ ህግሰ አቶእረ።

27 ይሁድለከ ሰላሰ ነኡ ከተንቦሚሃ ገይሰ አፎን ኩልታህዕኔገ ሶንኮም።

28 ህካን እኮቤቼሃ ከኒች ዎሮ አዲን ዮ ሀሰሰኖ ጠወ ቤሉ ዎሉ ኬዕመኖ ጠወ እጅሲንሳንክዕኔበእገ ጠሊሉ አያኑለከ ነኡ ኢተቀሞም።

29 ሸርኬተ ክትሜመ ማለ እቶኖቹ፤ ዝናች፤ ለንገእ ሬዮ ለል ማለ እቲቶለከ ቄጉ አጊቶ አገዕርዬ፤ ካን ጉዕመንከ አገዕርቲንተጎር ጡመሃን፤ ቲሱ ወገሬቲን ሄዕዬ» ይት ከተቦኡ።

30 ህክኒች ኤተሮን ሶሄመ መኑ ወገሬቲን ሄዕዬ ይት አንጾክ ከተመ መርቶኤ፤ እሰን አመዕናኑተ ጭምእት ደብዳቤተ ኣቶኤ።

31 አመዕናኑተ ደብዳቤተ አነበሶ ወክት ሶሄመ ሸዘናን አበ ሙንደኦኤ።

32 ህትን ይሁድላክ ሰላሰ ነብያከተ እኮቤቺሃ አመዕናኑተ ልግብየ ጠዊን ሸዘ ጠረኝሶኤ።

33 እሰን ህክኒ ዮ አመዕናኖን ቀዉ በር ሜጡበ አፋዕልቶች ኤተሮን «ወገሬቲን ሄዕዬ» ይት ሶኮ መንቤቹ ፈንቀልት መርቶኤ።
*

34 [ጠዉ እኮጎሬ ሲላሰ ህክኒ ፈቆተ ሄዕላች።]†

35 እኮጎሬ ጳውሎስላክ በርናባሰ ቀዉ በር አንጾክ ከተማን ዲንክት ዎሎ ልግብየ አመዕናኖን ሜጡበ ቀርቶ ላገተ ተማርሰተን ተሸት ላገተ ዱዱብሰቶኤ።

ጳውሎስላክ በርናባሰ አደ እሁሰ

36 ቀዎ በሬች ኤተሮን ጳውሎስ በርናባሰ «አም ከኒች ብርተ ቀርቶ ላገተ ተማርሰኖም ከተማን ጉዕማንን ዮ አመዕናኑት ህት ዮ ጎሬ ዳንድኖ» ዬእ።

37 በርናባሰ ህትን «ማርቆሴ» ዬኖ ያህይ እሳን ሜጡበ መሮተ ኢቲእ።

38 ጠዉ እኮጎሬ ጳውሎስ እሳን ሜጡበ መሮተ ሀሾበእ፤ መሰንትሰ እሰ «ጵንፍልያ» ዬኖቤችን እሳች አደ እክ ሆጎቤቹ መረዕነ ፈቆቤቺሃት እቅ።

39 ህክን ጠዊን አበ ኦዶኢች ኤተሮን መለዕለንቶኤ፤ ህካን እኮቤቺሃ በርናባሰ ማርቆሴ ኣእ መርከባን ኣግ ዊን ረበንቶ «ቆጵሮሰ» ዬኖ ባዱ መርቶኤ።

40 ጠዉ እኮጎሬ ጳውሎስ ሰላሴ መጠሮ፤ አመዕናኑት ጳውሎሴ ቀርቶ ኣሰቶተ ኤገተ ኣቶኢች ኤተሮን ኦሮዕዮ።

41 እሰን «ሶርየለክ ክልቅየ» ዬኖቤችን ዮ አመዕናኑተ ጠረኝሰን ሃመኖ እቅ።

16

ጥማቶስ ጳውሎስንላክ ሰላሴን ሜጡበ እሁሰ

* 15:33 መት-መቱ ሉህ ክታበት ዎሊሽ 33 ዮኢህ በርግታበእ። † 15:34 መት-መቱ ሉህ ክታበት ዎሊሽ 34 ዮኢህ በርግታበእ። 15:38 ሶቀ. 13፡13።

1 ጳውሎስ «ደርቤተለከ ልሰጥረ» ዬኖቤቹ አሜቸ፤ ህክኔን «ጥማቶሴ» ዬኖ አመዕናንቹ ሄዕዮ እቅ፤ አመስ አይሁድተ አመዕናንቹ እቅ፤ እኮጎሬ አኑስ ግርክቸሃ እቅ።

2 እሲንከ «ልሰጥረለከ እቆንዮን» ዬኖቤቸን ሄኣ አመዕናኖ አኔን ጡሙ ሱዕሙ ሄዕዮስ እቅ።

3 ጳውሎስ ጥማቶሴ አእ ሃሞተ ሀሾቤቹሃ ጡርከሞስ፤ መሰንትሰ ህከን ቤቸን ሄኣ አይሁዱ ጉዕሙንኩ ጥማቶሴ አኑ ግርክቹ እሁስ ደጋቤቹሃት እቅ።

4 ጳውሎስለከ ሲላስ ከተመ ዘህተን ዬሩሳሌም ከተማን ዮ አሳበትለከ ባልቀተ ጠወእ ኡርሶ ትዛዝ አመዕናኑት አገርታገ ሸዛኢት እቅ።

5 ህካን እኮቤቹሃ አመዕናኑት ጠረኝተን በሬን በሬን ወሊንሹሰ በተአን መረኖት እቅ።

ጳውሎስ መቄዶን ባዱ ኦሮኑተ ገአሙስ

6 ህትን እስ እስይ ባዶን መገን ላገተ ኩልታበእገ ጠሊሉ አያኑ ከማንሰ ፍርግይለከ ገለትይ ባዲን ህጎኡ።

7 «ሚሰዩ» ዬኖ ባዱ ኢልቶ ወክት ቢታንዩ ባዱ መርቶተ ሰውይቶኡ፤ ጠወ እኮጎሬ ኢስ አያኑ ህከበ መርታበእገ ከሞስ።

8 ህካን እኮቤቹሃ እስ ሚሰይ ባዲን ህግ ጢሮአድ ከተመ መርቶኡ።

9 ህካን እኮቤቹሃ ሀንከዕርተ መቲ መቄዶን መንቹ ኡር «መቄዶን አሜት ሀዕልኔ» ዮን ኡጨኖሃ ጳውሎስ መናማን ለዕዮ።

10 ጳውሎስ መናማን ለዕዮች ኤተሮን ነኡ ህከ ወክትንከ መቄዶን መርኖተ ቅጥይኖም፤ መሰንትሰ ነኡ ህከኔ ዮ መኒሃ ተሸት ላገት ኩልኖተ መገኑ ገኡስ ደንጎምቤቹሃት እቅ።

«ሊድያ» ዬኖ መንቹት መሲሂን አመዕንቶገ

11 ጢሮአዲቸ መርከባን አንግ «ሳሞትራቄ» ዬኖቤቹ ኢልኖም፤ ላንክ በር «ናጵሌ» ዬኖቤቹ መርኖም።

12 ህከንቤቹቸ ኬዕን ፍልጵሰዩስ ከተመ ኢልኖም፤ ፍልጵሰዩሱ መቄዶን አዉራጂሃ ሎረ ከተመለከ ሮም ባድ ዋም አንጋን ጠገሞሃ እቅ፤ ነኡ ህከን ከተማን ቀዉ በር ዱንክኖም።

13 ህትን ሰምበት በር ከተሟች አብል ዱኣ አቶተ ጭምይታቤቹ ዮኢሃ አጉጃኔቤቹሃ ፋልን ዛዘኖ ዊ መድ መርኖም፤ ህከኔ አፋዕልን ጭምይቶ ሜንቲሃ መገን ላገተ ተማርሰኖም።

14 ህከኔ ሞጮጭታ ሜንቲቸ መት ትያጥሮን ከተሟች አሜቶ ሰመ አጉደኖ ብሽ ኦድኑተ ነገዳ መገኒሃ ሰገዳ «ሊድዮ» ዬኖ

መንቹተ እቅ፤ ጳውሎስ ጠወኣኖርቹ ኣጥራመቶተ መገኑ ቀልብሴ ፈኛ።

15 እሴን ምንሴ መኒን ጉዕሚንን ሜጡበ ጠመቀንቶች ኤተሮን «ቀርቾ መገኖን ኣመዕኔሚሃ እኮሚች ምኒኤ ኣሜቴን ኣፋዕልዬ» ይት ጠረኝስ ኡጭቶኔቤቺሃ መርኖም።

ጳውሎስለከ ሲላስ ፍልጽሰዩሰ ከተማን ኡሱረንቶገ

16 ነኡ መቼ በር ዱኣ ኣኤኖ ቤቹ መርነኒን ኪልታገ ኣኣኖ ዶርረኖ ዱሩ ዮሴ መት ካዲንቹት ሀፍቱት ዎቃን ደቀንቶኔ፤ ህት ሀፍቱት ኪልተን ገሽታሴሀኡተ ልግብ ብረ ኤባእተ እቅ።

17 እሴን ጳውሎስለከ ኔሳሃ ኣዎንተን «ኩ መኑ ሎረ መገንተ ካዲመ፤ እስ ጡሚኖ ዎቃሃ ክዕኔሃ ኩልታህዕኔረ» ይተን ያርታኢት እቅ።

18 ሀካንን ልግብ በር ኣቶኡ፤ ጠወ እኮጎሬ ጳውሎስ ኡሙዕር ኤተሩ ፈንቀል ለዕይ ዶርረኖ ዱሩ «መሲህ እስ ሱዕሚን እሴች ፋልቶተ ኣዘዛንኬ» ዩኣ፤ ህከ ወክትንከ ዶርረኖ ዱሩ ፋሎ።

19 እኮጎሬ ገሻኑሴ ብረ ደዕተ ዎቆሁ ሙርተኡስ ደጎ ወክት ጳውሎስለከ ሲላሴ ኣፍ ጌቤበ ጎሾሽተን መስት ሹመ ቤቹ ሆንጠህሶኡ።

20 እስን ሮም ዳኛኖ ብርተ ሆንጠህሶ «ኩ መኑ ኣይሁድ መነ እከን ከተማንከኔ ብተተ ኬሳኢት።

21 ነኡ ሮም ባድ መኑ ቶንጎተለከ ኣዕኖተ ሴሩኔ ኣዘዘባሃ ሮሰሳኔት» ይቶኡ።

22 ኡመቼ እስ ኣሌን ጭምይት ኬኦኡ፤ ዳኛኑት ጳውሎስለከ ሰላሴ ኦድኑተ ቃርቶሳች ኤተሮን በርቲን ዎቀርታገ ኣዘዘኡ።

23 እበ ዎቀርቶች ኤተሮን ኡሱር ምኒ ኣግስ ኡሱር ምኒ ዘበኝ ጠረኝ ኣገረኖገ ኣዘዘኡ።

24 ሁኩ ኡሱር ምኒ ዘበኝ ትዛዝ ቶጎች ኤተሮን ኣዘ ክፍለ ኣግሽ ሎከስ ሀቃን ኡሱር።

25 ሀንከዕሬ በላን ጳውሎስለከ ሰላስ ዱኣ ኣተንለከ መዝሙረ ዘመርተን መገኑ ገለትጭታኢሃ ዎሉ ኡሱራመ መኑ ሞጮጨኖሳት እቅ።

26 ድንገቲን ኡሱር ምኒ ቀበቡ ሌንቄቀኖ ኢለ እቡ ኡለ ሌንቄቄ እኮ፤ ህከ ወክት ኡሱር ምኒ ጡፋ ጉዕሙንኩ ሚጦረ ፈንተዕዮ፤ ህትን ጉዕምስ ሰንሰለቱ ሂርተዕዮ።

27 ኡሱር ምኒ ዘበኝ ግስኛች በቅይ ኡሱር ምኒ ጡፋ ፈንተዕያን ለዕዮ ወክት ኡሱረኝ ፋሽኢቶኢሃ ኣጉጃንስ ገወሰ ሾተ ብስ ኬሾ።

28 ጠዉ እኮጎሬ ጳዉሎስ «ጉዕሙኩኔ ከኔ ዮምቤቺሃ ገዉክ ሚርቶት» ይ ሎረ ላጋን ያር ከሞሰ።

29 ህትን እስ መብራት አፍሲሽ ኣእ ኣዝ ጠጡተ ደጉጅ ኣግ ሁጠን ጳዉሎሴለከ ሰላሴ ብሬን ኡቦ።

30 እሰንተ ኣብል ፋሽ «ቀርቻኑኤ! ኣን ጡሞተ መ ኣኡ ሀሰሰኖኤ?» ይ ጠዕሚሰ።

31 እሰን «ቀርቻ ኢሳን ኣመዕንቶንትጎር ኣትለከ ኪ ሞኒ መኑሁ ጡሞቲነንተ» ይቶሰ።

32 ህትን እስ ቀርቻ ላገተ እሲሃለከ ሞኔሰ ዮ ኣበርሲህሰ ኩልቶኡ።

33 እስ ህከ ወክትንከ ሀንከዕሬን እሰተ መስኬዕይ ጡላሰ ኣንሽ ኣበርሰንከሰ ሚጡብ ጠመቀሞ።

34 ህከኒቻ ኤተሮን ጳዉሎሴለከ ሲላሴ ሞንሰ ኤብ እቸተ ሆንጠህቮ፤ ህትን እስለከ ሞንሰ መኑ መገኖን ኣመዕንቶቤቺሃ መንደኦኡ።

35 ጠዉ እኮጎሬ ለንክ በሬ ሱጽተ ከተመሰ ገሽታሩ «ህከ መነ መርቶተ ገፈሬ» ይት ፖሊሰተ ሶኮኡ።

36 ኡሱር ሞኒ ዘበኝቹ «እዕኑ ገፈረንቶኖተ ዳኛኑት መነ ሶኮኡ፤ ህካን እኮቤቺሃ እዕኑ ቴሱ ፋልቲን ወገሬቲን ኦርዕዬ» ይ ጳዉሎሴሃ ኩሎ።

37 እኮጎሬ ጳዉሎስ «ነኡ ሮም ባድ መነ እንከን መቲርቹሃ ቤንሱዕነ ፍርድ ቤሉ ኡመት ብሬን ዎቀርት ኡሱር ሞኒ ኣግሶኔ፤ ህትን ቴሱ ማጠም ፋልናምገ ኣታኔትንዶ? ፋልናምበእ! እስ ገዉሰ ኣሜት ፋሽቱኔ» ይሰ።

38 ፖሊሰት እስ ይቶ ላገተ ዳኛኖተ ኩልታንሰ ዳኛኑት ጳዉሎሰለከ ሰላሰ ሮም ባድ መነ እሁሰ ሞጮጮቶ ወክት ዎጅቶኡ።

39 ህካን እኮቤቺሃ ዳኛኑት ኣሜት «ቤንሶም» ይት ኡሱር ሞኒቻ ፋሽት ከተሚቻ ፋልት መርታገ ኡጮቶኡ።

40 ጳዉሎሰለከ ሰላሰ ኡሱር ሞኒቻ ፋልት ሊድያ ሞኒ ኣጎኡ፤ ህከኔን ኣመዕናኑት ሸዝ ጠረኝሰ ኣጉርት መርቶኡ።

17

ተሰሎንቄን ኬኦ ብተተ

1 ህከኒቻ ኤተሮን እሰን «ኣንፊጶሊሰለከ ኣጶሎኖ» ይኖ ከተሚን ህግ ተሰሎንቄ ከተመ ኣሜቶኡ፤ ህከኔን ኣይሁድ ጭምት ሞኑ ሄዕዮ እቅ።

2 ጳውሎስ ወዕና ሮሾገን አይሁድ ጭምት ምኒ ኣጎ፤ እሰን እሳንከ ሰሱ ፎሎጭ በር መገን ላገተ ጠሊሊ መጻፊ ኣዚኛ ኣነበበን እሳን ሚጡበ ኩለኖሳት እቅ።

3 ህትን መሲሁ ኦርሸተ ቶጉለከ ሬሆኛ ኬኡ ሀሰሰኖሰገ ሀንቅ እሁሰ ለሊሽ ኩለን «ኩን ኣን ኩላንክዕኔ ኢሰ መሲህት» የኖ እቅ።

4 ህካን እኮቤቺሃ አይሁዲኛ መት-መቼሰ ላገሰ ኣጋንሰ አመዕንት ጳውሎስንለከ ሲላሴን ሚጡበ እኮኡ፤ ህትን መገኒሃ ሰገዳ ልግቡ ግሪክ ባድ መኑለከ ከተማንከሰ ለሊቶ ሚንቱ ላገሰ ሞጮጭት እሳን ሚጡበ እኮኡ።

5 ጠዉ እኮጎሬ አመዕንትቡ አይሁዲ ምቀኝት ሆጉት የበእ መነ ዋቄኛ ጉዕሚኛን ጭምኣት ልግብ መነ ሂላ አማልተ አማልሲሰ ከተማንከሰ ብተት ኬኣገ አቶኡ፤ ጳውሎስለከ ሲላሴ ፋሽት ኡመቲሃ ኣቶተ ሀሰ «ኢያሶን» ዬኖ መንኛ ምኒ ረቦኡ።

6 ጠዉ እኮጎሬ እሰተ ሀሰ ሆጎ ወክት ኢያሶንለከ መት-መቼ አመዕናኑተ ከተም ሹማተ ሆንጠህሶተ ጎሾሽተን መሰቶኡ፤ ህትን «ኩ መኑ ጉዕመንከ ባዲ ኦርሳእረ፤ ህትን ቴሱ ኒ ከተመ አሜቶኡ።

7 ኢያሶንን ምኑንከሰ ቶጎሰ፤ ህትን ኢሰ ዬኖ ዋሉ ዋሙ የኔ» ይት ሮም ባድ ዋም ትዛዝ ግቦእረ» ይት ያርቶኡ።

8 ኡመቼለከ ከተም ሹመት ህከ ጠወ ሞጮጭቶ ወክት አበ ጨነቀንቶኡ።

9 እሰን ኢያሶንለከ ዋሉ መነ ሩብት ገእሲሰ ገፈርቶሰ።

ጳውሎስለከ ሲላሰ «ቤርየ» ዬኖ ከተማን ተማርሰቶገ

10 ህከ ወክት አመዕናኑት ጳውሎስለከ ሲላሴ ሀንከዕሬን «ቤርየ» ዬኖ ከተመ ህርሲሶኡ፤ እሰን ህከ ቤቹ ኢልቶገን አይሁድ ጭምት ምኒ ኣጎኡ።

11 ህከኔ ሄኑ አይሁዲ ተሰሎንቄ ከተማን ሄኣ አይሁዲኛ በትሰ ጡሙ ቀልቡ የሰቤቺሃ ጳውሎስ ዬ ጠዉ ሀንቅያ ጎሬ ደጎተ በሬን በሬን ጠሊሊ መጻፊ መረመርተን ላገሰ አበ ሙንዲኖን ቶጎኡ።

12 ህካን እኮቤቺሃ እሳኛ ልግቡሰ አመዕንቶኡ፤ ልግቡ ግሪክ ቀጣጣሙ ሚንቱለከ ልግቡ ግሪክ ጎኑ አመዕንቶኡ።

13 ጠዉ እኮጎሬ ተሰሎንቄ ከተማን ሄኑ አይሁዲ ጳውሎስ ቤርይ ከተም መኒሃ መገን ላገተ ኩሎገ ሞጮጭቶ ወክት ህከ ቤቹ አሜት መነ ሂላ አማልተ አማልሲሰ ኡመቼ አሉሰ ኬእኖገ አቶኡ።

14 ህከ ወክትንከ አመዕናኑት ጳውሎስ ደዕል ባር መድ ኦርኦኖገ አቶኡ፤ እኮጎሬ ሲላሰለከ ጥማቶሰ ቤርያን ፈቆኡ።

15 ጳውሎስ ህርሲስ አቲን ከተመ ኢልሶ መኑ «ሰላሰለከ ጥማቶስ ደዕልት ኢቤቹ አሜቱን» ዬ ጳውሎስ ሶህኑተ ኣእት ቤርዮ ፈንቀልቶኡ።

ጳውሎስ አቲን ከተም መኒሃ ጠወዕዮገ

16 ጳውሎስ አቲን ከተማን አፋዕል ሲላሴለከ ጥማቶሴ አገረን ከተማንከሰ ሽርኬተ ሰገዳኖርቹ ዊሞሀ ለዕዮ ወክት ቀልቤንከሰ አበ ኡሙዕሪኡ።

17 ህካን እኮቤቹሃ ጭምት ምኔን አይሁዲንለከ መገኒሃ ሰገዳ መኒን ጉዕመ በር ጌባን ደቀመኖ መኒን ጠወአኖት እቅ።

18 «ኤፒኮርሰለከ እስቶይኮ» ዬኖ ኤንኬዕናመት ጳውሎሴቤቹ አሜተን ኦደንታኢት እቅ፤ መት-መቱሰ «ኩ ዛንቁራንቹ መ ዮተ ሀሾኡ?» ይታኢት እቅ፤ ህትን ዋሉሰ ፈንቀሽት «ደገሞበእ መገኒሃ ጠወአኖ አጉደኖት» ይታኢት እቅ፤ ህካን ይቶ መሰት ጳውሎስ ኢሰ ሬሆች ኬእ ጡመ ዱዱቡ ኩሎሰቤቹሃት እቅ።

19 እሰን ጳውሎስ ኣእት «አርዮስፋጎስ» ዬኖ ቆርን ሄአኖ ኦገትቤቹ ኤብ «ኩ እት ኩልታንትኔ ሃዕሮ ጠወ መርቹሃጎሬ ደንጎተ አታልናምንደ?

20 ኩ እት መጫትኔ ሃዕሮ ጠወ ጠወአንቲሁ መሃጎሬ ደንጎተ ሀንጎምቤቹሃ መሃጎሬ ኩልኔ» ይቶኡ።

21 መሰንትሰ አቲን ከተም ጉዕሙንኩ መኑለከ ህከን ቤቸን ሄአ ዋሎ ባድ መኑ ሃዕሮ ጠወ ጠወአንለከ ሞጮጭተን ሆሰ ቤሉ ዋሉ መቱርቹሃ አታበእረ እቅ።

22 ህካን እኮቤቹሃ ጳውሎስ «አርዮስፋጎስ» ዬኖ ኦገት ብሬን ኡር «አቲን መነ! ጉዕማንከ አዲን ሀይማኖቱ ዮህዕኔ መነ እሁክዕኔ ደጎም።

23 ከተመክዕኔ ዘሀን አዕኑ ሰገዳነንተ ቤቹ ለዕዮም ወክት ደገሞበእ መገኒሃ የመም ከተበሞሃ ክትም ጠረጴዛ ደጎም፤ ቲሱ ህከ ደጎኑዕናን ሰገዳነንታሃ አን ኩላንክዕኔ።

24 «መገኑ ኡለተለከ ኡለ አሌን ዮኢሃ ጉዕመንከ ከለቆአሃን፤ እሰን ሰሜለከ ኡለ ቀርቹ እኮቤቹሃ መኑ አንጋን እጃር ምኔን ሄአኖበኡ።

25 እሰን ነብሳለከ ፎገል ዋሉርቹ ጉዕመንከ መኒሃ ኣሰኖሃ እኮቤቹሃ መቱርቹሁ ሆፈዕዮሰሀንገ መን አንገተ ሄዕላተኖበኡ።

26 እሰን ኣዱንዖ አሌን ሄአ አደደ ኡመት ጉዕመንከ መቶ መንቹቶ ከለቆ፤ ኡለ አሌን ጉዕማንን ሄአገ አዕዮሰ፤ እጎንከ ሄአ ዘማንለከ ሄአ ቤቹ መደቦሰ።

27 ህካን አዕዮንኩ መኑ መገኑ ሀሶተለከ መረመርት ሀሰ እሱ ደጋጋት፤ እሁን ቤሉ እሰ ኒች ጉዕሚችኔን ቁዕራሻበአ።

28 መሰንትሰ ሄኡ ደእናሚሁለከ ሌንቁቅናሚሁ

ህትን ሄዕናሚንኩ እሲኒት

ሁኩንን ክዕኔ መት-መቱ ሴነፋሩ

ሳኡ ጉዕሙንኩኔ እሰተ እለ ይቶጋት።

29 ቱሱ ነኡ መገን ኦሱተ እነኮሞጎሬ ሐመገኑ መን ሀይማኖት ሰውቲን ዋርቂን ህከረንገ ብሪን ህከረንገ ክኒን መክሴመ ሞሰለ አጉደኖ ይን ሰውዩ ሀሰሰኖኔበአ።

30 ህካን እኮቤቺሃ መኑ ወዕኔ ዘማን ደጉ ሆጊን አቶኢሃ መገኑ አጉሮሰ፤ እኮጎሬ ቱሱ ባደን ጉዕማንን ዮ መኑ ጨቢች ቶበት ፈንቀልታገ አዘዢኡ።

31 መሰንትሰ መገኑ መጠሮ መንች አዲን ጉዕማንከ መን አሌን ጌጣ አዕይ ፈረደኖ በር ወሰቹኡ፤ ህካን ሀንቅ እሁሰ መን ጉዕሚንከ ለሊሾሁ ህከ እሰ መጠሮ መንቹ ሬሆች ኬሲንከሲት» ይእ።

32 እሰ «ሬሆች ኬኡ» ዬኖ ላገተ ሞጮጮቶ ወክት መት-መቱሰ ቀለዶኡ፤ መት-መቱሰ «ከን ጠውተኔሃ ዋሉ ወክት ሞጮጮናም» ይቶኡ።

33 ህከኒች ኤተሮን ጳዉሎስ ኦገቲችሰ ኬዕይ ኦሮዕዮ።

34 ጠዉ እኮጎሬ መት-መቱ መኑ አመዕንት እሲን ሜጡብ እኮኡ፤ እሳንን ሜጡብ «አርዮሰፋጎሰ» ዬኖ ኦገት መኒች መቱ «ዲዮናሰዮሰ» ዬኖ መንቹ፤ «ደማሪሰ» ዬኖ መት መንቹትለከ ዋሉ ልግቡ መኑ ሄዕዮ እቅ።

18

ጳዉሎስ ቆሮንቶስ ከተመ ኦሮዕዮገ

1 ህከኒች ኤተሮን ጳዉሎስ «አቴና» ዬኖ ከተሚች ኬዕይ ቆሮንቶስ ከተመ ኦሮዕዮ።

2 ህከኔን ጳንጦስ ባዲሃ «አቂለ» ዬኖ መቱ አይሁድቹ ደጎ፤ እሰን ቀዋ ወክቲች ብርተ መንቸንከሰ ጵርስቅላን ሜጡብ ጣሊያን ከተሚች አሜቸሃ እቅ፤ መሰንትሰ አይሁዱ ጉዕሙንኩ ከተሚችሰ ፋልቶተ ሮም ባድ ዋሙ ሀለቁ ዋሙ ቀላዉዴዎሰ አዘዢቤቺሃት እቅ፤ ጳዉሎስን እሰንተ ለኦተ ኦሮዕዮ።

3 እሰ ሆጉት እሰገን ዱካነ ጎቡ እኮቤቺሃ እሳንን ሜጡብ ሄእን እሲሁ ዱካነ ጎቡ ጀመሮ።

4 እሰን ሰምበት በር ጉዕመንከ አይሁዲለከ ግሪክ መኒሃ ጮምት ሞኔን ደገመን ተማርሰን አመንሲሰኖሳት እቅ።

5 ህከኒች ኤተሮን ጥማቶሰለክ ሲላሰ መቄዶን ባዲች አሜቶ ወክት ጳውሎስ ኢስ መጠረሞ መሲሁ እሁስ አይሁዲሃ ጉዕመንከ ወክት ጠረኝሽ ኩለኖሳት እቅ።

6 ጠዉ እኮጎሬ አይሁድ መኑ እሱ ግሪሰለክ ቦሮርቶስ ወክት አድኖስ ትበ ግግሽ «ቴሱ ፈረደሞህዕኔ ጎሬ ገይክዕኔ ቤሲን እኮቤቺሃ ኤሳሃ ከን ጠዉሃ ኣግሰኖኤበእ፤ ቴሱ እን አይሁድ እህበ መንቤቹ ኦሮአም» ይእ።

7 ህካን እኮቤቺሃ ጳውሎስ ህከንቤቺች ኬዕይ መገኒሃ ሰገደኖ «ቲቶስ ኢየሰጦስ» ይኖ መንች ምኒ ኦሮዕዮ፤ ምኑስ አይሁድ ጭምት ምኒሃ መድ እቅ።

8 አይሁድ ጭምት ምኒ ዳኙ «ቀረስጶስ» ይኖ መንቹ ምንስ አበሮሲን ሚጡብ መገኑ አመዕኔእ፤ ህትን ልግቡ ቆሮንቶስ ከተም መኑ ጳውሎሴች መገን ላገተ ሞጮጭት አመዕንት ጠመቀንቶኡ።

9 ቀርቹ መት ህንከዕርተ መናማን ጳውሎሴ «ዋጅቶት ሰዕምይት ጠወእ።

10 እን ኪኒት፤ እዪሁ ኬሳሃ ሚዕሮሄተ አታለኖበእ፤ መሰንትስ ከን ከተማን ኤሳሃ ልግቡ መኑ ዮኤ» ይሰ።

11 ህከን ቤቸን ጳውሎስ መገን ላገተ ኡመቲሃ ተማርሰን መቱ ዘማን ደሬን እሰቤቸን ዱንኬእ።

12 ጠዉ እኮጎሬ «ጋልዮስ» ይኖ መንቹ አካይ ባድ ሹመ እኮ ወክት አይሁድ መኑ ሚጡብ እክ ጳውሎሴ አሌን ኬእ አፍ ፍርድ ምኒ መሰቶኡ።

13 ህከን ቤቸን «ኩ መንቹ ሕጉ አዘዘበ ሃሌን መኑ መገኒሃ ሰገደኖገ አኣኖት» ይቶኡ።

14 ጠዉ እኮጎሬ ጳውሎስ ህከን ጠውተኔሃ መሰለ ፈንቀሾተ ቅጥ ይዮህኔን ጋልዮስ አይሁድ «አዕኑ አይሁድ መኑ! ክዕኔ አሌን ኬዕማሽ ጠወ ህከረንገ ሂለ አኤማህዕኔ እቃን ክሰክዕኔ አደቢን ሞጮጫም እቅ።

15 ጠዉ እኮጎሬ ኩ ጠዉ ጠለዕል ላገተኔሃ፤ ሱዕምተኔሃለክ ገይክዕኔ ሕግተኔሃ ኦዳነንታሃ እኮጎሬ ኤሳሃ ኣግሰኖኤበ፤ እን ከን ጠው አሌን ፈረደተ ሀሳምበእ» ይእ።

16 እሰን ህት ይ ፍርድ ምኒች አብል ፋሼስ።

17 ህከኒች ኤተሮን እሰ ጉዕመንኩ ጭምት ምኒ ዳኛ «ሶስቴንሴ» ይኖሃ አፍ ፍርድ ምኒ ኦገት ብሬን ኦልቶስ፤ እኮጎሬ ሁኩ ጠዉ ጋልዮሴሃ መቱርቹሃ አጉጅሰበእ።

ጳውሎስ እንጾክ ከተመ ፈንቀሉስ

18 ጳውሎስ ልግብ ወክት ቆሮንቶስ ከተማን ዲንኬእች ኤተሮን አመዕናኑት «ወገሬቲን ሄእዬ» ይ ሶርይ ባዱ ኦሮዕዮ፤ ህትን ጽርስቅልለከ አቂል እሲን ሜጡብ ሄኦ እቅ፤ እኮጎሬ ሁንዱር ኣጎቤቺሃ ኦሮአኖሀኒች ሄጭ ሙምስ «ክንክሪያ» ዬኖቤቸን ሜጅ።

19 እሲን ኤፌሶን ከተመ ኢልቶ ወክት እሲ ጽርስቅልለከ አቂል ህከኔ አጉር አይሁድ ጭምት ምኒ ኣግ አይሁድ መኒሃ ጠወአኖት እቅ።

20 ጳውሎስ ልግብ ወክት እሲቤቸን ዲንኮተ ኡጭቶስ ወክት ቶጉ ግቦስ።

21 ጠዉ እኮጎሬ «መገኑ ዬጎሬ ዎሉ ወክት ክዕኔቤቹ ፈንቀል አሜታም»* ይ ኤፌሶኒች መርከባን ኣግ ኦሮዕዮ።

22 እሲ «ቁሳርያ» ዬኖ ከተመ ኢል ህከኒች ኤተሮን ዬሩሳሌመ ኦሮዕይ አመዕናኑት ወገሬትሾች ኤተሮን ዘህ አንጾክ ከተመ ኦሮዕዮ።

23 እሲን ቀዉ ወክት አንጾክ ከተማን ዲንኬእች ኤተሮን ህከንቤቺች ኬዕይ «ገለትየለክ ፍርግየ» ዬኖ ባዶን ቤቺች ቤቹ ዘህን አመዕናኑት ጉዕመንከ ጠረኝሰኖሳት እቅ።

እጽሎስ ኤፌሶንለክ ቆሮንቶስ ከተማን ተማርሴገ

24 «እጽሎሴ» ዬኖሁ አሌክሰንደር ከተማን እለሞ አይሁድቹ ኤፌሶን ከተመ አሜቸ፤ እሲን ጡመገ ጠወአኖሃለክ ጠሊሊ መጻፊ አጥራመች ደገኖሃ እቅ።

25 እሲን ቀርች ዎቁተኔሃ ጡመገ ተማርሃለክ ህትን አበ ቡብ ኢሲ ህንቅ ጠወ ጌጥ አዕይ ጠወአኖለክ ተማርሰኖ እቅ፤ እኮጎሬ እሲ ጠለዕል ያህይ ጠመቆ ጥምቀት ደገኖ እቅ።

26 ህትን እሲን መለል አይሁድ ጭምት ምኔን ጠወአኖሃ ጽርስቅልለክ አቂል ሞጮጭቶ ወክት ምንሰ መስት መገን ዎቃሃ ወዕኔች ባሰ ተማርሰቶስ።

27 ህትን እጽሎስ አካይ ባዱ መሮተ ሀሾ ወክት አመዕናኑት ጠረኝሰሰ፤ እሲን አካይ ባዶን ሄኦ አመዕናኑት ቶጎሰተ ደብዳቤተ ከተሰሰ፤ እሲን ህከ ቤቹ ኢሌ ወክት መገን አያኒን አመዕንቶአረ አበ ሀዕለኖሳት እቅ።

28 ህካን እኮቤቺሃ ኢሲ ቡረሞሃ እሁሰ ጉዕማንከ መን ብሬን አይሁድ መኒሃ ጠሊሊ መጻፊች አነበበን ጠረኝ ኦደን ገረኖሳት እቅ።

18:18 ዘኹ. 6:18። * 18:21 መገኑ ዬጎሬ ዎሉ ወክት ክዕኔቤቹ ፈንቀል አሜታም፡- የኖሁ መቱ-መቱ ክታበት አሜተኖ ከበጀት ዬሩሳሌማን ከበጅናም ይታ ላገተ በርግታኡ።

19

ጳውሎስ ኤፌሶን ከተማን ተማርሶገ

1 አጽሎስ ቆሮንቶስ ከተማን ሄዕዮ ወክት ጳውሎስ አል ባዲን ህግ ኤፌሶን ከተመ አሜቶ፤ እሱን ህከን ቤቸን ቀዉ አመዕናኑተ ደግ

2 ጳውሎስ «አመዕንቴንተ ወክት ጠሊሊ አያነ ቶጌነታእቅንዶ?» ዩሰ፤ እሱን «ቶንጎሞበእ፤ ጠሊሊ አያነ ሄኡስ ሆሮ ሞጮጭን ደንጋሞበእ» ይቶኡ።

3 ህትን ጳውሎስ «ህከረ ሀትኔ ጥሞቀቲሃት ጠመቀንቴንታሁ?» ዩሰ፤ እሱን «ያህይ ጥሞቀትኒት ጠመቀሞሚሁ» ይቶኡ።

4 ጳውሎስን «ያህይ ኡመቲሃ ጨብክዕኔ ቶበቴን ፈንቀልቴን ኢቶ ኤተሮን አሜተኖ ኢሳን አመዕንቴን ጠመቀሜ ዩእ» ዩሰ።

5 እሱን ህካን ሞጮጭቶ ወክት ቀርቸሃ ኢሰ ሱዕሚን ጠመቀንቶኡ።

6 ህትን ጳውሎስ አንገሰ እሰ አሉን አዕዮ ወክት ጠሊሊ አያነ እሰ አሉን አሜቻን አደደ አፎን ጠወኡኡ፤ ራገሃ ጠወኡ ጀመርቶኡ።

7 እሰ ጉዕሙንኩስ ቶነ ለሞ መንዩ ጌሰ እቅ።

8 ጳውሎስ አይሁድ ጭምት ሞኒ መር ሰሶ አገን ጌሰ መገን ዋምነትቲሃ ኦደን መለል መኒሃ ተማርሰኖት እቅ።

9 ጠዉ እኮጎሬ መት-መቱ ጢቃመተ እኮቤቺሃ ኢሰ ዋቃሃ ኡመት ብሬን ቦሮርተን አመዕኑ ግቦ ወክት እሰንተ ጌኝ አዕዮ፤ እሱን አመዕናኑተ አደ አዕይ እሰቤቹ መሰ «ጢራኖሴ» ዩኖ መንቹ ተማርሰኖ ቤቸን መኒሃ በሬን በሬን ተማርሰኖት እቅ።

10 እሰይ ባደን ሄኣ አይሁዱለከ ግርክ መኑ ጉዕሙንኩ ቀርቶ ላገተ ሞጮጭት ቶጎተ ኢሊ ጳውሎስ ህከን ቤቸን ለሙ ዘማን ተማርሶእ።

መገኑ ጳውሎሴ አንጋን አዕዮ አጅበተ

11 ህትን መገኑ ጳውሎሴ አንጋን አበ አጅበተ አእኖት እቅ።

12 ህካን እኮቤቺሃ ጳውሎሴ ጅሰመሰ ኡልቶ ኦድኑተለከ ማረበ ኣኤን ጥዘናመ አሉን አኤኖ ወክት ጥዘናቸሰ ፈይታ እቅ፤ ዶሮረኖ ዱሩንኩ ፋለኖት እቅ።

13 መኒቶ ሩሃንየንከ ፋሽተን ዘህታ አይሁዲቶ መት-መቱ ቀርቸሃ ኢሰ ሱዕመ ገእተን «ጳውሎስ ዱዱብሰኖ ቀርቸ ኢሰ ሱዕሚን

ፋልቶኖተ አዘንዛንክዕኔ» ይተን መኒች ሩሃንየ ፋሽቶተ አጸንታኢት እቅ።

14 አይሁድ ሎረ ቂሳች መቲሃሰ አሰቂዋ ዬኖሀኒሃ ህት አታ ለመል ለቤ እለት ሄኦሰ እቅ።

15 ጠዉ እኮጎሬ ዶሮረኖ ዱሩ ፈንቀሽ «ኢሰ ደጋም! ህትን ጳዉሎሴተኔሃ ደጋም፤ ህከረ አዕኑ አዬኤታን?» ዬሰ።

16 ዶሮረኖ ዱሩ አፎሰ መንቹንኩ እሰንተ ኬዕይ አለግሽ ጉዕመንከሰ ቂል ጡላይሽ ኦድኑሰ ፊላን ከልሰ ሞኒች ሁንት ፋልቶኑ።

17 ሁኩ ጠዉ ኤፌሶን ከተማን ሄኦ አይሁድለከ ግርክ መኒሃ ጉዕሚንከ ሞጮጨሞ ወክት አበ ዋጅቶኡ፤ ህከንቤቸንን ቀርቶ ኢሰ ሱዕሙ ሎረ እኮ።

18 አመዕንቶ መኒች ልግቡሰ አሜት ሂላ ሆጎችሰ ቶበታኢት እቅ።

19 ህትን አሰማእ አታሩ አሰማእ መጻፈተ ጭምእት ጉዕማንከ ኡመት ብሬን ቡሰቶኡ፤ መጻፋሰ ህሬማ እቃን ፋሽኖ ጌሰ ገመቲኖ ወክት አበ ጤአተ እኮ ብረቲን መክሴመ ኦንታሁ ኩሜ ጠገር ብር ጌሰ እኮ።

20 ህካን እኮቤቺሃ ቀርቶ ላገት አልባዕልተንለከ ነጽተን መርታኢት እቅ።

ኤፌሶን ከተማን ኬኦ ብተተኔሃ

21 ሁኩን ጉዕሙንኩ እኮች ኤተሮን ጳዉሎሰ ሜቂዶንለከ አካይ ባድ አዲን ህግ ዬሩሳሌም ከተመ መሮተ ጠለለ አያኒን ሰውይኬእ «ህከ ቤቹ ኢሌምሀኒች ኤተሮን ህትን ሮም ከተመ መር ለኡ ሀሰሰኖኤ» ዬእ።

22 ጳዉሎሴ ሀዕልታሀኑኡች ለሙ ጥማቶሴለከ ኤራሰጦሴ ሜቂዶን ባዱ ሶክ እሰ ገዉሰ እሰይ ባዶን ቀዉ ጌሰ ዱንኬእ።

23 ህከ ወክት ኢሰ ዋቂተኔሃ ኤፌሶን ከተማን አቡ ብተት ኬኦኡ።

24 ህከኔ ብረ ሽልሰ መክሰኖ «ድሜጥሮሰ» ዬኖ መቼ መንቹ «አርጤምሴ» * ሞኒሃ ሞሰለ ብሬን አሲሰን መክሳሁኑተ ልግብ ብረ ደእታገ አኦኖት እቅ።

25 ህካን እኮቤቺሃ እሲን ህከ ብረ አታ መነለከ ህትን ሆጉተ አታእረ ጭምእዕይ «ኮ መነ! ነኡ ብረ ደእኖሚሁ ከን ሆጎን እሁሰ ደጌነንተ።

26 ህትን ኩ ጳዉሎሰ መን አንጋን መኬ ሞሰለ ሸርኬተበኡ የን ጠለዕል ኤፌሶን ከተማን እሁዕነ ቀዋ ባድ ቤሉ እሰይ

* 19:24 አርጤምሴ፡- ዩ ኤፌሶን ከተማን ሸርኬተ መገንቹ።

ባደን ጉዕማንን ልግቡ መኑ አመዕነኖገ አኡሰለከ ሉሲሱሰ አዕኑን ገውንኩክዕኔ ለኤንታእሃለከ ሞጮጭቴንታእሃን።

27 ህካን እኮቤቺሃ ጠለዕል ኒ ሆጉት ህንቀንቶኢተ እኩዕነ እስይ ባድ መኑ ጉዕሙንኩ ኣዲንያ አል መኑ ሰገደኖ ሎረ «አርጤምሴ» ዬኖ ሜእ መገን ሞኑ ኦነ እክ ፈቀኖ፤ ህትን እሴ ኬዕምፕሴ ሻረሞንከሰበእንደ?» ዬሰ።

28 እሰን ህካን ሞጮጭቶ ወክት አበ ኡሙዕርት «ኤፌሶን ከተም አርጤምሰ ሎረታን» ይተን ያርቶኡ።

29 ህካን እኮቤቺሃ ኤፌሶን ከተማን ልግቡ ብተት እካን መቄደን ባዲች አሜቶ ጳወሎሴ ጃለተ ጋዮሴለከ አርሰጣርኮሴ አፍ ጎሾሽተን ኡመቱ ጭምየኖ ቤቹ ሚጡበ እክ ደጉደን አሜቶኡ።

30 ጳወሎሴ ህከን ጭምዬ መንቤቹ መርተ ሄዕላቸረ አሳበት ከንቶሰ።

31 እስይ ባድ ገሻኖች ጳወሎሴ ጃለተ እኮአሩ ጳወሎሴቤቹ ሶክ መኑ ጭምዬ ቤቹ መረኖበእገ ኡጭቶኡ።

32 ኡመትሰ በላን አበ ብተት እኮቤቺሃ መቱ መቱርቹንከ ህትን ዋሉንገ ዋሉርቹ የን ያረኖት፤ እኮጎሬ ልግቡሰ ሚሃ ጭምዶቶ ጎሬ ደጎበእ እቅ።

33 መት-መቱ አይሁድ አድሩ «አለክሰንድሬ» ዬኖ መንቹ ኡመት በሊች ህንበልተን መን ብርተ ፋሽቶኡ፤ ኡመት በሊች መት-መቱሰ ጡመገ ኦዶሰተ ሸዞሰ፤ አለክሰንድርን ኡመቱ ጨለ ዮተ አንገሰ ቀቀሽ ኦደኖ ጠወ ጠወኦተ ቅጥዬእ።

34 ጠወ እኮጎሬ እሰክንድር አይሁድቹ አሁሰ እሰ ደጎ ወክት «ኤፌሶን ከተም አርጤምሰ ሎረታን» ይተን ለሙ ሳኣት አሀኖ ጌሰ ጉዕሙንኩሰ ሚጡበ እክ ያርቶኡ።

35 ህትን ኤፌሶን ከተም ዋኑ ከተባንቹ ኡመት ሰዕምየኖገ አዕይ «ኤፌሶን ከተም መነ! ኤፌሶን ከተም መኑ ሎረ አርጤምሴ» ሜእ ሸርኬተ ሰገዴኖ ምኒላከ ሰሜች ድሬኢሃ ጠሊላ ክኑ አገርታአረ አሁሰ ጉዕመ ቤቸንን ደገሞኡ።

36 ህካን እኮቤቺሃ ካን ለገአኖሁ ሄዕባሃ አሁሰ ደጌንታች ሰዕምዶይ ቤሉ መቱርቹሃ ደዕልቲን አቶኖቹ።

37 መሰንትሰ አዕኑ አርጥምሴ ምኒ ኦዳተ ሞግትበረለከ እሴተ ቦርርትበ መነ አፌን ከቤቹ አሜቴንታኡ።

38 ህትን ዴሚጥርሰለከ እሴን ሚጡበ ብረ ሸልሰ መክሰኖ መንቹ ዮ ጎሬ ኦዲን፤ ፈረዴኖ በሩለከ ኦዳገ አታ ዳኛኑት ህከኔ ዮቤቺሃ ኦዲን።

39 እኮጎሬ ዋሉ ሀሴነንተ ጠወ ዮ ጎሬ ሕግ ኦገቱን ለኤኖ።

40 ህዓን እህበሳፊ ነኡ <ከበር እኮ ጠዊ ብተተ ኬሶእረ> ዬን ኦዴኖኔበእገ ዋጅናም፤ መስንትሰ <ኩ ብተት ኬኦኢሁ መርቹሃን> ዬን ጠዕሜመኔ ጎሬ ይናምርቹ ዮበእ» ይቶኡ።

41 እሰ ህዓን ጠወዕዮች ኤተሮን ኦገቾ መኑ ብንየኖገ አዕዮ።

20

ጳውሎስ መቄዶንላክ ግሪክ ባዱ ኦሮዕዮገ

1 ብተተ ኡርቶች ኤተሮን ጳውሎስ አመዕናኑተ ሜጡበ ገእ ሸዥ «ወገሬቲን ሃዕዬ» ይ ሜቄዶን ባዱ ኦሮዕዮ።

2 እሰን ህዓን ባዲን ህገን አመዕናኑተ ልግቤ ሸዘናን ጠረኝሰን ግሪክ ባዱ ኦሮዕዮ።

3 ህከንቤቸንን ጳውሎስ ሰሱ አገነ ዱንኬች ኤተሮን መርከባን ሶርይ ባዱ መሮተ ሰውዬእ፤ እኮጎሬ አይሁድ መኑ እሰ አሌን ተንኩተ አቶተ ሰውይቶገ ደጎ ወክት ሜቄዶን ባዲን ህጎተ ሰውዬእ።

4 እሰን ሜጡበ ሄኦእሩ ቤርይ ከተም ጽርሁሴ ቤቱ ሶጳጥሮሰ፡ ተሰሎንቄ ከተም መኒች አርሰጥሮኮሰለክ ሰኮንዱሰ፡ ደርቤ ከተሚች ጋይዮሰ፡ እሰይ ባድ ቲኪቆሰለክ ጥርፊሞሰ ህትን ጢማቶስ እሳን ሜጡበ ሃዕዮ እቅ።

5 እሰን ብርተ ህግ ጢሮኦድ ከተማን አገርቶኡ።

6 ጠዉ እኮጎሬ ነኡ ጦሮሹ እቴነን ከበጄኖ ከበጀቲች ኤተሮን ፍልጽሰዩሰ ከተመ መርከባን ኣንግ ኦንትቅ በር ጢሮኦድ ከተመ እሰቤቹ ኢልኖም፤ ህከን ቤቸን ለመለ በር ዱንክኖም።

ጳውሎስ መጨረሻን ጥርኦደ ኦሮዕዮገ

7 ሳምንት ወዕኔ በሬን * ጭምይኖምህኔን ጳውሎስ ለንክ በር ገሰመ ዋሉቤቹ መረኖቤቹሃ ህከኔ ሃዕዮ መኒሃ ጠወኡ ጀመሮ፤ እሰ ጠወሰ ጠወኣንን ሀንከዕሬ ሚሪሩ እኮ።

8 ነኡ ጭምይኖም ፋቅ ሞኔን ልግቡ መብራቱ ሃዕዮ እቅ።

9 ኤውጤኪሰ ዬኖ መቱ ዋደልቹ መንቹ መሰኮት አሌን አፋዕልዮ እቅ፤ ጳውሎስ ጠወ ቅራርሴሃን ሁኩ ዋደልቹ አበ ግሾቤቹሃ ሰቅ ፋቂች ዋሮ ዋል ኡቦ፤ መኑ ኬሰኖ ወክት ራዮ እቅ።

10 ጠዉ እኮጎሬ ጳውሎስ ድር ዋደልች አሌን ሙግይ አንጋንከሰ ህንቀፍ «ህልቆኖቹ ፎሊን ዮኡ» ዩሰ።

11 ጳውሎስ ፋቅ አል ፈንቀል ፋል እሳንን እቸተ ሜጡበ እች ኡለት ሶዞተ ኢለ ኩሎች ኤተሮን ኦሮዕዮ።

* 20:7 እቸተ ሜጡበ እንቶተ፡- የኖሁ ግሪክ መጻፋን ጦሮሹ ቢጡ የኖ፤ ፍሳርሰ ቀርች ሁርባት ዩ እሆተ አታለኖ።

12 ህትን እስ ፈዬ ዋደልቼ ምኒ አእት መርት አበ ሙንደእ መት-
መቱስ ጠረኝሶኡ።

ጳውሎስ ጢርኣዲቶ ሚሊጢተ ኦርዕዮገ

13 ጳውሎስ ቶንግ ህርሲንሶተ ሄጭን መርከባን ኣንግ አሶስ
መርኖም፤ መሰንትስ እስ ህከ ከተመ ሎከ መርተ ሀሽ ነኡ ህት
አዕኖተ አዘዦኔቤቺሃት።

14 ህትን ነኡ እሲን አሶስ ከተማን ደቀም እሱ ቶንግ መርከባን
ኣግንስ ሚጢሊኒ ከተመ መርኖም።

15 ነኡ ለንክ በር መርከባን ኣንግ ዊን ረበንቶ «ኪዮሴ» ዬኖቤቹ
ኢልኖም፤ ህትን ለንክ በር «ሳሞስ» መድን ህንግ ሰቅ በር ሚሊጢ
ከተመ ኢልኖም።

16 ጳውሎስ እስይ ባዶን ልግብ ወክት ዱንኩዕን ኤፌሶን ከተመ
አጉር ህጎተ ሀሾ፤ መሰንትስ አታልሲሾሰጎሬ ጳንጠቆስጤ ከበጀት
ዬሩሳሌም ከተማን ከበጀተ ሀሾቤቺሃት እቅ።

ኤፌሶን ከተም አመዕናኖ ባልቃተ ጳውሎስ ጠወዕዮ መጨረሽ
ጠውተኔሃ

17 ጳውሎስ ሚሊጢን ከተሚቶ መነ ሶክ ኤፌሶን አመዕናኖ
ባልቃተ ገእሲሾ።

18 እስን እስበ አሜቶ ወክት «አን እስይ ባዱ መር አፋዕሌም
በሬቶ ጀመር ጉዕመ ወክትንከ በላንከክዕኔ ህት እክ ሄዕዮምጎሬ
አዕኑ ገወክዕኔ ደጌነንተ።

19 ህትን አይሁድ ሂለ ሰውት መሳን ኦርጨቀሞምጎሬ ጉዕመንከ
አታለን ገውእ ሙግ አዕይ እንጅጂእን ቀርቼ ካደማም እቅ።

20 ኦገትቤቾን እኮ ምኒቶ ምኒ ሃመን ተማርሳም ወክት
ደግለለኖህዕኔሃ ጉዕመንከ ኩሎንክዕኔ ቤሉ መቱርቺሃ ኩሎዕን
ፌሾምበእ።

21 አይሁድ መኩለከ ግርክ መኑ ጨብቻሰ ቶበት መገን አደ
ፈንቀልት ቀርቾ ኢሳን አመዕንቶተ ኩሎንሰ።

22 ጠሊሊ አያኒን አዘዘም ዬሩሳሌም ከተመ መራሚት፤ ህከን
ቤቾን መ እሀም ጎሬ ደጎምበእ።

23 ጠወ እኮጎሬ ኡሱረሙለከ ኦርሸት እልታኤገ ከተማን
ጉዕማንን ጠሊሉ አያኑ ኩሎኤ እቅ።

24 እኮጎሬ አን ቀርቾ ኢሲቶ ቶጎም ሆጉተ ሹሎተ ኢሊ ገይኤ
ፎሊሃ አሙዛምበእ፤ እስን መገን ኣሰቱተ ተሸት ላገተ ኩሎሃን።

25 «ህትን ከበሬ ኢሎተ ኢላ ክዕኔ ጉዕምክዕኔ በላን ፈንቀላመን መገን ዋምነትተኔሃ ተማርሳንክዕኔ፤ ከኒች ኤተሮን ክዕኔ በሊች አዲሁ ለአኖኤበእገ ደጋም።

26 ህካን እኮቤቺሃ ክዕኔ በሊች መቼ መንቹ በዕዮ እቃ ሩበት እህንክዕኔበእገ ኩላንክዕኔ።

27 መስንትሰ መገን ሰዉት ጉዕመንከ ኩሎንክዕኔ ቤሉ ኩሉዕነ ፌሾምርቹ መቱርቹሁ ዮበአ።

28 መገኑ ገይሰ ቤት ቁጊን ዋዦህዕኔ አመዕናኖ ጭምት አገርቶኖተ ጠሊላ አያኒን ክዕኔተ ዜማንቹ አዕይ መጠርህዕኔ መገን ሆላ ዜሜሃለከ ገይሃክዕኔ አገዕርዬ።

29 እን ኦርዕዮሚች ኤተሮን መገን ሆላ ዜሜሃ አሙዝቡ ሆሊገ ጎደበ ጠረኛኑት ሂሉ መኑ አሜት ክዕኔ በላ ኣጋገ ደጋም።

30 ህትን መት-መቼ መኑ ክዕኔ ገይክዕኔ በሊች ኬእ ሉሲሰኖ ትምርት ተማርሰተን ልግብ አመዕናኑት እሰ አደ ፈንቀሽታአ።

31 ህካን እኮቤቺሃ እን ጉዕማንከ መኒሃ ሀንከዕርተለከ በራሃ እንጅጃተ ዱነን ሰሱ ዘማን ሸዦንክዕኔገ ቃጌነን አገዕርዬ።

32 «ህትን ቲሁ መገኒሃለከ ጉዕመንከ ጠሊላኖ በላን ጠረኛሰኖህዕኔ መገን ርሰተ ኣሶተ አታላኖ ኣሰቶ ላጋተ ኤገተ ኣሰዮንክዕኔ።

33 እን አዬ ብረ ህከረንገ ዋርቀ ህከረንገ ኦድኑተ ሄዕላቾምበአ።

34 ኤሳሃለከ እን ሜጡበ ዮሀኑኡተ ሀሰሰኖርቹ አንጋንከኤ አእን ደግለሎምገ አዕኔ ገዉንኩክዕኔ ደጌነንተ።

35 «አኦኖሀኒች በትሽ ኣሰኖሁ ማሰአሞአሃን» ዬ ገይሰ ቀርቾ ኢሰ ላገተ ቃጊን አንጋንከኔ አዕነን ሆኅሀኑኡተ ደግለሉ ሀሰሰኖ እሁሰ ልግብያ ዋቄን ለሊሾንክዕኔ» ዬሰ።

36 ጳዉሎስ ህካን ጠወዕዮች ኤተሮን ጉዕሚንከሰ ጉሉጵ ዱአ አዕዮ።

37 እሰ ጉዕሙንኩሰ ኦአን ጳዉሎሴ ሀንቀፍ ሱንቅቶኡ።

38 በትሰ አበ ሻዞ መስት «ከኒች ኤተሮን ለንኪሃ አልኤ ለኦኖተ ሆሮን አታልቲነንተበአ» ዬሰቤቺሃት እቅ፤ እሰን መርከቡ ዮ ቤቹ ኢሎተ ኢላ ሀርሲሶሰ።

21

ጳዉሎስ ዬሩሳሌመ ኦርዕዮገ

1 አሳች መለዕለሞሚች ኤተሮን መርከባን ኣንግ ጌጥይን «ቆሰ» ዬኖ ባዱ መርኖም፤ ህትን ለንክሰ በር ዊን ረበንቶ «ሩደ» ኢልኖም፤ ህከንቤቺች ኬዕን «ጳጥራ» ዬኖ ከተመ መርኖም።

2 ህከን ቤቸን ፍንቄ ባዱ ኦሮአኖ መርከበ ደእን እሲን ኣነግ መርኖም።

3 ዊን ረበንቶ «ቆጵሮስ» ዬኖ ኡለተ ለእን ጉረ ኣዲን ኣጉርን ሶርይ ባዱ መርን «ጥሮስ» ዬኖ ከተመ ኢልኖም፤ ሁኩ ቤቹ መርከቢቶ ኣደተ ድሪሴኖሃ ቤቹ እቅ።

4 ህከን ቤቸን ኣመዕናኡተ ህንሰ ደንጎም ወክት እስቤቸን ለመለ በር ዱንክኖም፤ እሳንከ ጠሊሉ ኣያኑ ለሊሻንሰ «ጳዉሎሴ! ዬሩሳሌም ከተመ መርቶት» ይት ኩልቶስ።

5 እኮጎሬ ነኡ ህከን ቤቸን ኣገርኖም ወክቱ ጎፋን ሃሞተ ኬዕኖም፤ እስ ጉዕሙንኩስ ሜንቲንከሰለክ እሳንተሰ ሜጡበ ከተሚቶ ኣብል ኢሎተ ኢሊ ህርሲሶኔ፤ ባር መደን ጉሉጽን ዱኣ ኣዕኖሚቶ ኤተርን «ወገሬት ሄዕዬ» ይን ኣደ እንኮም።

6 ህከኒቶ ኤተርን ነኡ መርከባን ኣንጎም፤ ህትን እስን ሞንሰ ፈንቀልት መርቶኡ።

7 ነኡ ጢርሲቶ ኬዕን «ጴጤሌማይስ» ዬኖ ከተመ ኢልኖም፤ ህከን ቤቸን ኣመዕናኖን ደቀም ወገሬትጨቀሞሚቶ ኤተርን እሳን መቱ በር ኣገርኖም።

8 ለንክስ በር እሳቶ መለዕለሞሚቶ ኤተርን ቄሳር ከተመ ኢልኖም፤ ህከኔን መጠረንቶ ለመላ ዳቆናቶ «ፍልጶሴ» ዬኖ መንቶ ሞኒ ኣነግ እሲን ሜጡበ ኣፋዕልኖም፤ ፍልጶስን መገን ላገተ ተማርሰኖ እቅ።

9 እሲንከ ራገ ጠወኣ ሾልት ሀፍታኑት ሂኦስ እቅ።

10 ህከን ቤቸን ልግብ በር ኣፋዕልኖሚቶ ኤተርን «ኣጋቦሴ» ዬኖ ነብዬቹ ይሁድ ባዲቶ ኣሜቶ።

11 ሁኩ ነብዬቹ ኒቤቹ ኣሜቶ ጳዉሎሴ ኢቱተ ኣእ ገይሰ ሎከተለክ ገይሰ ኣንገተ ኡሱር «ጠሊሉ ኣያኑ <ከን ኢቶ መንቹ ዬሩሳሌማን ዮ ኣይሁዱ ህት ኡሱርት ኣይሁደ እህበ መን ኣንጋን ህግስ ኣታኦ» ዮኖት» ዬእ።

12 ህከ ጠወ ሞጮጭኖም ወክት ነኡለክ ህከኔ ሂኣ መኑሁ ጳዉሎሴ «ዬሩሳሌመ መርቶት» ይን ኡጭኖም።

13 እኮጎሬ ጳዉሎስ «ህት ኦኤነን ኢ ቀልብ ሚ ዶርቴነንታት? ኣን ቀርቾ ኢስተኔሃ ዬሩሳሌማን ኡሱረሙ እሁዕነ ሬሆታ ቅጥ ይዮም» ይ ፈንቀሼእ።

14 ጳዉሎስ ሸዘነኔ ቶጉ ግቦ ወክት «ቀርቹ ዬኢሁ እሁን» ይን ኣኩርኖም።

15 ህከኒቶ ኤተርን ነኡ ኦዳኔ ቅጥ ኣዕን ዬሩሳሌመ መርኖም።

16 ህትን ቄሳር ከተማን ዮ አመዕናኑት መት-መቱ ኒን ሜጡብ እክ አሜቶኡ፤ እሰን ሞናሶኔ ሞኔን ፎሎጭኖተ እሰ ሞኒ መሰቶኔ፤ ሁኩ መንቹ ዊ በላን ዮ «ቆጵሮስ» ዬኖ ባዶን ዲንክዮእሃ አመዕናንቹ እቅ።

ጳውሎስ ያቁበ ለኦተ ዬሩሳሌመ ኦርዕዮገ

17 ነኡ ዬሩሳሌመ ኢልኖም ወክት አመዕናኑት ሙንዲኖን ቶጎኔ።

18 ለንክሰ በር ጳውሎስ ኒን ሜጡብ እክ ያቁብቤቹ መርኖም ወክት ጉዕመንኩ ጭምት ሞኒ ባልቁ ህከኔ ሄኦ እቅ።

19 ጳውሎስ እሰንተ ወገሬትሾች ኤተሮን መገኑ አይሁደ እህበ መን በላን እሰ ክድማን አዕዮሃ መት-መቱን ኩሎስ።

20 እሰን ህካን ሞጮጭት መገኑ ገለትጭት «ኒ አመቤቶ ጳውሎስ! አመዕንቶ ልገቡ ኩሜ መኑ አይሁድ በላን ሄኡሰለክ ጉዕመንኩስ ሕገሃ አዘዘንታኢሃ እሁሰ አትን ደጋንት።

21 እሰን አት አይሁደ እህበ መን በላን ሄኦ አይሁዲ ጉዕሚንክ እለሰ ጡርከንትበገለክ ሴረ አገርትበገ ተማርሰተን ሙሰ ሕገ ሻርታገ አታንቲት» ዬኖ ጠወ ሞጮጭቶኡ።

22 ህከረ መ አዕኑ? እሰ አት አሜቱክ ህንቅንክ ሞጮጭታኦ።

23 ህካን እኮቤቹሃ ነኡ ይናሚሃ አእ፤ ኒ በላን ሁንዲር ኣጎ ሾሉ መኑ ዮኡ።

24 ከ መን ኣኣት መርት አሳንን መገን ብሬን ገወክ ነጠ አእ፤ እሰን ነጠ እኮተ ብረ አት ባትሰ፤ ህከኒች ኤተሮን ሙምሰ ሜዳኣ፤ ህካን አቶንትጎሬ ኪትኔሃ ጠወአም ጠወ ክዘብ እሁሰለክ አት ገወክ ሕገ አገርተን ሄኣንትገ ጉዕመንኩስ ደጋኦ።

25 እኮጎሬ አይሁደ እህበ መን አዲች አመዕንቶእሩ ክትም ክትንታን ንጃሾ እቸተ እታንትበእገ፣ ቄጉ አጋንትበእገ፣ ለንገእ ሬዮ ለል ማላ እትበገለክ ዝነተ አትበገ አገዕርቶተ ኢተቀምም ጠወሃ ደብዳቤን ከተንቦክዕኔ» ይቶሰ።

26 ህከኒች ኤተሮን ጳውሎስ ለንክ በር ህከ መን ኣእ አሳንን ሜጡብ ነጠ እኮ፤ እሰን ሁኩ መኑ ሄንኩ በሩ ኢሎተ ኢለ ነጠ እክ አገርታጎሬ ህትን ገገወሰ ኣታ ሰደቀተ መ ወክት ኣታጎሬ ኤንኬዕንሶተ ዲእ ሞኒ ኣጎ።

ጳውሎስ መገን ሞኔን አፌመገ

27 ለመሉ በሩ ጎፎተ እካን እሰይ ባዲች አሜቶእሩ አይሁዲ ጳውሎስ መገን ሞኔን ለእ ኡመት ጉዕመንክ አድመተ አት አፎስ።

28 እሰን «እሰራኤል መነ! ሀዕልዬኔ! ከለዕዬ ኩ መንቹ ኡመትኔ፣ ሕገኔለክ ዲእ ሞኒ ጥቅሽ ጉዕመንክ ቤቹ መረን ኡመት

ተማርሰኖሃን፤ ሁኩንን ሆፈዕያንሰ ግሪክ ባድ መነ ዱእ ምኒ አግሽ ፈየ እኩቤቹ ንጆሰሾአሃን» ይት ያርቶኡ።

29 እሰን ህካን ይቶኢሁ ሃጭት ጳውሎሴ ኤፌሶን ከተሞ ጥርፊሞሴንን ሜጡብ እክ ዩሩሳሌም ከተማን ዮኢሃ ለኦሰቤቹሃ እሱ ዱእ ምኒ አፍ አጎሃ አጉጆሰቤቹሃት እቅ።

30 ከተሙሰ ጉዕሙንኩ ሌንቁቄእ፤ ህትን መኑ ጉዕሙንኩ ሜጡብ እክ ደጉደን አሜት ጳውሎሴ አእት ጎሾሽተን ዱእ ምኒቶ አብል ፋሽቶሰ፤ ህከ ወክትንከ ዱእ ምኒ ኡሩት ጡፈንቶኡ።

31 ህትን እሰ ጳውሎሴ ሽቶተ ሀሶ ወክት ሮም ባድ በገዝ ሀለቂሃ «ዩሩሳሌም ከተሙ ጉዕሙንኩ ጨነቀንቶኡ» ዬኖ ዱዱቡ ሞጮጨሞ።

32 እሰን ህከ ወክት ወታደረለከ ጥቤ ሀለቀ አእ ደጉደን መንቤቹ ኢሌእ፤ ሁኩ ጳውሎሴ ኦልታእሩ በገዝ ሀለቀለከ ወታደረ ለኦ ወክት ዋቀሩ አጉርቶኡ።

33 ህከ ወክትንከ ሀለቁ ኢል ኬዕይ ጳውሎሴ አፍሲሽ ለሞ ሰንሰለቲን ኡሱሬኖገ አዘኹ «ኩ መንቹ አዬት? ህትን መርቹሃን አዕዮሁ» ይ ጠዕሜእ።

34 መኒቶ ደሩሰ መቼርቹ ደሩሰ ህትን ዋሉርቹ ይተን ጨንጭቶቤቹሃ በገዝ ሀለቁ ሀንቅ እኮ ጠወ ደጎተ አታሉ ሆጎ ወክት ጳውሎሴ ዋታደር ቀእተ መሰታገ አዘኹ።

35 ህከቤቹንከ መሴንን ጳውሎሴ አል ፋሌኖ ቤቹ ኢሌ ወክት ኡመቱ አበ ኡሙዕር እሰ አሌን አደገ ኢልሶተ ሀሶገ ደግ ዋታደሩ እሱ እጅት መሰቶሰ።

36 ሁኩ ልግቡ ኡመቱ «ሽዬ» ይተን ጨንጭተን ዘክሳሲት እቅ።

ጳውሎሴ ኡመት ብሬን ገይሰተኔሃ ጠወዕዮገ

37 ጳውሎሴ ዋታደሩ ገልታቤቹ አግሶተ ሆንጠኮ ወክት ጳውሎሴ በገዝ ሀለቀ «እን መቼርቹ ኩሎሂተ ፈቀደዕኔንዶ?» ዬእ፤ ሁኩ በገዝ ሀለቀ «ግሪክ ባድ አፍሃ ደገንንዶ?»

38 ግደኖ በሬን ብተተ ኬሰለከ ሾሎ ኩሜ ሽብር ኬሶረ አእት ኡሌ ኡድመ ሁንቶንቲ ግብጽ ባድ መንቹ አቲበእንዶ?» ዬሰ።

39 ጳውሎሴ በገዝ ሀለቀ « ከሊቅዮ ዬኖ ባዶን ኤንኬዕንቶ ጠርሴሰ ከተማን አለሞምዮ አይሁድቹ፤ ሀዕይ ኡመቲሃ ጠወኦተ ወክት አሴኤ» ይ ኡጮሰ።

40 ህትን እስ ጠወኑት ወክት ኣሰያንሰ ጳዉሎስ ጎትዬ ቤቾን ኡር መኑ ሰዕምዮተ ኣነጋንተስ ቀቀሽ መኑ ጨለ ዬ ወክት እብራዌ መን ኣፎን መኒሃ ጠወኑ ጀመር።

22

1 ጳዉሎስ «እመኤ ኦሱትለከ እናከኤ ኣን ኣሳንክዕኔ መሰለ ሞጮጮዬ» ይእ።

2 እስን እስ እብራዌ መን ኣፎን ጠወኣን ሞጮጮቶ ወክት ወዕኔቶን በትሰ ጨለ ይቶኡ፤

3 እስን «ኣን ኪልቅይ ባዶን ዮ ተርሴስ ከተማን እለሞምሃ ኣይሁድቹ፤ ተማርሚሁ ከን ዬሩሳሌም ከተማኒት፤ ተማርሴኤሁ ገማልያሌት፤ እሲቶ ኣናከኔ ሕገ ጠረኝሽ ተማርሚሁለከ ከበር እዕኑ ጉዕሙንኩ ደገነንተገን መገኒሃ ቡብ ገወእ ኣስ ካደማሚሃ መንቹ እቅ።

4 ኢስ ዎቃሃ ኣዎንታ መን ጉዕሙንከ ሬታኢሃ ኢለ ሸረን ጎነለከ ሚንቱ ኣፈን ኡሱር ምኒ ኣግሾምሃ እቅ።

5 ኩን ሀንቅ እሁስ ቂስ ኣዎንሳኑትለከ ኣይሁድ ኦገት ባልቀት ጉዕሙንኩ ኤሳሃ ምስክረተ፤ ደማስቆ ከተማን ዮ ህከ መን ኡሱር ዬሩሳሌመ ኤቦተለከ ቀጠእሲሶተ እታልሲሰኤ ደማስቆን ዮ ኣይሁዲሃ ከተሶ ደብዳቤተ ቶጎሚሁ እሳቶት።

6 «ኣንን ደማስቆ ከተመ መረን ኢሎተ ሆንጠኮምሀኔን መቱ በር ሌሆ ሰኣት ጌሳን ድንገቴን ሰሜቶ ሎሩ ኑሩ ኣዳንከኤ በለቆ።

7 ህትን ኡለ ኡብ ኤሳሃ ሳኦሌ! ሳኦሌ! ሚሃት ሸርታንቴኤት? ይታ ላገት ሞጮጮም።

8 ኣንን ፈንቀሽ <ቀርቾ ኣት ኣዩት?> ዬም፤ እስን <ኣት ሸርታንቴኤ ናዝሬት ኢሳት?> ዬኤ።

9 ኣን ሜጡብ ሄኦእሩ ኑርስ ለኦ ቤሉ ኣይ ጠወኣኖኤት ጎሬ ላገስ ሞጮጮቶበኣ።

10 ኣንን <ቀርቾ! መ ኣኡ?> ዬም፤ ቀርቹንኩ <ኬእ ደማስቆ ከተመ መር፤ ኣታንቲሁ ጉዕሙንኩ ህከን ቤቾን ኩለመኖሄ> ዬኤ።

11 ህከን ኑር በለቅ መሳን ለኦተ ኣታሉ ሆጎምቤቹሃ ኣን ሜጡብ ሄኦ መኑ ኣንገኤ ኣፍ መሰግ ደማስቆ ከተመ ኢልሶኤ።

12 «ህከን ከተማን <ሀናንዩ> ዬኖ መቱ መንቹ ሄዕዮ እቅ፤ ህከ መንቹንከ ደማስቆ ከተማን ሄኦ ኣይሁዲ ጉዕሙንኩ ገለትጭታሲሁ ሕገ ጡመገ ኣገረኖለከ እያኑ ዮሰዩ መንቹ እቅ።

13 እሰን ኢቤቹ አሜች መደንከኤ ኡር አመኤ ቤቶ ሳኦሌ! ቲሱ ለእኔ ዩእኔ እንን ሀከ ወክትንከ ለኦተ አታሎም።

14 እሰን <አናከኔ መገን ሰዉት አት ደጎተ፥ ፈየ ለኦተለከ ላገሰ ሞጮጭቶት ሄጭ መጠሮሄ።

15 እሰን ለአንተለከ ሞጮጭቶንት ጠወ ጉዕመንከ መን ብሬን እሰተኔሃ ሞሰክር እኮታት።

16 ህከረ መ አገርታንቲት? ቲሱ ኬእ ሱዕመሰ ገእት ጠመቀም፤ ጨብችክ ነጠ እህ፤ ይ ኩሎኤ።

17 «ሀከኒች ኤተሮን ሀከ ዩሩሳሌመ ፈንቀል አሜቸሚች ኤተሮን መገን ሞኔን ዱእ አእን መናመተ ለዕዮም።

18 ቀርቹንኩ ኤሳሃ ለልኤ <አት ኢተኔሃ ጠወአንት ጠወሃ እሰ ቶጋበእቤቺሃ ዩሩሳሌሚች ደዕልት ፋል» ዩኤ።

19 አንን ቀርቹ! <ጭምት ሞኒ ጉዕመንከ መረን ኪን አመዕኔ መን ኦላምገለከ ኡሱራምገ እሰ ገዉንኩሰ ደጋኤ።

20 ኬሳሃ ሞሰክር እክ ሄዕዮ እሰጥፋኖሴ ቁጉሰ ዱንቶ ወክት እን ጠዋንከሰ ኢተቀም ሸታ መን መደን ኡር ኦድኑሰ አገራም እቅ ዩኤ።

21 ቀርቹንኩ <ቂዕራሽ ዮ አይሁደ እህበ መንቤቹ ሶሃንኬቤቺሃ ከንቤቺች ኬእ ኦርእ» ይ ኩሎኤ።

ጳዉሎስ ሮም ባድ መንቹ እሁሰ ኩሎገ

22 እሰ ከ ጠወ ኩሎተ ኢለ ሞጮጭታሲት እቅ፤ እሰ ላገሰ ጎት አት «ህትናሙ መንቹ ፎሊን ሄኡ ሀሰሰኖሰበእቤቺሃ ዱንዮ አሊች ከም» ይት ያርቶኡ።

23 ህትን እሰን ያርተን ኦድኑሰ ኡጅተን ትበ ሰማ ዋሽት ብን አታኢት እቅ።

24 በገዝ ሀለቁንኩ ጳዉሎሴ ወታደሩ ገልታቤቹ መሰታገ አዘዣ፤ ህትን እሰ አሌን መኑ ሚሃ ጨንጨኖጎር ደጎተ «ኦልቲንን መረመሬ» ዩሰ።

25 ጠዉ እኮጎሬ እሰ ጠፍሪን ጠረኝሰ ኡሱርቶ ወክት ጳዉሎሰ መደንከሰ ዮ ጥቤ ሀለቅቹ «ሮም መንቹ ፍርዱ ዮበኢሃ ኦልቶኖተ ፈቀደሞህዕኔንደ?» ዩሰ።

26 ህከ ወክትንከ ጥቤ ሀለቁ ሞጮጭ በገዝ ሀለቅቤቹ መር «መ አቶታት? ኩ መንቹ ሮማውቹሃ» ዩኤ።

27 ሁኩ በገዝ ሀለቁንኩ ጳዉሎሴቤቹ መር «ህንዴ ኩሌኤ! አት ሮማውቹሃ መንቹንደ?» ይ ጠዕሜሰ፤ እሰን «ኤ! አን ሮማውቹሃ መንቹ» ዩኤ።

28 በገዝ ሀላቁንኩ ፈንቀሽ «አን ከ ርማውቹ እሆተ ህዕሬሚሁ አበብሪንት» ይሰ ወክት ጳውሎስ ህትን «አን እለሞሚሁ ርማውቹ እክት» ይሰ።

29 ህካን እኮቤቺሃ ጳውሎሴ መረመርቶተ ቅጥይቶሩ ህከ ወክትንከ እሲች አደ እኮኡ፤ በገዝ ሀላቁንኩ ጳውሎስ ርም ባድ መንቹ እሁሰ ደጎ ወክት ኡሱርሲሾሰቤቺሃ ዋጄእ።

ጳውሎስ አይሁድ ኦገት ብርተ ሆንጠኮገ

30 ለንክ በር ገሰመ በገዝ ሀላቁንኩ አይሁዱ ጳውሎሴ ከሰሶ መሰት መርቹሃጎሬ ጠውሰ ህንቅ ደጎተ ሀሾቤቺሃ ቂሰ እዋንሳኑትለክ ኦገት መነ ጉዕመንከ ጭምይታገ አዘዡ፤ እስን ጳውሎሴች ሰንሰለተ ሂር ኡሱር ምኒች ኤቤኖገ አዕይ ብሬንከሰ ኡርሾ።

23

1 ህከኒች ኤተሮን ጳውሎስ አይሁድ ኦገት ባልቀተ ቱክ ይ ለዕይ «አመኤ ኦሶ! ከበሬ ኢሎተ ኢለ ጡመ ቀልቢን ጉዕሚንን መገን ብሬን ሄዕዮምሃን» ይእ።

2 ህትን ሎሩ ቂሰቹ «ሀናንዩ» ይኖሁ ጳውሎሴ መደን ኡርቶእረ ጳውሎሴ አፎሰ ዋቀርታገ አዘዡ።

3 ህከ ወክትንከ ጳውሎስ ሀናንዩ «እት ለኤኖሄረ ጡመ አጉዳንቲሁ ቀልቡክ ሂሉ! ኬሳሃ መገኑ ዋቀረኖሄ፤ ሕጊን ፈረዶተ አፋዕልት ሕጉ ዮበኢሃ ዋቀረኖኤተ አዘዘንዶ?» ይሰ።

4 ህከኔ መደንከሰ ኡርቶእሩ ጳውሎሴ «መገን ሎረ ቂሰቹ ቦርርተንንዶ?» ይቶሰ።

5 ህትን ጳውሎስ ፈንቀሽ «አመኤ ኦሶ! ሎረ ቂሰቹ እሁሰ ደጎምበእ እቅ፤ መሰንትሰ ሕመትክ ገሸኖህን አሌን ሂለ ላገተ ጠወኦት» ይመም ከተበሞኡ» ይሰ።

6 ጠወ እኮጎሬ ጳውሎስ ህከን መኒች መት-መቱሰ ሰዱቃውተ ህትን ዋሉሰ ፈርሳውተ እሁሰ ደግ «አመኤ ኦሶ! አን ፈርሳውቹሃን፤ አኑኤ ፈርሳውቹሃን፤ ቱሱ ፍርድቤቹ ሆንጠኮሚሁ ሬቶእሩ ሬሆች ኬኣገ ተብሳሃ አዕዮምቤቺሃት» ይ ላገሰ ጎት አዕይ ኦገት ባልቀተ ጠወዕዮ።

7 ጳውሎስ ህካን ጠወዕዮ ወክት ፈርሳዌለክ ሰዱቃዊ በላን ብተት ኬኣን ኦገቱሰ ለሙ ቤቹ እኮ።

8 ሰዱቃውት «ሬዮ መኑ ሬሆች ኬአኖበአ፤ መላይከንት ዮበአ፤ አያኑንኩ ዮበአ» ይታእረ፤ ህትን ፈርሳውት «ሁኩን ጉዕመንኩ ዮኡ» ይት አመዕንታእረ።

9 ህከ ወክት አበ ጨነጨነተ እኮ፤ ፈርሳዌ አዲች መገን ሕግ አስተማራች ኬእ «ነኡ ከን መንቸን ሂላ ጠወ መቼርቹሃ ደንሳምበአ፤ አያኑ ህከረንገ መላይከት ጠወኦሲሃ እሆኖ?» ይት ኦዶኡ።

10 ብተት ባተአን መርቶ ወክት መኑ ጳዉሎሴ ሀንፈጣሰበእገ በገዝ ሀለቁ ዋጅ ወታደረ «መርቱን ጳዉሎሴ መን በሊች ዋልቅሴን ዋታደሩ ገለናቤቹ ኤቤ» ይ አዘዡ።

11 ለንክሰ በር ሀንከዕርተ ቀርቹ ጳዉሎሴ መደን ኡር «ዬሩሳሌም ከተማን ኢተኔሃ መስከርቶንትገን ሮም ከተማኒ መስከሩ ሀስሰናቤቹሃ ዋጅቶት» ይሰ።

ጳዉሎሴ ሺቶተ አማዕለሙሰ

12 ለንክ በሬ ገሰመ አይሁዱ ጭምይት አማዕለንትኬእ «ጳዉሎሴ ሸኖተ ኢላ እቸተ እንቱንከ፤ ዋሃ አንጉንከ» ይት ጤሌዕልቶኡ።

13 ህከን አድማን አማዕለንቶአሩ ሸይልቸ በተአኖሃ መነ እቅ።

14 ህትን እሰ ቂሰ አዋንሳኖበለከ ባልቀቤቹ መርትኬእ «ጳዉሎሴ ሸኑዕናን መቼርቹሃ እንታምበኡ» ይን ጤሌዕልኖም።

15 ህከኒሃ ቴሱ አዕኑ ኦገት ባልቃን ሜጡበ አማዕለንቱን መረመርናም ጠወ ዮኡ ይቱን ጳዉሎሴ ኦል ሀለቁ ክዕኔቤቹ ኤቦተ ጠዕምዬ፤ እኮጎሬ ነኡ ክዕኔቤቹ ኢሉዕነ ሄጭን ሸኖተ ቅጥይኖም» ይት ኩልቶሰ።

16 ጠወ እኮጎሬ ጳዉሎሴ አመቤቶ ቤቱ ህከ አማዕለንቶ ጠወ ሞጮጮ ወክት ዋታደሩ ገልታቤቹ መርኬዕይ ጳዉሎሴሃ ኩሎሰ።

17 ህትን ጳዉሎሰ ጥቤ ሀለቁ መቼ ገእ «ኩ ጩሉ በገዝ ሀለቂሃ ጠወአኖ ጠወ ዮሰቤቹሃ እሰቤቹ መሰ» ይሰ።

18 ጥቤ ሀለቅቹንኩ ጩልሰ በገዝ ሀለቅቤቹ አፍ መር «ኩ ጩሉ ኩለኖ ጠወ ዮሰቤቹሃ ኡሱር ምኔን ዮ ጳዉሎሴ ኤሳሃ ገእ ከ ጩል ኪቤቹ ኤቦተ ኡጭዮኡ» ይእ።

19 በገዝ ሀለቁንኩ ጩል አንገተ አፍ መድ ዋል «ኩልታንቴኤ ጠወ መርቹሃን?» ይ ገበለ ዋሽ ጠዕሜሰ።

20 ሁኩ ጨሉንኩ «አይሁድ አዋንሳኑት ጳውሎሴ ዋዕኔችን ባሳ ጠረኝስ መረመርቶት ጋቴት ኦገትቤቹ ሆንጠህሶተ ኬሳሃ ጠዕምቶት ኢተቀንቶኡ።

21 ጠወ እኮጎሬ አት እሳሃ ኤኩ ይቶት፤ መሰንትስ እስ ጳውሎሴ ሽቶት ኢላ እቸተ እታበእገለከ ዋሃ አጋበእገ ጤሌዕልት ሸይልች በተአ መኑ ማጠንት አገርታኢት፤ ቴሱ እስ አገርታኢሁ ጠለዕል ኪ መሰለህት» ዩእ።

22 በገዝ ሀለቁንኩ ህከ ጨል «ከ ጠወ ኤሳሃ ኩሉክ አይሃ ጠወኦት» ይ ጨል ህርሲሾ።

«ፊልክሴ» ዩኖ ባዱ ገሽኖ መንቻ ብርተ ጳውሎሴ ሆንጠህሴመገ

23 ህከኒች ኤተሮን ኦል ሀለቁንኩ ጥቤ ሀለቃች ለሙ ገእ «ሀንከዕሬ ሰሶ ሳቴን ቂሳር ከተመ መርታ ለሜ ጥቤ ዋታደረ፥ ለመላዩ ፋሻንቹለከ ለሜ ጥቤ በገዝ መን ቅጥአዕዬ።

24 ህትን ጳውሎስ ቆጶኖ ገማሙ ቅጥ አቴን ባዱ ገሽኖ ፍልክሴበ ወገሬቲን ኢልሳሰገ አዕዬ» ይ አዘዡ።

25-26 ህትን እስን «ቀላዶስ ሉሰዩሲች፤ አበ ከበጀንቶንት ባዱ ገሽታንት ፊልክሴ! ወገሬቱ ኬሳሃ እሁን!

27 ከ መንቹ አይሁዱ አፍ ሽቶት እከንን እስ ሮማውቹ እሁስ ደጎምቤቺሃ ዋታደርንከኤ መር ኢል ጠምሾንሰ።

28 ህትን እስን እሱ መ መሳን ከሰሳሰጎሬ ደጎተ ኦገትሰቤቹ ሆንጠህሾም እቅ።

29 እስን እሱ ከሰሶኢሁ ገይስ ሕግተኔሃ እሁስ ደጎም፤ ጠወ እኮጎሬ ሬሆተ ህከረንገ ኡሱረሚሃ ኢልሰኖ ጠወ መቱርቹሁ ዮበኢ።

30 አይሁዱ ከ መንቹ ሽቶት አድመተ አት አማዕለንቶገ ህከ ወክትንከ ሞጮጭ ኪቤቹ ሶኮም፤ ኦደን ሄኦ መኑንኩ ኪ ብሬን ኦዳገ አዘዡም» ይ ሶኮ።

31 ህካን እኮቤቺሃ ዋታደሩ አዘዘንቶ ሃሌን ጳውሎሴ አፍ ሀንከዕሬን መሰት «አንቲጳጥርስ» ዩኖ ከተመ ኢልሶኡ።

32 ለንክ በሬ ገሰማ ጳውሎሴ ፋርሱተ ቆጶ መኒን ሜጡበ መረኖገ አት ወታደሩ አጉርት ገልታቤቹ ፈንቀልቶኡ።

33 ሁኩ ፋርሱተ ቆጶ መኑንኩ ቂሳር ከተመ ኢልሶ ወክት ደብዳቤተ ባዱ ገሽኖሀኒሃ አት ጳውሎሴ ብሬንከስ ኡርሶኡ።

34 ባዱ ገሽኖንኩ ደብዳቤተ አነበሶች ኤተሮን ጳውሎሴ «አት ሀከን ባድየ?» ይ ጠዕሜስ፤ ኪልቅይ ባድ መንቹ እሁስ ደጎ ወክት

35 «ከሰሳሄሩ አሜቶ ወክት ጠወክ ሞጮጫም» ዬሰ፤ ህትን ሄሮድስ ግንብሲሾ ዋም ግቤ ኣዜን አገርታሰገ አዕዮ።

24

አይሁዱ ጳውሎስ ፊልክሴ ብሬን ኦጆገ

1 አንቶ በሬች ኤተሮን ሎሩ ቂሰቹ ሀናንይ መት-መቶ ባልቃንለክ «ጠርጠሉሴ» ዬኖ ጠበቂን ሜጡብ ቄሳር ከተመ ኦሮዕዮ፤ እስ ጳውሎስ ጠወ ባዱ ገሽኖ ፊልክሴ ብርተ ሆንጠህሰ ከሰሶኡ።

2-3 ህትን ጳውሎስ ገኤን ኤቤመ ወክት ጠበቂቹ ጠርጠሉሰ «ከበጀንቶንት ፊልክሴ! ኪ መሳን ልግብ ወገሬት ደእኖም፤ ጡመገ ገሽንተክ ገይሃኔ ሃዕሮ ጡመርቹ ደእኖም፤ ጡመ ሆጉክ ጉዕመ ወክት ቶንጋሚሁ አበ ገለትኒት።

4 ጠወ እኮጎሬ ወክትክ ቤሱዕናን ገበንቸን ኩላንኬ ጠወ መረርሲጭት ሞጮጭቶት ኤጫንኬ።

5 ኩ መንቹ ኔሳሃ ሂለ ጥዘነተ እክ ዱንዩ አሌን ጉዕማንን ዮ አይሁድ በላን ብተተ ኬሰን ሩዝራውያኑት ዬኖ ክዝብ ትምርት አዋንሳኖች መቱስ እሁሰ ደንጎም።

6 እሰን ዱእ ሞኒ ንጃሲሶተ ሰውየን ደንግ አንፍ [ሕግኔ ሃሊን ፈረንዶተ ሀንሶም እቅ።

7 ጠወ እኮጎሬ በገዝ ሀለቁ ሉሰዮስ አሜች አንጋችኔ ዋልቅሽ መሴእ።

8 ከሰሳሩ ኪቤቹ አሜቶተ አዘዦገ ኩ ነኡ ከሰንሶም ክሱ መርቹሃጎሬ አት ገዉክ እሱ መረመርት ደጎተ አታልታንት» ዬእ።

9 አይሁዱ «ኩ ጠወ ጉዕሙንኩ ሀንቅሃን» ይት ክሳንከሰ ኢተቀንቶኡ።

ጳውሎስ ፊልክሴ ብሬን ኦጆገ

10 ገሻንቹ ፊልክስ አንገሰ ቀቀሽ ጳውሎስ ጠወእኖ ወክት ኣሴሃንሰ ጳውሎስ «ልግቤ ዘማኒች ኬሽ ከን ኡመት አሌን ፍርድ ዳኝ እሁክ ደጎምቤቹሃ ኤሳሃ ከሰሶኤ ክሲሃ መክላክዩ ኪቤቹ ሆንጠህሳም ወክት አበት ሙንዲኑት ሞጮጫንታኡ።

11 እን ዬሩሰሌመ ሰገደተ መሮሚች ቶነ ለም በሬች በተአኖበእገ አት ገዉንኩክ አጥራመቶተ አታልታንት።

12 እሰን ኤሳሃ መገን ሞኔን ኦደንለክ ጭምት ሞኔን ሀከረንገ ከተማን ኡመት ጭምአዕይ ብተተ ኬሰን አፎኤበእ።

13 እኮጎሬ እስ ኤሳሃ ኦደ ጠዉሃ ማሰረጀ ሆንጠህሶሄተ አታልታበእ።

14 ጠዉ እኮሳሬ አን ካን ኩላንኬ፤ እሰ ክዝብየ ይታ አመዕነት ዋቃሃ እናኖኔ መገኒሃ ሰገዳም፤ ህትን ሕጋንለከ ነብያኖ መጻፋን ከተበሞሃ ጉዕመንከ አመዕናም።

15 እሰ ፈያኑትለከ ጨበኛኑት ሬሆች ኬአአ ይት ተብሳሃ አታገን ኤሳሃ መገኖን ተብሶሁ ዮኤ።

16 ህካን እኮቤቺሃ አን መገንለከ መን ብሬን ነጡ ሰውቱ ሄኦኤተ ጉዕመ ወክት አጸማም።

17 ዬሩሳሌም ከተሟች ፋሎምች ልግብ ዘማን እኮች ኤተሮን ኢ ባድ መኒሃ ሀዕላም ብረለከ መገኒሃ ኣሰም ብረ አፍ ፈንቀል አሜቸም።

18 አን መገን ምኔን ነጠ እሄኖ ሴረ ሹሎሚሃ ለኦኤ ወክት ህከን ቤቸን ኢን ጭምዬ ኡመቱለከ ብተት ዮበአ እቅ።

19 ጠዉ እኮሳሬ እሰየ ዬኖ ባዲች አሜቶ አይሁዱ ህከን ቤቸን ሄኦኤ፤ እሰ ኤሳሃ ከሰሳ ጠዉ ዮሰሳሬ ኪ ብርተ ሆንጠክ ጠወኡ አታልታኦ።

20 ህከረንጋ ኦገት ብርተ ሆንጠኮም ወክት አዕዮንሰ ጠዉ ዮ ጎሬ ህንዴ ኩ መኑ ኩልቱን።

21 ሀንቅንከ በላንከሰ ኡር ሎረ ላጋን «ሬቶእሩ ሬሆች ኬአአ ይ ጠወዕዮምሀኒሃ ከበር ብርክዕኔ ሆንጠኮም» ይ ጠወዕዮምቤሉ ዋሉ አዕዮም ጠዉ መቱርቹሁ ዮበአ።»

22 ጠዉ እኮሳሬ ፍልክሰ አመዕነት ዋቃሃ ደገናቤቺሃ «በገዝ ሀለቁ ሉሰዮሰ አሜቸ ወክት አን ጠወክዕኔ ሹላም» ይ ዝኝተ ህግሹ።

23 እሰ ጳዉሎሴ አገረኖ ጥቤ ሀለቀ «አበ ጨነቁሰን አሙዘን ጡመገ አገርሰ፤ ጆላሰ ሀሰሰኖሰርቹ ኤባሰ ወክት ከንቶተሰ» ዬእ።

ጳዉሎሰ ፊልክሴለከ ድሩሲላ ብርተ ሆንጠሁሰ

24 ቀወ በሬች ኤተሮን ፊልክሰ «ዱሩሲላ» ዬኖ አይሁድቸ መንቸንተሰን ሜጡብ እክ አሜቸ፤ እሰ ጳዉሎሴ ገእሲሽ መሲህ ኢሳን አመዕነትኒሃ ጠወአንን ሞጮጮኦ።

25 ህትን ጳዉሎሰ ፈይመተኔሃ፥ ገዉ አገዕርተኔሃለከ አሜተኖ ፍርድተኔሃ ኩለኖ ወክት ፍልክሰ ዋጅ «ቴሶተሰ እሀኖኤ፤ ቴሱ መር! ሀሾም ወክት ገእሲሳንኬ» ዬእ።

26 ህከ ወክት ፍልክሰ ጳዉሎሴች ጉቡተ ኣኦተ ተብሳሃ አአኖት እቅ፤ ህካን እኮቤቺሃ ልግብ ወክት ጳዉሎሴ እሰቤቹ ገእሲሰን ጠወሲሰኖሰ እቅ።

27 እኮጎሬ ለሞ ዘማኒች ኤተሮን ጳርቅዮስ ፊስጦስ ፍልክሴ ቤችን ገሽኖሃ እኮ፤ ፍልክስ አይሁደ መንዲሲሶተ ሀሾቤቺሃ ጳውሎሴ ኡሱር ሞኔን አጉሮስ።

25

ጳውሎስ «ሮሞ ባድ ዋመቤችን ይግባኝ» ዩስ

1 ፊስጦስ ገይስ አዉራጃ አሜች ሰሶ በሬች ኤተሮን ቂሳርይ ከተሚች ዬሩሳሌመ ኦሮዕዮ።

2 ህከን ቤችን ፊስጦሴ ብሬን ቂስ ሀለቀትለከ አይሁድ ሞኒ ሎርሎሩ አዋንሳኑት ጳውሎሴ ከሰሳ ጠወ ሆንጠህሶኡ።

3 እስን ፍስጦስ ጳውሎሴ ዬሩሳሌመ ፈንቀሾት ኡጭቶኡ፤ ህከን ይቶ መስት ዎቃን አገርት ሽቶተ ሀሶቤቺሃት።

4 ፍስጦስን «ጳውሎስ ቂሳርየ ኡሱር ሞኔን ዮኡ፤ እን ገዉእ ህከ ቤቹ ፈንቀል ደዕል መራሞ።

5 ቩመክዕኔ ኢን ሜጡብ ቂሳርየ መርቱን፤ ጳውሎስ አዕዮ ሂሉርቹ ዮስጎሬ ህከን ቤችን ከሰሱን» ዩስ።

6 ፊስጦስ ህዜቱ ህከረንገ ቶኑ በሩ ኢሎተ ኢለ እስቤችን አገርች ኤተሮን ቂሳርየ ባዱ ኦሮዕዮ፤ ህከ ቤቹ ኢሌ ለንክ በር ፍርድ ቦርጭማን አፋዕል ጳውሎሴ ሆንጠህሳገ አዘዡ።

7 ህትን ጳውሎሴ ሮሞ ባድ ዋመ ሀለቅቤቹ ሆንጠህሴመ ወክት ዬሩሳሌሚች አሜቶ አይሁዱ ረብ ኡርት ሞስክር ደጎተ አታልትበ ልግብ ጠረኘ ክስ ሆንጠህሶኡ።

8 ጳውሎስን «እን አይሁድ ሕጋን፥ መገን ሞኔንለከ ሮሞ ዋመ አሌን አዕዮሞ ሂሉ ጠዉ መቱርቹሁ ዮኤበአ» ይ ጠዕሜእ።

9 እኮጎሬ ፊስጦስ አይሁድ መነ መንዲሲሶተ ሀሽ ጳውሎሴ «ዬሩሳሌመ መርት ከ ጠወ ኢ ብሬን ፍርድ አእቶተ ሀሰንንዶ?» ይ ጠዕሜስ።

10 ጳውሎስ «እን ፍርድ አኑተ ሀሰሰኖኤሃ ሮሞ ዋመ ሀለቅ አሌን ፍርድ ቦርጭመ ብሬን ኡርዮሞ፤ እኮጎሬ አት ገዉክ ጡመገ ደጋንትገን አይሁዲሃ አዕዮሞ ሂሉርቹ መቱርቹሁ ዮበእ።

11 ህትን እን ቤሾሞ ጠዉ ዮ ጎሬ ህከረንገ ሬሆተ ኢልሰኖኤ ብድል አዕዮሞጎሬ ሬሆች ጡሞ ያምበእ፤ ጠዉ እኮጎሬ እስ ከሰሳኤ ጠዉ ክዝብ እኮጎሬ አዩሁ ኤሳሃ ህግሽ ኦሶኤተ አታለኖበእ፤ ሮሞ ባድ ዋሞ አሌን ይግባኝ ይዮሞ» ዩእ።

12 ህከ ወክት ፊስጦስ እስ አማሌ መኒን አማዕለሞ «አት ሮሞ ባድ ዋሞ አሌን ይግባኝ ይቶንት ጎሬ ህከ ሮሞ ዋሞቤቹንከ መርታንት» ዩስ።

ጳውሎስ አግሪጽላክ በርኒቄ ብርተ ሆንጠኮገ

13 ቀዋ በሬች ኤተሮን ዋሙ አግሪጽላክ በርኒቄ ፍሰጦሴ «ሀበይ ወገሬቲን አሜት» ይቶተ ቂሳርየ መርቶኤ።

14 እሰን ህከን ቤቸን ልግብ በር አፋዕልቶቤቺሃ ፍሰጦስ ጳውሎሴ ጠወ ዋሙ አግርጺሃ ኩለን «ፍልክስ ኡሱርሲሾ መቼ መንቹ ኡሱር ሞኔን ዮኤ።

15 ህትን እን ዬሩሳሌመ ሄዕዮም ወክት ቂስ ሀለቀትለክ አይሁድ ባልቁ እስተኔሃ ኩልቶች ኤተሮን አሌንከስ ፈረዶተ ጠዕምቶኤ።

16 ጠዉ እኮጎሬ እን ሕስሳም መንቹ ከሰሾ መን ብሬን ኡር ከሰሰም ጠዋሃ መከላከይ መሰሉ አሰሙዕን ከሰሰም መንቹ ህግሴን አሱ ሮም ባድ መኒሃ ሴረበኤ ይ ፈንቀሺም።

17 ህካን እኮቤቺሃ ከሰሶ መኑ ጭምይት ከቤቹ አሜቶ ወክት እን አገሩዕን ለንክ በር ፍርድ ቦርጭመ አሌን ፈረዶተ አፋዕል ጳውሎሴ ሆንጠህሳገ አዘዢም።

18 ሁኩ ከሰሶእሩ መዳስ ኡርቶ ወክት እን ኩ መንቹ ቤሾ ይ ሰውዬም ጌሰ እሱ ክሲሃ ኢልሰኖ ጠወ መቼርቹሃ ሆንጠህሰበኤ።

19 ጠዉ እኮጎሬ እስ እሲን ኦደን ሄኡ ጠዉ ገይሰ አመዕነትስተኔሃለክ እኮጎሬ ሬዮ እቅ ጳውሎስ «ፎልን ዮኤ» ዬ ኢስተኔሃት።

20 ህትናሙ ጠወ አጥራመች ደጉ ኤሳሃ ኦርሾኤቤቺሃ ጳውሎሴ «ዬሩሳሌመ መርት ህከን ቤቸን ፍርደክ ለኦኖተ ሀሰንንዶ?» ይ ጠዕሜስ።

21 እኮጎሬ ጳውሎስ ኦደን ሄዕዮ ጠወ ሮም ባድ ዋሚን ለአዋተ ሀሽ ሮም ባድ ዋሚሃ ይግባኝ ዮንከስ ህካጸ ሶሆሰተ ኢላ ኡሱር ሞኔን አገረኖገ አዘዢም» ዬእ።

22 ህትን አግርጽ «እን ገዉእ ኩ መንቹ ኩለን ሞጮጮተ ሀሳም» ዬ ወክት ፍሰጦስ «ጋተ ሞጮጮታንት» ዬእ።

23 ለንክ በር ገሰመ አግርጽላክ በርኒቅ ኬዕምኣ ኦድኑተ ኦደእ በገዝ ሀለቃኖንለክ ከተም ሎርሎረ መኒን ሜጡበ እክ ፍርድ ሞኒ ኣጎኤ፤ ህከኒች ኤተሮን ፍሰጦስ ጳውሎሴ ገእሲሽ አሜተኖገ አዕዮ።

24 ፍሰጦስን «ዋሙ አግርጸ! አዕኑ ኒን ከንቤቸን ሜጡበ ዮንተ መኑ ጉዕመንኩ! አይሁዱ ሕኩ መንቹ ከኒች ኤተሮን ፎሊን ሄኡ ሀሰሰኖሰበኤ ይተን አሌስ ፈረዶተ ዬሩሳሌማንለክ ከኔ ቂሳርያን ኤሳሃ ጠዕምቶ መንቹ ከኒት።

25 እን ጳውሎሴ አሌን ሪሆተ ኢልሰኖ ጠወ ደጎምበኤ፤ እኮጎሬ እስ ገዉስ ሮም ዋሙ አለቂሃ ይግባኝ ዬቤቺሃ ሶሆተ ወሰቸም።

26 እሁን ቤሉ እስተኔሃ ዋሚሃኤ ከተባም አጥራመኝም ጠዉ ዮበእ፤ ህካን እኮቤቺሃ መረመረሞኝ ኤተሮን ከተባም ጠዉ ደኤም ጎሬ ይ ብሬንከክዕኔ በትሽን ዋመ አግርጸ! ብርክ ሆንጠህሾም።

27 መሰንትሰ ኡሱረሞ መንቹ ዋመ ሀለቅቤቹ ሶሄኖ ወክት መንቹሰ ኦደሞ ጠዉ ከተቤን ኤንኬዕንሱ ሆጉሰ ገውመተ አጉጅ ለልዮኤ» ዩእ።

26

ጳውሎስ ዋመ አግርጽ ብሬን ጠወዕዮገ

1 ዋሙ አግርጽ ጳውሎስ «ገይክ ጠወ ጠወኣተ ወክቱ ኣሰሞሄ» ዩሰ፤ ህካን እኮቤቺሃ ጳውሎስ አንገሰ ሂር

2 «ዋመ አግርጸ! አይሁዱ ከሰሶኤ ጠዊ ጉዕሚንከ ከበር ኪ ብሬን መሰለ ኣሳም ወክት አበ ተሽ የኖኤ።

3 መሰንትሰ አት አደደ አይሁድ ወገለክ ኦደሰ ጉዕመንከ አጥራመት ደጋንት፤ ህካን እኮቤቺሃ ኢ ጠወ አደቢን ሞጮጭታንቴኤገ ኡጫንኬ።

4 «ኦሰማችኤ ኬሽ ሀት እክ ሄዕዮምጎሬ አይሁዱ ጉዕመንኩ ደጋእ፤ ወዕኔች ኬሽ ገይኤ ኡመት በላንለክ ዩሩሳሌማን ሀት እክ ሄዕዮምጎሬ ሄኡኤ ደጋእ።

5 ሀትን እሰ ኢ ጠወ ኩልቶተ ሀሶ ጎሬ አመዕነትንከኔ ዋገ አገሪን አበ ጠረኘ እኮ ፈርሳዊ አዲሃ እሁኤ ወዕኔችን ኬሰ ደጋኦ።

6 አን ቴሁ ከኔ አሌንከኤ ፈረደሞኤተ ኡራሚሁ መገኑ ኒ አበናኖተ ኣሴ ላገ ተብሴሃት።

7 ሀከ ተብሳሃ ደኢሃ እሰራኤል ቶን ለሙንኩ ደቡኔ ሀንከዕርተለክ በራሃ መገኒሃ ጠረኝት ሰገዳኢት እቅ፤ ዋመ አግርጸ! አይሁዱ ኤሳሃ ከሰሳኤሁ ከን መሳኒት።

8 መገኑ ሬዮ መነ ሬሆች ኬሰኖ እሁሰ ክዕኔሃ ሀት አመዕነቱ ሆፈዕዮህዕኔ?

9 «አን ገዉእ ናዝሬት ኢሰ ሱዕመ አታሎም ጌሲን ቶጉ ግቡ ጡመሃን ይ ሰውያም እቅ።

10 አን ዩሩሳሌማን አዕዮሚሁ ከኒት፤ እሰን ቂስ ሀለቃች ቶጎም ደኞማን አመዕንቶ ወገሬት መነ ኡሱር ሞኒ ኣግሾም፤ ሀትን እሰንተ ሸተን ሸታሀኡኤን ሜጡበ አማዕለሞም።

11 እን ልግብ ወክት ጉዕመንከ ጭምት ምኒ መረን ኦሌኖሰገለክ ቀርች ሱዕመ ቦሮርታገ ኦዕዮም፤ ህትን እስ አሌን ኡሙዕር ዋሎ ባድ ከተመ ኢሎተ ኢለ መረን ሸራንሳት እቅ።»

ጳውሎስ መገን አደ ፈንቀሉስ ጠወዕዮገ

(ሶቀ. 9፡1-19፤ 22፡6-16)

12 ህካን እኮቤቺሃ «እን ቂስ ሀለቃች ዊመ ሹምነቱለከ ትዛዝ ቶግ ደማሰቆ ከተመ ኦሮዕዮም።

13 ዋመ! እን ዋቃን ሃመን ዙር ሰአት እኮ ወክቱን አር ኑሪች በተአኖ ኑር ለዕዮም፤ ሁኩ ኑሩንኩ ኢለ ኢን ሜጡበ ሃመን ሄዕዮ መን መዴን ሰሜች በለቆ።

14 ነኡ ጉዕመንኩኔ ኡለ አሌን ኡንብ እብራዊ መን አፎን ሳኦሌ! ሳኦሌ! ሚሃ ሸርታንቴኤት? ቦረተ አቡሬኖ ሱጠ ብረቲን * ቀሴነን ጌጥ ይት ሃንትበጎር ምርተአንት፤ ይታ ላገተ ሞጮጮም።

15 አነን ቀርቾ! አት አዬት? ዬም፤ ህትን ቀርቹንኩ ሐን አት ሸርታንቴኤ ኢሳት።

16 እኮጎሬ ቴሱ ኬእ ሎካንከክ ኡር፤ እን ኬሳሃ ለሌንኬሁ ካዲንቹ እኮተ ህትን ለኦንት ጠዊሃለከ ብርተ ዋሽት ለአንት ጠዊሃ ምስክር እኮተ ሸሞሃታት።

17 እን አይሁድ ኡመት አንጋችለከ ህትን እን ሶሃንኬ አይሁደ እክበ መን አንጋች ጡምሳንኬ።

18 እልስ ፈንቶተለከ ቱንሰቺች ኑርቤቹ ፋሽቶስተ ሸይጣን ዋልቃች መገን አደ ፈንቀሽቶስተ አአንኬ፤ እስን ጨቡስ ፈቁን የመመኖስ፤ ህትን ኢን አመዕንት ኢረ እኮ መን በሊች እስ ርስት ቤቀንታኦ ዬእ።

ጳውሎስ ሆጎስተኔሃ ጠወኡስ

19 «ህካን እኮቤቺሃ ዋመ አግርጸ! ሰሜች ኣስንቶኤ መናመተ ቶጉ ግቦምበእ።

20 ጠወ እኮጎሬ አን ሃጭ ደማሰቆ ከተማን ሄዕዮ መኒሃ፤ ህከኒች ኤተሮን ዬሩሳሌም ከተማንለከ ይሁድ ባዶን ሂኣእሩ ጉዕመንኩ ህትን አይሁደ እህቡ መኑ ጨብስ ቶበት መገን አደ ፈንቀልታገ ተማርሴንስ፤ ህትን ጨብስ ቶበት ፈንቀሉስ ለሊሳ ሆጉተ አታገ ተማርሴንስ።

* 26:14 ሱጠ ብረቲን፡- ኒ ሴሪን ቦረተ ጮርቄን ገረፌንን አቡሬኖህንገን አስራኤል መኑ ቦረተ አቡርታኢሁ ሱጠ ብረቲን ቀሰኒት። 26:20 ሶቀ. 9፡20፤ 28-29።

21 ህክን መሳን አይሁድ መኑ ኤሳሃ መገን ምኔን ሄዕዮምሀኔን አፍ ሽቶኤተ ሀሶኡ።

22 ጠዉ እኮጎሬ ከበሬ ኢላ መገን ሀዕለንሹ ኢች አደ እኮበአ፤ ህካን እኮቤቹሃ አን ሎሪሃለከ ቀዊሃ ተማርሰን ከንቤቸን ዮም፤ ሙሲለከ ነብያከት ሄጭት ህት እሀኖ ይቶኢሃ ጠወዕዮምሀንቤሉ ዋሉ መቱርቹሃ ጠወዕዮምበአ።

23 ሁኩ እሰ ጠወኦኢሁ ለመሲሁ ኦርሸተ ቶገኖ፤ ህትን ሬሆች ከኢን ዋኔሃ እክ ጡም ኑር እሰራኤል መኒሃለከ አይሁድ እህቡ መኒሃ ለሊሰኖ ይተት» ይኣ።

24 ጳዉሎስ ህት ጠወአንን ፍሰጦስ «ጳዉሎስ! ቲዕኑ በርገጎንት፤ ልግብ ተማሩክ በርገጋሽ አዕዮሄ» ይላገስ ጎት አዕይ ጠወዕዮ።

25 ጠዉ እኮጎሬ ጳዉሎስ «ከበጀንቶንት ፍሰጦስ! አን ሀንቅለከ ሀቅቀተ እኮ ጠወ ጠወአሚት ቤሉ በርገጎምበአ።

26 አን ብሬስ ለሊሽ ጠወዕዮሚሃ ዋሙ ህክ ጠወ ደገኖ፤ ሁኩንን ማጠም አሰምባሃ እኮቤቹሃ ዋሙ ደገኖገ ተሬገጮም።

27 ዋሙ አግሪጳ! ነብያኑተ አመዕንታንትበእንዶ? አት አመዕንታንትገ ደጋም» ይፈንቀሼእ።

28 አግርጵ ጳዉሎስ «አት ኤሳሃ ቀዋ ጌሳን መሲህ ኢሳን አመዕናምገ አቶኤተ ሰውይቶንት» ይሰ።

29 ህትን ጳዉሎስ «ገበንቸ ወክቲን እሁን ቄራዕር ወክቲን ኬሳሃ ጠለዕል እሁዕነ ከበር ኩላሚሃ ሞጮጨኖሁ ጉዕሙንኩ ከን ኡሱረምኤ ቤሉ ዋሎርቸን ጉዕማንን ኢገ እኮተ ዱአ አአም» ይኣ።

30 ህከኒች ኤተሮን ዋሙ፥ ባድ ገሻንቹለከ ቤርኒቅ እሳንን ሜጡብ አፋዕልቶእሩ ጉዕሙንኩ ኬኦኡ።

31 እሰን ህከንቤቹች ኬእ መርተን «ኩ መንቹ ሬሆተ ህከረንገ ኡሱረሞተ ኢልሰኖስ ጠወ መቱርቹሃ አዕዮበአ» የቀንቶኡ።

32 ህትን አግርጵ ፍሰጦስ «ኩ መንቹ ሮም ባድ ዋሙ ዋም አሌን ይግባኝ ይዮበእቃን ህትን ገፈረመኖ እቅ» ይኣ።

27

ጳዉሎስ ሮም ከተመ መርተ ኬኡስ

1 ህከኒች ኤተሮን ጣልያን ባዱ መርከቢን መርኖተ ወሰነሞ ወክት እሰ ጳዉሎስለከ ዋሉ መት-መቱ ኡሱረንቶእረ በርግት ሮም ወታደር ኣዜን ሄዕዮ ይልዮሴ ዬኖ ጥቤ ሀለቀቹሃ ህግስ ኣቶስ።

2 እስይ ባር መዴን ዮ ባዶን ሄዕዮ መርከበት ኡርታ ቤቹ መረኖ አድራሚጥዮን መርከባን ኣንግ መርኖም፤ ተሰሎንቄን ሄኣኖ መቄዶን ባድ መንቹ አርሰጥሮኩሰ ኒን ሜጡብ ሄዕዮ እቅ።

3 ነኡ ለንክ በር ሲዶን ከተመ ኢልኖም፤ ዩልዮስ ጳዉሎስ አሙዡሰቤቹሃ ጃለሰቤቹ መር እሳቶ ሀሰስኖርቹ ኤቦተ አዕዮስ።

4 ነኡ ለንክ በር ቦብሩ ጠረኝ ቦብርሰን ሃሙ ከሞኔቤቹሃ ዊን ረበንቶ «ቆጵሮስ» ዬኖ ኡላን ቴዕልን ባር አሌን መርከባን ሃሙ ጀመርኖም።

5 ክልቅይለከ ጵንፍልዮ መዴን ሄዕዮ ባረ ቶልኖሚች ኤተሮን ሊቅዮ ባዶን ሄኣኖ «ሙራ» ዬኖ ከተመ ኢልኖም።

6 ጥቤ ሀለቁ ጣልያን ባዱ መረኖ አለክሰንደሪ ከተም መርከበ ደግ እሶን ኣግሾኔ።

7 ነኡ ልግብ በር ሎድ ይን መርነን አበ ኦርሻን ቀኒዶስ ከተም መድ ኢልኖም፤ ቦብሩ ብርተ ዋልን ሃሙ ከሞኔቤቹሃ «ሰልሞና» ዬኖቤቹን ህንግ ዊን ረበንቶ «ቀርጤስ» ዬኖ ኡላን ማጠም ኦርዕኖም።

8 ነኡ አበ ኦርሻን ገበል ገበል ሃመን ህንግ «ላሰዩ» ዬኖ ከተም መዴን ሄኣ ጡመተ ዬኖ መርከቡ ኡረኖ ቤቹ ኢልኖም።

9 ዋቄኔ አሌን ልግቡ ወክቱ በዕዮቤቹሃለከ ሶመን በሩ * ህጎቤቹሃ ህከን ወክቱን ባር አሌን ሃሙ አበ ኦርሰኖቤቹሃ

10 ጳዉሎስ «ኮ መነ! ከኒች ኤተሮን ዮኔ ዎቃን አበ ኦርሸት ዮኢሃ አሁስ ለለኖኤት፤ ሁኩንን ሆጎባንለከ መርከባን ኢልታ ኦርሸተ ጠለዕለ እሁዕናን ኒ ገይኔ ነብሳን አቡ ኦርሸት ኢልቶተ አታልታአ» ይ ጠረኝሽ ጠወዕዮ።

11 ጠዉ እኮጎሬ ጥቤ ሀለቅቹ ጳዉሎስ ጠረኝሽ ጠወዕዮ ጠዊች በትሽ መርከበሰ ኦተአኖህንለከ መርከብሰ እኑ ዮኖሃ ሞጮጮኖት እቅ።

12 ሁኩ መርከቡ ኡረኖ ቤቹ ከርም ህከኔ ህግሲሃ ጡመ እህበቤቹሃ መኒች ልግቡስ «ሃሚሃ አታልሲሾጎሬ ቅልብ ገርብንለከ ከኣጳ ገርብ ኡሮን ዮ ፊንቄ ዬኖ ዊን ረበሞ ቀርጤሳን ሄኣኖ መርከቡ ኡረኖ ቤቹ ኢልን ከርም ህከኔ ህግንሶ» ይት አማልሰ ሆንጠህሶኡ።

ባር አሌን ኤንጉሉሎ ቦብሩ ኬኡስ

* 27:9 ሶመን በሩ፡- እይሁድ ሶመን በሩ ከበጀመኖሁ ጥቅምት እገናኒት፤ ሜዴተራንያን ባር አዘጋገን ቅዝለከ ጤን ወክቱ ጀመረኖሁ ህከን እገናን እኮቤቹሃ ሁኩ ወክቱ መርከባን ሃሚሃ አበ ኦርሰኖ።

13 ከአጳ አዲን ቦብሩ ሎድ ይ ቦብርሰን ለኦ ወክት እስ ሰውይቶ ሃሊን እሀኖሃ አጉጃንስ መልሕቀ ኬስ ሃንቶተ ኬኦኤ፤ ሁኩ መርከቡ ኡረኖቤቺቶ ኬእ ቀርጤስ ኡለ ለቸን ህጎኡ። †

14 ጠዉ እኮጎሬ ቀዎ ወክቲቶ ኤተሮን ቅልቢን ሸርቅ ኡንጉሉሉተ ዬኖ ጠረኙ ቦብሩ ዊን ረበንቶ ኡላቶ ኬዕይ እስ ዮ ቤቹ አሜቶ።

15 መርከብ ቦብሩ ሀምበሎቤቺሃለከ ቦብረስ አታሉ ሆንጎምቤቺሃ ጨለ ይን ቦብሩ ሀንበለኔ መርኖም።

16 ቀዎ ዊን ረበንቶ ቄዳ ዬኖ ኡለ መዲን ህንግ መርከብ ሀዕለኖ ጀልበ አበ ኦርሻን ኡሱርን ኡርንሶተ አታልኖም።

17 መርከብ ኣዜን አታ መኑ ጀልበስ ኣዝ ኣግስ መርከበስ ዌደሪን ኡሱርቶኡ፤ ህትን መርከበስ ሊብየ ባዲቶ አል አዲን ሄኦኖ ሱርቲስ ዬኖ ሸፋሩ ዮቤቸን ኡባበእገ ዋጅት ሸረ ድሪስ ቦብሩ ሀምበለን መርቶኡ።

18 ኒ አሌን ኡንጉሉሎ ቦብሩ ጠረኘን መርቤቺሃ መርከባን ሆጎበንቶ ኦዳተ መት-መቲን ለንክስ በር ድሪስ ባር ኣዜን ኡጁ ጀመርቶኡ።

19 እስን ሰቅ በር መርከቢሃ ደግለልታ ኦዳተ ባር ዊ አሌን ኡጅቶኡ።

20 ልግብ በር ጠረኙ ቦብሩ ኬዕይ አሩለከ ቤዜተ ለኡ ከምኔቤቺሃ ጡምናምበአ ይን ተብሳሃ ሙርኖም።

21 መኑ እቸተ እቱዕነ ልግብ በር ዲንኬቤቺሃ ጳዉሎስ በለስ ኡር «ኮ መነ! ከኒቶ ብርቲ ሸዢንክዕኔ ሸዘነተ ሞጮጭቴን ዊን ረበንቶ ቀርጤስ ዬኖ ቤቺቶ ኬኤንታበ እቃን ኩ ኦርሸትለከ በኡ ኢለኖህዕኔበአ እቅ።

22 ቲሁ መርከቡስ በአኖ ቤሉ ክዕኔቶ መትክዕኔ ነብሶሁ በአኖበአ፤ ዋጅቶኖቹ ይ ሸዛንክዕኔ።

23 መስንትስ ህጎ ሀንከዕርተ አን እሲሃ ጠገም ሰገዳም መገኑ ሶኮስ መላይኬቹ መዲንከእ ኡር

24 ጳዉሎሴ ዋጅቶት! ሮም ባድ ዎም ብሬን ኡሩ ዮሄ፤ ህትን ኪን ሜጡበ እክ ሃንታ መነ ጉዕመንከ መገኑ ኪትሄሃ ይሬሆቶ ጡምሰኖ ይ ኩሎኤ።

25 ህካን እኮቤቺሃ መነ ዋጅቶኖቹ፤ መገኑ ኤሳሃ ኩሎኤርቹ አአኖገ አመዕናም።

26 እኮጎሬ ቦብሩ ሀንበል መት ዊን ረበንቶ ኡለተ መስኖኔ» ዬእ።

† 27:13 መልሕቀ:- ዩ መርከቡ ኡረኖ ወክት ኡላን ካስም መርከቡስ ሃምበገ አአኖሃ ሎረ ብረት።

27 ቶነ ሾልቅ በሬ ሀንከዕሬን አድርጋ ባር † አሌን ቦብሩ ሀምበለን ሀንከዕሬ በላን መርከብ ኦተኣእሩ ኡለተ ኢልቶኢሃ አጉጀሰ።

28 ህካን እኮቤቺሃ እሰ ህከን ቤቺ ጥዕላሽመተ ዋደሪን ክኑ ኡሱርት ኣዘ ዋሽት ብክታ ወክት ህዜታዩ ብኩተ እኮ፤ ህትን ቀወ ወክቲች ኤተሮን ለንኪሃ ብክቶ ወክት ሌሃዉ ብኩተ እኮ።

29 ህካን እኮቤቺሃ መርከቡ ባር መዴን ዮ ክኖን ዋቀዕርበገ ዋጅት መርከብ ኤተር አዲን ሾሉ «ማልሕቀ» ዬኖ ብረት ባር ኣዜን ኡርሶኡ፤ ህከኒች ኤተሮን ኡለት ሶዛገ ዱኣ አቶኡ።

30 መርከብ ኦተኣ መኑ መርከቢች ፋልት ሀንቶተ ሄዕላት መርከብ ብሬ አዲን ዮ «መልሕቀ» ዬኖርቺ ኡጅታኢሃ አጉድ መርከብ አሌን ሄዕዮ ጀልበ ባር አሌን ኡጅቶኡ።

31 ጳዉሎስ ህካን ለዕዮ ወክት ጥቤ ሀለቅቺሃለከ ዋታደሪሃ «ኩ መርከብ ኦተኣእሩ መርከብ ኣዜን ረጀይት አፋዕልትባች አዕኑ ጡምቶኖተ አታልቴነንተበኣ» ዬሰ።

32 ህካን እኮቤቺሃ ዋታደሩ ጀልበ ኡሱሬመ ዋደሩ ሙርት ባር አሌን ሃንታገ አቶኡ።

33 ኡለት ሶዞተ ሆንጠካን ጳዉሎስ ጉዕሙንኩስ እቸተ እቶተ «አዕኑ መት-መቱክዕኔ አገርቴነን እቸተ እቶኑዕነ ዱንክቴነታች ከበር ቶነ ሾልቅዮ በር።

34 ህካን እኮቤቺሃ አዕኑ እቸተ እቶኖተ ኡጫንክዕኔ፤ እቸት እቴነታች ጡምቴነንተ፤ ክዕኔ አሌን መት ኦርሸት እካህዕኔበኣ» ይ ኡጪኖሰ።

35 እሰ ህካን ዬች ኤተሮን ጣቢተ ኣእ ጉዕምሰ ብሬን ዱኣ አዕይ ቢጭ እቱ ጀመር።

36 ህከኒች ኤተሮን ጉዕሙንኩስ ነሻጥ እቸተ እቶኡ፤ ህትን እሰን ገይሰ አንጋን ጣቢተ ኣእት እቶኡ።

37 መርከብ ኣዜን ሄዕኖምሩ ጉዕሙንኩኔ ለም ጥብተ ለመላይኔ ሌሆ መነ እቅ።

38 እሰን እት ዱቦች ኤተሮን መርከቢሃ ኬዕመኖበእገ አለሱ ባራን ቶርቶኡ።

መርከቡ ቢጠሙስ

39 እሰን ኡለት ሶዞን ኢልቶ ቤቺ ደጎበኣ፤ ጠዉ እኩጎሬ ባር መዴን ዮ ሸፋር ኡለተ ለኦኡ፤ አታልቶ እቃ መርከብ ህከ ቤቺ ሆንጠህሶተ ሰውይቶኡ።

† 27:27 አድርጋ ባረ፡- የኖሁ ሜድትራን ባሪች መቱሃስ አደ

40 ህካን እኮቤቺሃ እስ መርከበ ኡርሳ መልሔቅ ዌደሩ ሙርት ኡጅቶኡ፤ ህትን መርከበስ ጉረለከ መኬ አደ እኢሃ ሀዕለኖ ዌደሩ ሂርቶኡ፤ ሸረስ አሌ ዋሽት ኡሱርታን ቦብሩ ብርተ ዋሽ ሃንሲስን ባሪች ገበለ ዋል ሃመኖገ አቶኡ።

41 ጠዉ እኮጎሬ መርከቡ ናረሞ ሸፋራን ቆዕል ብሬ አዲን ኡላን ካሰሞቤቺሃ ሌንቄቅበገ እኮ፤ ህትን ኤተር አዲን ዊ ሁሉ አበ ሀምበለኖቤቺሃ ቢጠሙ ጀመሮ።

42 ኡሱረንቶሀኑኡች አዪሁ ባረ ዘከዕይ ፋሽዕበገ ዎታደሩ ሸቶተ አማዕለንቶኡ።

43 ጠዉ እኮጎሬ ጥቤ ሀለቅቹ ጳዉሎሴ ጡምሶተ ሀሾቤቺሃ ሰውትስ ቶገበእ፤ ህካን እኮቤቺሃ ዘከኡ አታለኖሁ አዪሁ መርከቢች ኮርጅ ድር ዘከዕይ ገበለ ፋላኖገ አዘዣ።

44 ፈቆሀኑኡች መቱ ጌሱ መርከቢች ቢጠሞሀኒን ህከረንገ ዋሎርች አሌን እክ ፋልቶተ አዘዣን ጉዕሙንኩስ ወገሬቲን ገበለ ፋልቶኡ።

28

ጳዉሎስ ዊን ረበንቶ «ማልተ» ኢሉስ

1 ነኡ ዊን ረበንቶ ኡለቤቹ ወገሬቲን ኢልኖሚች ኤተሮን ሁኩ ኡለት «ማልተ» ዬን ገኤኖሃ እሁስ ደንጎም።

2 ህከ ወክት ጤን ኡባን ቂዘ እኮቤቺሃ ህከን ዊን ረበንቶ ኡላን ሄእኖ መኑ ጉዕሙንኩ ገረተ ቡስት ጡመገ አት ኮህሶኔ።

3 ጳዉሎስ ሁረ ጭምአዕይ ገራን ዎሮ፤ ህከን ፋራን ኬዕዮ አኔን መቱ ዎሪቹ ፋል ጳዉሎሴ አንገስ ከሮ።

4 ማልተ ዬኖ ኡላን ሄእ መኑ ዎሪቹ ጳዉሎሴ አንገተ ከሩስ ለእ ወክት ገገዉንኩስን «ኩ መንቹ ሀንቅንከ መነ ሸዮእሃን፤ ባሪች ወገሬቲን ፋሎጎሬሁ ፍርዲች ጡም ፎሊን ሄኦተ አታሎበእ» ዮቀንቶኡ።

5 ጠዉ እኮጎሬ አንጋችሰ ዎሪቹ ግግሽ ገራን ኡጅ ምርተኡዕነ ፈቆ።

6 እስ «አንገላንገን አሉስ ደርሸኖ ህከረንገ ወክትንከስ ኡብ ሬሀኖ» ይት አገርታኢት እቅ፤ ጠዉ እኮጎሬ እስ ልግብ ወክት አገርትኬእ ምርተኡ ሆጉስ ለእ ሰውትስ ደርት «ኩን መገኑሃን» ይቶኡ።

7 ህከን ሄዕኖም ቤቸን መዴን ዊን ረበሞ ባዱ ገሸኖ «ፑፕልዮሴ» ዬኖ መንቹሃ ኡለት ሄኦስ እቅ፤ እስን ምንስ መስ ሰሱ በር ጡመገ አዕይ ቶጎኔ።

8 ህከ ወክት ፑፕልዮሴ እነ ፋረትለከ ጎደበ ኦተዕይ ጥዣንስ ኦሰዕዮ እቅ፤ ህካን እኮቤቺሃ ጳዉሎስ እስ ምኒ ኦርዕይ አንገስ አሌስ አዕይ ዱኦ አዕያን ፈዬእ።

9 ሁኩን እኮች ኤተሮን ህከን ዊን ረበንቶ ባዶን ሄኦ መኒች ዋሉ ጥዘናመት አሜት ጥዘናችሰ ፈይቶኡ።

10 እስ ኔሳሃ ልግብ ሸልማት ኤቦኔ፤ ከበጁስ ለሊሶኔ፤ ነኡ መርከባን ኣንግ መርኖተ ኬዕኖም ወክት ኔሳሃ ሀስሰኖርቹ መርከባን ሆጎሶኔ።

ጳዉሎስ ማልታች ሮመ ኦርዕዮገ

11 ሰሱ አገነ ዊ በላን «ማልተ» አገርኖሚች ኤተሮን ከርም ህከኔ ዊን ረበም ባዶን ዱንኬ አሌክሰንደር ከተም መርከባን ኣንግ ሃሞተ ኬዕኖም፤ መርከብስ አሌን «ዱዮስቆርስ» ዬኖ መልተ ሸርኬሃ ለም መላት ሄኦስ እቅ።

12 «ሰራኩስ» ዬኖ ከተመ ኢልን ሰሱ በር አፋዕልኖም።

13 ህከንቤቺች ባር መዴን ዘህን «ሪጊዩም» ዬኖቤቹ ኢልኖም፤ መቶ በሬች ኤተሮን ከኣጽ ኣዲን ቦብረኖ ቦብሩ ቦብርሴቤቺሃ ለንክስ በር «ፑቲዮሉስ» ዬኖቤቹ አሚንቶም።

14 ህከኔ ሄኦ አመዕናኖን ደቀም እሳንን ሜጡብ ለመለ በር ዱንክኖተ ኡጭቶኔ፤ ህከኒች ኤተሮን ሮም ከተመ መርኖም።

15 ሮም ባድ አመዕናኑት ኒተኔሃ ሞጮጭቶ ወክት «አፍዮስ» ዬኖ ጌቤበለከ «ሰሱ ኮሁ ገለኖ ምነት» ዬኖቤቹ ኢል ኔሳሃ ቶጎተ አሚቶኡ፤ ህካን እኮቤቺሃ ጳዉሎስ እስተ ለዕዮ ወክት መገኑ ገለትጭ ጠረጌኦ።

ጳዉሎስ ሮም ከተመ ኢሌገ

16 ነኡ ሮም ከተመ ኣንጎም ወክት ጳዉሎሴ ፋሸእበገ አገረኖ መቱ ዋታደርቹ ኣሴናንስ ሜጢሀስ ሄኦኖገ አኤመስ።

17 ሰሶ በሬች ኤተሮን ጳዉሎስ ሮም ከተማን ሄኦ አይሁድ ሎርሎረ መነ ገእሲሾ፤ መኡስ ጭምይቶ ወክት «አመኤ ኦሶ! እስራኤል ኡመት አሌንለከ እናከኔ ሴር አሌን አዕዮም ብድሉ ዮበእ፤ እሁን ቤሉ ዬሩሳሌም ከተማን ኡሱረሞምቤቺች ሮም መኒሃ ህግሴን ኣሴመኤ።

18 ሮም ባድ መኡ መረመርቶች ኤተሮን ህትን ገፈርቶኤተ ሰውይቶኡ፤ መሰንትስ ኤሳሃ ሬሆተ ኢልሰኖኤ ጠወ ሆጎቤቺሃት።

19 ጠወ እኮጎሬ አይሁዱ አን ህትን ገፈረሙ ግባ ወክት ሮም ባድ ዋም አሌን ይግባኘ ዩ ሀስሾኤ ቤሉ ኢ ኡመት ከሰሳም ጠወ ዮኤበኦ።

20 ህካን እኮቤቺሃ እን ክዕኔተ ለኦተለክ ክዕኔን ሜጡበ ጠወኦተ ጠዕምዮም፤ መሰንትሰ እን ሰንሰለቲን ኡሱረሞሚሁ እሰራኤልሃ ኣሰሞ ተብሴሃት» ይሰ።

21 እሰ ጳዊሎሴ «ከተኔሃ ኔሳሃ ይሁድ ባዲች ደብዳቤት ኢልቶኔበእ፤ ህትን ከበ ኣሜቶ መኒች አዪሁ ኪ ሂለ ጠወ ኩሎሁለክ ጠወዕዮሁ ዮበእ።

22 እኮጎሬ ነኡ እት አዎንታንት አመዕነቱ አደደ ቤቸን ዮ መኑ ቶጉ ግበኖገ ደንጋም፤ ህካን እኮቤቺሃ ኪ ሰውቱ መሃጎሬ ሞጮጭኖተ ሀንሳም» ይቶስ።

23 ህካን እኮቤቺሃ እሰ ዝኝተ አፎች ኤተሮን ልግቡ መኑ እሰ ገለኖ ምንቤቹ አሜቶኡ፤ ጳዊሎሰን ገሰሜች ሀዋሩተ ኢለ መገን ዎምነትተኔሃ ዮሰ ሰውት ጠወዕዮ፤ ሙሰ ሕጊችለክ ነብያክ መጻፊች ኢሰተኔሃ ኩሎሰ።

24 ህከኒች ኤተሮን መት-መቼሰ እሰ ጠወዕዮሰ ላገተ አመዕንቶኡ፤ እኮጎሬ መት-መቼሰ አመዕንቶበእ።

25 ህካን እኮቤቺሃ ገገዉንኩሰን ኢተቀንቱዕነ አደ እኮገ ጳዊሎሰ ለዕዮ ወክት «ጠሊሉ አያኑ ነብዬቸ እሰያሴን አናካተክዕኔ ጠወዕዮሁ ሀንቅሃን።

26 « ህከ ኡመት ቤቹ መርትኬእ

ሞጮጬሰ ሞጮጭቲነንተ

ሆሮን ቶጌነንተበእ።

ለኡሰ ለኤነንተ እኮጎሬ ሆሮን አጥራመቲነንተበእ።

27 መሰንትሰ ከን ኡመት ቀልቡ ዱጂኡ፤

መጨሰ ደንቅቶኡ፤ እልሰን ቆቆኡ፤

ህት እኮበእ እቃን

እሌንከሰ ለእ

መጫንከሰ ሞጮጭት

ቀልቤንከሰ ሰውይት

ኢቤቹ ፈንቀልቶ እቃን

አንን ፈይሳንሰ እቅ

ይእ።

28 «ቴሁ መገን ጡምሰ ሶህኑት አይሁደ እህበ መኒሃ ሶህንቶእተ እሁሰ ደጌ፤ ህትን እሰ ሞጮጭታኡ» ይእ።

29 «ጳዊሎሰ ህካን ጠወዕዮች ኤተሮን አይሁዱ አበ ኦደን ህከንቤቺች አጉርት ፋልቶኡ»*

* 28:29 ወዕኔ ሉህ መጻፋን ዋሊንሽ 29 ዮኢሃ በርግታበእ።

30 ጳጳሎስ ከር ምኔን ለሙ ዘማን ዊመ አፋዕሌእ፤ እሰቤቹ
አሚተኖ መነ ጉዕመንከ ኮህኒተ ቶገኖ እቅ።

31 ጳጳሎስ መገን ዋምነትተኔሃ ኩለን ቀርኞ መሲህ ኢሰተኔሃ
አዪሁ ከሞሰበኢሃ መለል ተማርሰኖት እቅ።

lxxx

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d